

# Da Schroat van Plöcknsto!

Erzählt von Leopold Jungbauer

vulgo „Heuraffl Puitl“

Am Wajg, oha zan See kimmt ma af an Plotz, wou recht große Stoan umatum liegn. Va doucht siacht ma weit ins Boarisch außi und af da ounan Seitn, is Bähmisch ahi. Do is amol da Schroat gsajbn, es is Summa gwajn, d Sunn hot gschajt und a laus Windei is gounga. Ea hot an die Zeit dajnt, wou a sa Revia am Kubany ghot hot und wals doun uwal kühl da won is, da Schnee is ah in Summa nimma wajggounga, hot a va dahoam fuacht miaßn. Damols hand die Beag nou richtigi Stoafülsn gwajn und netta int af da Ajm, hand a boa Woldbam gstoundn, S meist hand Hoslnuß= und Krounawittstauna gwajn, ah a boa Biran und Äspalinga houmt sie broat gmocht. D Wulda hot du'h d Teiflsmou nou koan Wajg ghot und drum hand große Flajck, afi zua, wuns Schneewossa kajmma is, iwa schwajmmt won. Ah sou is gwajn, bevoa da loungi Winta kajmma is und do hots gschneibt, haushoi is da Schnee glajgn und kolt is gwajn, daß uiß dafrean hot miaßn. Wias doun wieda amol a wajng wiama won is, hot ma gmoat, hiaz wiads bajßa. Noh a boa Johan is die old Kühln wieda zruck kajmma und uiß wos wieda gwoxn is, is hie gwajn.

Af die Beag oum hot d Kühln d Fülsn zrißn und wun da Schnee z'schwa won is, hand d Stoan min Schnee in Houng ohigsaußt und hand int i da Schlucht liegn blim. I dera Zeit hand die Berg uwal niadriga won und d Schluchtn houm sie mit den Stoanan und min Schnee ougfüllt. I da Häh und in Boarisch hot d Sunn oukinna und do is s Eis und da Schnee wajggounga, da Schnee und s Eis is af da bähmisch Seitn liegn blim und s oglajdi Schneewossa hots int i da Schlucht wieda gfreacht. Doucht hots zan drucka und zan schuim ougfounga und hot daj Stoan, daj va da Häh oha gfoln hand, weida und weida kuglt bis s Wossa ohrinna hot kina. Die Stoan hand van kugln und schuim uwal runda won und s Stoamöhl und da Sou'd dea davou won is, dajnt hot s Wossa mitgnumma und do wou sa sie gstaucht hot, liegn lossn. D Wulda hot sie min Wossa, wun ella kajmma is, loungsoum an Wajg du'h d Teiflsmou gschifm und wias amol an Zug ghot hot, hots a sie tuifa ahi gfrajbn. Bis souweit gwajn is, daß s Wossa holbwajgs ohrinna hot kina, hand tausendi va John umigaouga. Eascht int und mit da Zeit uwal wajda afizua, sou wia sie d Wulda a Bajtt grom hot kinna, is s gschauchi Wossa ohgrunna. Af da Ajm und loungsoum die Beag afi, is doun wieda grea won, af die Stoan is eascht Mias gwoxn und loungn danoh Foam und a boa Stauna. A sou is gwajn wia da Schroat wieda amol nohschou kajmma is und wal a koan Wold gfoundn hot, hots eham nit gfoln und ea is noumol af tausnd Joha va dahoam fuacht.

I dera Zeit hot sie d Wulda i da Stift an Wajg grom und s meisti Wossa hot ohrinna kinna, netta s Schneewossa uda wuns ba an Wajda recht gschitt hot, is va Salnau iwa Neioufm, Hittnhouf af Houßnreit ohi grunna. Af den Hiwln und af da Ajm wous drucka gwajn is, is zeascht Gros gwoxn, danoh hand Stauna kajmma und zljtzt Bam.

Am schlechtan houms Bam ghot. Eachtn is nit vüll gwajn, intasi nua Stoana und Schouda. D Fiachtn, daj koani tuifm Wuazn houn, hot da Stuum uwal umgrißn. Eascht wia a boa Tajnnan und Keaschbam dazua kajmma hand, is fia d Fiachtn bajßa won. Dazua hand Buhan und Ohan, Biaran und Äjpsma, ah Ajschlina und Fäahran kajmma und uiß is mitanouna, zeascht loungsoun, danoh uwal schnölla i'd Häh gwoxn. Af 'n Hiwln und doucht wous trucka gwajn is, hots a Dickarat gajm wou neamt duhkajmma is. Wia da Schroat noh tausnd Joha wieda hoam gschaut hot, hots eham sou gfoln, daß a glei doblim is und ea hot am Kubany saj olds Revia heagricht. Doucht hot a an die Zeit dejnkt, wou a dejn lounga Winta vabrocht hot, es is ah nit goa sou schlecht gwajn, netta d' Bam houn doucht nit noch Wold, meha noch Friedhauf gmajckt und s Gros is in Summa gouz gölb won. Mounchmol hand doucht Leit du'h Gajngt gschlich, oughot houms nix netta d Haut van an Vieha houn sa sie umghäjngt und in Hunga hot man ihn, ba die Augn ougsehn. Sunst houms nix ghot, wia zuagpitzti Stoungan und Priegl und mit dajn houms wos dawischt houn daschlogn und gajßn. Sougoa Bäan und Wülf houms hi'gmocht, Augst houms koani ghot uda is da Hunga sou oag gwajn, rajna houms ah nit oag kina, gscheit hands owa schou gwejn, wals d Hiaschn und d Reh triem haumd, daß die Ounan griagt hound. Oamol haums a drum Viah faunga wülln, dos is sou groß wia a kloani Fuaß Hei gwejn, hot voirau zwej loungi Zajnt und an Riassl ghot und hot s Lauwat van an Bam oha gfrajssn. D Leit haum an Strieg um an Bam bundn und Oana hot a Schling af d Dred hi'glajgt, sou, daß, wun dos Uaviah an Schritt fiari mocht, min hintan Fuaß hot ahitrettn miaßn. Wias daun souweit gwejn is, hot dea, dea'd Schling glejgt hot, zuazougn und is davou grajnt, da Aunari dea ban Bam gstoundn is hot in Strieg au'gspaunt, daß d Schling nit afgounga is. Dos Uaviah, wias gspiacht hot, daß oughajngt is, hot an Bläara tou, hot si zaumzougn und mit ulla Kroft iahn Fuaß wieda hom wülln. Da Strieg is o'grissn und dea na holn hot, is is Dickarat ahi gflougn. Dos Viah hot noumol bleacht und is sou gschwind wias kina hot in Wold vaschwundn. D Leit hound dejn van Dickarat außa tou und af d Dred glejgt, wal a nit gajh hot kina, houms'n trogn. Va do ou haun is nimma gsehn.

Loungi Zeit danoh hand wieda Aunari kejma, daj ah sou laung do blim hand, bis zan Ajssn nix meah gfundn haum. Daj hand schon a weing aunast gwejn, haumd Pfahl und Bougn ghot und houn a Gruab grom und mit Greisat zuadajckt, daß die Viah ahigfoln hand.

Dahoam am Kubany hot a a boa tausnd Joah koani Leit gsehn und wia a doun wieda amol i sa Wintahiawa gschaut hot, hot a sani Augn nit traut, wos a do gsehn hot. Af an Plotz hand Leit ummatum gaunga und ejtla Hittn haums

afgstellt ghot wous drinn gschlofm houn. I da Mitt, af an Fuierei, haums Fleisch bron und ou'gloat hands gwajn, do hot ma gsehgn, daß Mouna, Weiwa und Kina gajm tuat. D Mouna hand af d' Jogd gounga uda houn schwari Oawat tou und d' Weiwa hand um d' Hittn umma gwejn, haum d' Goiß ghiaht, Bejna broukt, houn af d' Kina afgschaut und Gfüllat gsuacht. Da Schroat is a Zeit doucht blim und hot ihn zuagschaut wos toand.

Oa Mou, ea is a wajng krump gounga, hot af's Fui afpaßn miaßn, daß nit ausgejh duat, wal a recht schwa wieda oas zaumbrocht hot. A Aunara is am Beag oum gsejssn und hot i'd Ajm außi gschaut, va doucht hot a gsehgn wun si draußt wos riacht, oub a boa Viaha umatum rajnnand, uda aunani Leit zan seha hand. Oamol, noh eitla Wouchan, hot dea Mou am Beag oum in a Goaßhändl ahi blosn, s hot tau wia won a drum Viah an Bläara tat und gleich draf hand a boa jungi Mouna, wia d' Wiesl, in Beag za eahm afi grejnt. Ea hot nit uiß vastaundn wos dea za eha gsoat hot, owa sou vüll hot a zaumbrocht, daß i da Ajm traußt, Mouna mit Prigl'n und Staungan, vastajka spül'n, saj sull'n den Mounan sogn, daß gleich hoam kajma miaßn. Die Junga hand, wias ghäacht houn wajgn wos, af ulli Seitn ausanauna grajnt und bold draf hand die easchtn Mouna am Beag oum zan seha gwejn. Saj hound gwoacht bis da Voamau kejma is, a Wal haums daun dischgariacht, bis jeda gwißt hot wos a toa muaß. Za eascht haums d' Weiwa und Kina fuacht tou, va dej a jeds a Binkei trogn hot und saj hand af an Steig in Wold afi. Oum is a Lucka in Beag ahi gounga und do hand Ulli ahi kralt, netta d' Mauna, daj wos mitgounga hand, haum si af die Stoana, daj umatum glejgn hand, hi'gajstz. Int ba da Hittn hot ma nit vüll seha kina, nea, wun ma genau hi'g'schaut hot, hot ma a boa gsehgn, daj si hinta Stauna, Bam uda Stoan vastajckt houn und gwoacht houn, wos die Aunan af da Aim draußt toan. Sej haumd nit loung woachtn miaßn, do hot ma gsehgn, daß a boa va Stoa za' Stoa kralt hand, ounani hand va Staun za Staun grajnt und houn si do vastajckt, saj hand uwal noihata za den Hittn kejma. Wias sou fuchzg Schritt zan Staunan, daj um d' Hittn umma gwogsn hand, hi'kejma hand, hot sou wos wia a Luseha zan Schraj ougfaunga und a Wochtl hot af da ounan Seitn a boamol gschrian. Danoh is do wieda Ruah gwajn bis nua meah zwoanzg Schritt wajg gwajn hand, do hound die Mouna ba da Hittn, af oamol zan Schraj ougfouga, hand va da Dred afgsprunga und haumd Stoana, Pfahl und Stoungan af die Ounan gwoafm. Daj hound

ah zan schraj ougfounga und dajs troufm hot hand liegn blim, die Ounan hound gmoat saj kinatn nou wos griagn und hand weida grajnt bis za die Stauna. Do hots koa Duhkejma gejm, wal Akazi, Broubajna und Hogadoinstauna sou vafülzt und vahaglt gwaj hand. Die Hittnmouna haumd si weida gwiacht, saj hount mit Staungan und Stoan af die Ouna ahi drouschn und gwoafm bis dajn; zfüll. won. is und mit Schraj und Jamman davou grejnt hand. Saj, haumd daj, wos glajgn hand, ah mitgnumma und daun is uiß wieda sou ruahi gwein wia voahea.

Noh ejtla Tog hot dea Mou am Beag wieda is Händl blosn. Nit a sou wias lejtzi Mol dejsmol, gaunz ounast. Dejsmol hand nette a boa Buam zan Mou am Beag afi

grejnt und wia da Voamou kajma is, hot a nea a boa Mouna mit ghot. Af da Ajm draußt hot ma drei Mouna loungsaum af d' Hittn zuagajh gsehn. Wias nähata kajma hand, hot da Voamou gsoat "dajn is sicha s Fui ausgaunga, wal Oana a Fuihittn umma Hols ghäjng hot". Zwej af da Ajm draußt, hand stajh blim und netta Oana, dea d Fuikraxn trogn hot, is bis zan Staunan zuhi gaunga. Doucht hot a d Häjnd i'd Häh ghajbt, daß ma gsehgn hot, daß laa gwajn hand und hot gwoacht bis'n wea ahiweisn tuat. Da Voamou hot za den Oan, dejn a Wülfschloga gnejnt hot, gsoat, ea sull's bringa und dea is gleich gaunga und hot's duh'd Stauna gfiacht. Doucht hands stajh blim und dea kejma is und was wülln hot, is za die Aunan zan Fui gaunga. Ea hot drum bitt, daß a si's Fui ou'zindn deaf, was ihn da Wejdarajgn ausglajsch hot und saj koas meah zaumbringen. Ea is inakniat und hot recht deamüadi um a Fui bitt. Da Voamou hot zan Mou am Fui gsoat, "Fuiwochta zind eahm s Fui au' und tua eham nou a boa Kültana dazua ahi, daß nit gleich ausgeht". Wia d Fuikraxn brunna hot, is da Mou afgstoundn und hot in Voamou a stoanani Pfahlspitzn gajm, hot noumol gwunga und is gounga. D Mouna hand mi'n Voamou ah wieda gaunga und ba da Hittn is sou gwejn wia uwal.

A boa Joha hot da Schroat woachtn miaßn, bis wieda was passiacht is. Do hand af da Ajm draußt a Haffm Leit miahsaum und ülejnt dahea kajma. Hadschadi, b'luatigi und a boa hot ma trogn miaßn. Wias noihata za da Hittn kajma hand, saj houn si nit weida traut, is Oana, dea nou bajßa af die Fiaß gwejn is, weida gounga, hot gschrian und mit di Häjnd gfuchtlit und is ban Staunan stajh blim. Da Voamou is mit zwej Aunan za ahm außi gounga und hot' n gfroat was wülln und oub a hölfm koun. Ea is vull Bluat gwejn und mit an Steckka gaunga, dea hot gsoat, daß iwaffoln won hand und schou seit drei Tog laung davou rejnnand, hiaz kinans nimma. Saj brauhatn was zan Ejssn und a Platzl wous a wajng rogstn kinatn. Saj bitten recht schei drum. Wal wuns koa Hülf griagn miaßn ulli umkajma. Die Mouna va da Hittn hound a Wal, dischgariacht was toa sulln, saj hound si zoumgrejd, daß ba eha bleim kinand, wal, wun saj a amol iwafolln wean, brauhans jen Mou.

Af d Nocht, wias ums Fui umatum gsajßsn hand, hound die Vatriema dazühlt wias gwajn is. "Zescht" hot Oana gsoat, "hand netta a boa Mouna kajma, saj hand recht oha kajma und üleindi gwajn und hound um was zan Ejßn bedlt. Mia houn an nix Oags dajnt, houn ihn zan Ejssn und Tringa gajm und wia ma asou ummatum gstaundn ham, hand die Ounan kajma. Mia haum in Ejgaung gleich zua gmocht, houn, daj ba uns bedllt houn, iwa d Stauna außigwoafm und houn souweit uiß i da Reih ghot, bis daun wiakli ums Lejbm gounga is. Als easchts, haums sis brouwiacht ous unsari Stauna ou'brejtna kinand, wals voa a boa Tog grejngt ghot hot, is nit gounga. Daun houms sis mit Loatan iwa'd Stauna brouwiacht, do houn mas nou o'wiahn kina, wias owa brajnadi Prigl af d' Hittn zan weafm ougfounga houn und a boa Hittn gleich brunna houmt, is mit da Schneit voabei gwajn. Mia haum zaumpockt was gounga is und ham grajnt bis ma nimma

kina houn und wal ma am Wajg za Ajng gwajn ham, ham ma weida gounga und hiatz dan ma Ajng bittn uns zan hölfm " .

Da Voamou, dea zuagloust hot, hot Oan va dajn Vatriema gfloat, wos saj do mocha dan, wuns a ba uns a sou kajma dat. "Maj" hot Oana va sani Leit gsoat, "mia datns schou dapocka". "Woast" hot dea dazühlt hot gsoat, "wun owa d' Hittn wia Zunda brinnand, rauhga tuats sou oag, daß ma die ajnga Leit imma kajna tuat und dia' s Wossa i die Augn ahi treibt, do kaunst nix meah mocha, do hülft netta meha s davou rajnna". "Jo und wuns ba uns ah amol kajmand" hot da Fuiwochta gsoat "wos toan doun mir, ah davou rajnna und wou hie". Da Voamou, dea ah schou drou dejnkt hot, hot in Koupf beitt und hot gsoat, "davou rajnna toan ma nit sou gschwind iwalejgts ajng, wos ma toa kinan, daß uns nit ah sou geht wia den Vajaugtn. Die Hittn miaßnd van Staunan wejg, sou weit, daß mas va auswejni nit ou'zindn koun. Wossa brauha ma, in Foll dou wos brinnt und Stoana, ajwejni ban Staunan, daß mas gleich, wuns a Loatan ou'lejgn wülln, oas am Schääal griagn". Die nächstn Woucha hot ma au'gfaunga uis asou zan mocha wias da Voamou gsoat hot. D Hittn hot ma weida zwan Wold afi gstült, zan Boh, dea in Wold gruna is, hot ma an Grom owaholb va den Hittn gmocht und af da ajwejnin Seitn van Staunan hot ma a Stoamau gmocht. Danoh is Lejbm wia voahea weida gounga. Die Vajaugtn hand iwarol recht gschickt gwajn, haumd mit an Spriagla a Fui mocha kina, haum aus Loahm, Schissln und Sejchta gmocht, dajs, wias drucka gwajn hand, in Fui. brejnnt liaumd. A sou hand a boa Joah umigaunga, die Vatriema haumd si schou guat aj'glajbt ghot.

Es is bold i da Friahe gwejn, netta a wejng grawalat, do hot dea Mou am Beag, mit san Hämdl wieda ahiblosn miaßn und wal uis gounz stad gwajn is, hots sou greisli tou, daß ma foßt a Gäjnschaut griagt hot. Ba den Hittn hots glei zan wualn ou'gfounga, ulli hand zan Fui grajnnt wal doucht d Mouna min Voamou gwajn hand und saj hounwissn wülln wos gajm tuat. Da Voamou hots sölwa nit gwißt und hot zwej Buam am Beag afi gschickt. Nit loung danoh hands wieda kajma und houmd dazühlt, daß i da Aim daußt a Haffm Leit umatum schleihand, nix gnaus hot da Vajda do oum, ah nit gsehgn.

Die Mouna ban Fej hounnd nou gwoacht bis's a wejng Tog won is, doun houmds gsehgn das a boa Leit laungsoum af d Hittn zuagäjngan. Die zwei Buam haumd noumol, am Beag afi miaßn, wal ma va do oum meha gsehgn hot. Sej hand ah gleich wieda kajma und houn ausgricht daß ma va oum ah nit meha siacht, da Vajda moat dej haum sie vastejckt und woachtnd netta bis's uns iwafolln kinan. "Ba uns houms is ah sou gmocht" hot oana va di Nejha gsoat, loßt sis nit aha wal sunst ham ma valoin". Da Voamou hot gsoat, "außi miaß ma, owa wou. dos braucht koana seha und zwaj Mouna miaßnd doucht afpassn, infoll ma davou rajnna miaßn, daß gleich hinta uns zumochan. Die Ounan miaßn doucht af uns afpassn, wal wun daj s Raffm ou'foungan brauha ma gleich Hülff, sunst houms uns gleich daschlogn". Sei hand am hintan Ejnd außi und hand za die Ounan viari gauriga, do hands stajh blim und houn gwoacht bis si va Dej wos riacht. Dej

haum recht dumm gschaut wal, netta drei Mouna außakejma hand. Fimfi hand, oft laungsaum za den Drein hi'gounga und houmd gfloat, ous nit ahi gajh kinatn, wals recht Duascht und Hunga houm und den Oan a Uaojgs foßt umbrocht hot, dejn miaßns vabindn. "Wißt's" hot da Voamou gsoat, dos geht hjt nit, wal unsari gounzn Mouna af da Jogd hand und mia koan ahilossn deafm. " Jo wun dos sou is daun woachtn ma nit loung, pocka mas", hot a gsoat und an Priegl aus'n Föllumhoung außa zoug. Wie die Drei dos gsehgn houmd, hands gleich davou grejnt und die Aunan, dej afpaßt houm, houmd dej, dej ahi wülln houmd gleich a boa Pfal hint' afibrajnt. Schreiat und Jammarat hands liegn blim und da Voamou hot gsoat, wie a wieda ba den Aunan gwejn is, "mia riahn uns nit, hitz miaßnd die Aunan wos toa, wean ma seha wias weida geht". Ea bot a boa Buam zan Händlmou am Beag afi gschickt, oana sull eahm gleich Poust toa wun si af da Ajm wos riacht, wal va oum, siacht ma bejsa dazua. 1 dera Zeit, hand, die Jammadn va den Ounan zaumklaubt und wajgtrogn won. Uis is ruahi bliim und wal da Voamou gsoat hot "mia woachtn" hand ulli ban Fej sitzn blim. Noh an Wal is a Bua van Beag oha kajma, dea hot gsoat, daß ma die Letiachtn hinta den kloan Hiwl trogn hot, wou mas va intasi nit siacht und doucht woachtns" af wos wissn ma ah nit. "I mouaß wieda afi" und wejg is a gwejn. Saj houmd schou, a Wal woachtn miaßn, bis wieda Oana oha, kejma is und dea hot gsoat, "intan Hiwl wualts va lauta Leit und uwal kejman nou meha, da Vajda moat, "saj woachtn doucht af d Nocht".: "Do muaß i schou sölwa nohschou gajh" hot da Voamou gsoat. "Stoading du paßt af, daß uiß ruahi bleibt und wun wos is schick a da an Buam oha". Bevoa a am Beag afi is, hot a d Weiwa und Kina i'd Hühl afi gschickt und d Goiß af d Beagwoid, daun is a recht, nohdajkli afi gounga, Wie a afi kajma is" hot da Hänlmou gleich za eahm gsoat," woaßt Voamou dos host gsckickt gmocht. hiaz wissns nit wos toa sulln, woachtn bis ulli do hand, uda gleich uns iwafollen. Saj wissn nit wiavüll dahoamt hand, i bin wiakli neigiri wias weide geht". "Hitz miaßn ma woachtn wos dej toan, oft kinan ah mia uns wos iwalejgn" hot da Voamou gsoat und daun haums gwoacht und gschaut wias af da Ajm daußt weida geht. Sej houm nou a schejs Wal woachtn miaßn bis si af da Ejm daußt wos griacht hot. Zeascht houms zwej Haffm gmocht und daun is da Oani rechts und da Ounari links gounga. "Du" hot da Hänlmou gsoat, "daj wülln uns va ulli Seitn pocka, wos toan ma hiaz". "Woaßt daj rechts kejman", hot da Voamou gsoat, "brauha ma nit fiachtn. bis daj duhn Wold und duhs Moa kajman, mißn ma mit den Ounan fiachti sa". Ea is schnöll wos a kina hot in Beag ohi.. Doucht hot a gsoat, ea braucht a boa, daj guat rejna und ah min Pfahl guat hand. Doun hot a noumol a boa braucht, dei mit eahm gajh sulln und ah daj sulln ihari Pfal mitnajma. Die Ounan blajm do und bewochtnd d Hitten. Van a Hittn hot ma a Trum Oigsnhändl und ejtla Kuahhändl außa brocht, in Fuiwochta hot a's Oigsnhändl gajm und hot gsoat "wun wos passiacht und wuns uns brauchts, blos sou stoack wost kaunst, oft kajma ma, mia ham ban Bajnbam oum".Ea hot die aunan Händl nou vatolt und is mit sani Mouna gweags du'n Wold bis zan Bajnbam afi gaunga. Doucht haums gschaut ous van

Reiwan wos seha kinan und wals neamd gsehgn houmd, hot a daj mit die Pfal i'd Stauna, daj hunat Schritt i da Ajm daußt gstaundn hand gschickt. "Ajs woachts owa bis mia min Blossn, und dej draußt zan raffm oufoungan, ma woäß nit, wos dajn uis ejfoln duat". A schajs Wal houms woachtn miaßn, bis da Haffn i da Mitt va da Ajm dahea kejma is. Saj hand zaescht loungsoun gounga und houmd nit gwißt wia weit wos gejh sulln. Wias af da Häh va den Hittnleit gwajn hand, houmd daj in Wold drin mit den Kiahhändln, zan blossn ou'gfaunga, daß ma gmoat hot, da gaunzi Wold is vüll Uaviaha. D Reiwa af da Ajm daußt, hand wia a Hajfai Ülejnd banouna gstoundn, saj houmd, nit gwißt sullns davou rajnna, sullns in Wold ahi uda sullns weida gajh wia wun nix gwejn wa. Ma hot neamd gsehgn und s Blossn is ihn schou zwida won. Do hot da Ou'fiahra 'gschrian, ",Mouna kajmts hitz pocka mas". Ea hot in Prigl i'd.Häh ghajbt und is in Woldrouft zuagsprunga. Ea is nit weit kejma, do hot a an Pfal in Oam und oan in Fuaß drinn ghot. Den Ounan is nit bajßa gaunga, va voirou und va hint hand Pfal dahea kajma und es hot nit loung daucht, do houmd a Boa d Häjnd i'd Häh ghajbt und afgajm.

Wias sou weit gwajn is, hot da Voamou za sani Leit gsoat "hitz miaßn ma sou gschwind wia mägli za den Hittn umi, zwej daj guat rejnna kinan bleim do und sulln schou wos daj daußt toan, owa nit raffm, wuns ozuign kajmmts gleich no". Ea is mit sani Leit za den Hittn umi, wal'a nua a boa Leit doucht lossn hot, hot a koa guats Gwissn ghot.

Wia d Hittnmouna zruckkajma hand, is uiß ruahi gwajn und da Voamou hot gleich a boa Buam in Wold zan Mooa umi gschickt, sei sülln schou wos die Reiwa toant, "owa bleibts banouna und loßt's ajng af koa Rafarei aj" hot a in ougchoft. Es hand sejgsi uda siemi gwajn a jeda hot si' an Prigl gnumma und wia Kotzn hands vaschwundn. D Mouna haumd jo nix toa kina, netta woachtn, sei hand ums Fui umma gsajßn und houn si' ausgroßt, saj hand recht mod gwajn und zoani, wal ma eha koa Ruah loßn hot. Es is schou in Noumittog zua gounga, do is a Bua van Beag oha kajma dea zan Voamou gsoat hot, "da Vajda loßt ausrichtn, daß die Reiwa, daj du's Mooa duh houn wülln, umkeacht hand, saj houmd uiß zaumpockt, houmd ella trogn miaßn, daj nimma gajh houmd kinna, recht loungsoun und recht zrupft gounga hand. Ea moad daj kajman nimma". Hiatz hot ma gmiakt, daß da Voamou ah recht mod gwajn is, ea is nit afgstoundn wia a in Buam zan Weiwan afigschickt hot, saj sulln oha kejma.In Schroat hot dos nimma gfoln, wia d Leit sou wüld sa kinnan,tuan Leit daschlogn wia wuns nix ounast zan toa hän, dabei hots sou vüll Oawat gajm, wia ma ba die Hittnleit gsehgn hot. Nit amol d Viaha hand sou habgiari gwajn, frali houms ah mitanauna graft und ihan Plotz behaupt, owa wajgn dejn oa hi'mocha dos hots netta ba die Leit gejmn.

Wejgn dejn, is a ah wieda i sa Hoamat in Bähmawold zruck gounga. Doucht hot a sa Ruah ghot und ea hot in Hosn und Rehn zuaschau kinna, wias mounchmol recht fiawitzi umatum gsprunga hand, a boa Hiaschn hots ah schou ghot und ah a boa Bäan., daj den gounzn Winta gschlofm haumt Er hot si ninatzt vastajcka miaßn, wals koani Leit gajm hot und sou hand Johre vagounga, do hot a gspiacht,

daß a kloaweis wieda i'd Nirwana, dos is d Ewigkeit umi muaß. Oune nix hot a ea nit lajb'm kina, va Zeit za Zeit hot a do umi miaßn, bevoa sa Mum goa won is. Es hot do ajnt nit loung daucht und af da Wölt hand netta a boa tausnd Joha umi gounga, bis a wiada zan Kubany zruck kejma is. Uiß is ounast gwejn und foßt hät a sie nimma auskejnnt wun a nit in Kubany und in Arba und weida int in Pläcknstoa gsehgn hät, hät a nit gmoat, daß a dahoamt is. Iwaro1 hand Heisa gwejn, koani Hittn wia daj, daj a seithea kajnt hot. Hajsja daj gmaucht gwajn hand nd groß mit an Stoll und an Sto'l und Viaha, Kiah und Kejwl, Sai und Hejna. Leit hand umatum grajnnt, saj hound jo souvüll Oawat ghot mit Stoan und Wuazln ausgrom, mit'n Grama, daß Wossa orinna hot kina. Gschwitzt haums, daß d' Schaltihl gaunz noß gwejn hand und in Wold haums Hulz mocha mi'aßn, wals a boa Kreiza braucht hound. Saj hound die schajn großn Bam außa gschni'n, gounzi Flejck hot s ghot wou nua meha Krajßlina und Bamstajck gwajn hand. Mit die Joah is doucht Gros gwogsn, ah Roitbejn und Malinastauna. In Fruajoha hound d' Weiwa va die Schläjg, sou hot ma za die o'ghulztn Flejck gsoat, s Gros zaumgsicht, in Koa hoam trogn und vafuadat. Iwahaupt haum d' Weiwa, sou wias da Schroat kajnt hot, um d' Hittn wos tou und daj hiaz hound uiß mocha miaßn. Af d Kina afpassn, s Viah fuadan und am Föld und af'm Wiesn die meist Oawat toa. D Mouna hound miaßn in Wold Hulz mocha "wal da Fiascht ela braucht hot und da meist Grund nouh eham g'häacht hot. Dos hot da Schroat sou gloaweis außabroctit, wia a a zeitlaung wieda am Kubany gwejn is. Frali hots eahm hiaz nimma sou gfoln wia voahea, ea hot sie ban Tog goanit zan fuachtgajh trauf, wal oamol hät ea beinoh a Wei, wos am Woldrouft diari Stejwl zaumglaubt hot, zound trett. Ea hot an Stebei zaugschaut wias Wei schreiat und sou gschwind wias kina davou grejnt is. Sie hot d Stejwl und s Strickl, mit dejn si's zoundbindn hot wülln, liegn lossn und is, wia wuns hulischi Fui hinta iha hea gwajn wa, davou timmlt, Seit deara Zeit hot da Schroat bajßa afpaßt und hot sih ban Tog nimma seha lossn.

D Susi Moam is's gwajn daj a bold zoundtrett hät und daj hot dazühlt, daß iha a Mou in Wold ban Stejwl zaumklaum wos hät toa wülln. Wuns nit sou schnöll rajnna hät kina, wea woäß wos passiacht wa. "Es is a grausliga Mou, hot roidi Hoaa, vastruwlt und zoudat, an vafülztn, launga Boacht und Augn i daj ma nit ahi schou kou, oughot hot an rupfan Eadäjpflsoog ba dein da Hols und d Iamml ausgschnien gwajn hand, i da Mitt hot as mit a Spogotschnua zoundbundn ghot".

"Maj" hot da Pawli Ignaz, wia da Wajdinga dos in Wiachtshaus dazühlt hot, gsoat „ma heacht uwal wieda wos van Woldschrajck, es sull da Woldschroat sa, dea äjfta wou gsehgn wiad. Va die Viahhouhdla wiad dazühlt wia's van Bayrischn hoam gounga hand, houms sa si sou zgriagt, daß zan raffm ougfaunga hound. Wia da Oani daun a Majßa van Stiefl außazoug hot is da Schroat dawischn gounga.,ea hot ihn Käjpf sou loung zaumgschlogn bis wiedagscheit won hand, wal nix

Schlechts hot ma van Schroat bis Hajt nit ghäacht. In Schroat sölwa hot dos jo ah mit g'foln und wal mea Däafa und Leit won hand, hot a si' ban Bläcknstoa a



Platztl gsuacht Do hots koani Heisa gejm und bis za da Wulda ohi is lauta Wold gwejn, netta va Salnau ohi zua hots a boa oazölmi Heisa ghot.

In Schroat hots do oum recht guat g'folln und mounchmol hot'n d' Neigia bis af Schwoazboh ohi triem. Oamol is a Noumittog schou va sana Bleib wajggounga. Er is am See in Haung ohi und iwa Nejoufm, gweags bis Houßnreit und iwa d' Wuldabruck umi gaunga. Es is schou Nocht gwajn, ninatzt hot meha a Liacht brajnt und drum is a am Wajg iwa d' Stum af Schwoazboh zua ohi spoziacht. Wal da Mouäjhl netta a bißei chajt hot, hät'n sou leicht nit wea seha kina und ea hot ah koa Aungst wajgn dejn ghot. Wia'a sou duh d' Wiesn und Földa dahi gounga is, hots eham sou g'folln, wal uiß sou soafti und frisch do gstaundn is, ea hot, si' nit gnua driwa wunan kina. Eascht wia a, daun ba an Ocka Hooa voabei kejma is, hot a a Wal stajh bleim miaßn, souwos hot a nou ninatzt gsehgn. Blaulad hot a ban Mill' Liacht van Mouäjhl gleicht und, wal a kloas Lijftei gaunga is, hot a Wöllna gmocht wia da See in Wold oum. Sou in umatum schou siacht a an junga Mou am Wajg dahea kajma, af d' Seitn gajh hot a ah nit wülln und drum is a gounz ruahi am Wajg weida gounga. Da jungi Mou, es is da Veicht Loarejnz gwajn, is nit guat afglajgt gwajn, wal'sn in Mugrau van Tounzboom, wou Kiachta gwajn is, außi gwoafm houmd und ban raffm daußt af da Gostn hot a nou ella aj'stejcka miaßn. Wia a in Schroat gseha hot, is eahm da gounzi. Zoan wieda afi gstiegn. "Du kimmst ma grad recht" hot a sie dajnt "du bist sicha ona va dej Bazi daj ou'stäjndigi Leit zoum schlogn, dia zoig is amol wia schei dajs is und wia guat wos dos tuat". Wia a ba eahm gwajn is, hot a eam gleich ulli zwou Fajst is Gsicht hou willn, ea hot'n owa nit droufm, wal da Schroat an Schritt af d' Seitn gounga is. "Du Feiglin bleib stajh" hot a gschrian und hots noumou1 brouwiacht, hot owa wieda danajm g'haut, wia a noumol zuahou hot wülln, is da Schroat nimma af d' Seitn gounga, ea hot'n um d' Mitt .gnumma und i'd Häh ghejbt, hot'n sou fejst zaumdruckt, daß a koa Luft meha griagt hot. "Hiatzt geh hoam" hot a nou gsoat, "und schau da d' Leit ou, mit dajnst raff'm wüllst". Da Loarejnz hot in Koupf häjnga lossn und hot gsoat "Vejda habts ma nit hab" und is schoumad hoam gaunga. Da Schroat hot ah gnua ghot und ea hot si' loungsoum am Wejg hoamzua gmocht. Sou in dahi.' gejh hot a sinniacht, d' Leit hand ah nit bejßa wia d' Viaha, wun d' Hiaschmandl ihari Zeit houm, raffns ah und lossn koan Ounan za ihari Weiwa hi' und ah ba di Wüldsäj is asou, jo mej, wulns hult a Natuatrieb is, dagejgn n ma, nix mocha.

Ejtla Joha hand umigounga, do houms intaholb van Hochficht a Gloschijttm gmocht, in Schroat hot dos nit weida gjuckt, wal doucht hi' is a eh nit ouft kajma, umatum is nua Gmous und Mooa gwejn und ea hot nit geen noßi Fiaß wülln, meistns is a i'wan See zan Reischlbeag umi, iwan Hochficht bis zan Bäänstoa ohi gaunga. Do hots sou schejni Platzl ghot und ea hot is Boarische und af s' Ästareichisi außi gsehgn, af da ounan Seitn is Bähmische ahi.

Am schejnan is in Summa gwejn, do houm d' Koonfölda va die grean Wiesen guldgölb außa gleicht und da Wold, afm Bugln und Beagn is dunklgrea und haundsoum, wia "wochat" driwa gstaundn. In Summa ban Koonschnej hand ulli

Leit af den Földan draust gwajn, drawi is ihn gounga, wal ma jo nit gwißt hot wia lounq dos scheini Wejda holn tuat, gschwitzt houms, iwahaupt d Kina, daj die gouzn Goarm zoum bindn houm miaßn. Uwal wieda houms af d Sunn afi gschaut, ous nou nit bold Nocht wiad. Duascht houms ghot und s Kanei min Wossa, is schou gaunz woam gwajn, s Kreiz hot weh tou und uwal wieda is a Reih drou kajma, mah' ausnajhma und bindn bis af' d Nocht zan hoamgajh gwejn is. D Mouna houmd danoh nou mandln miaßn. S Koon, wos am Voamittog nou sou schej Gleicht hot, is af d Nocht schou gmandlt afm Földan gstaundn. D Hosn, daj in Koon iahri Nejsta ghot houm, haumd sie oag gwunat, daß af oamol wajggwejn is und saj houm si' in Howan an Plotz gsuacht, do houms nou a Walei Zeit ghot bis dea wejg kejma is.

Die Zeit is jo sou gschwind ummi gounga, d Glosmocha intaholb van Hochficht, haum schou s meisti Hulz bis zan Reischlbeag vabrejnt ghot und houmd ougfounqa in Wold bis af 'd Olm afi zan o'schlogn. Es is sou am Oufang van Hiascht gwajin, do hot da Schroat wieda Lust ghot af Scliwoazboh zan gejh, ea hot seha wülln wos do int Neigs gajm tuat und is noumittog lounqsaum zan See, ohi gstiegn. Wia uwal is a ouwaholb Nejoufm, do hots netta a boa Heisa ghot, duh' d Bäankoupfau af d' Bruck va Houßnreit zua gounga. Wal d Glosmocha, daß da Wajg i' d Plou, dajns ba an stoackn Rajgn, uwal iwaschwajmmt hot, foahn haum kina, haums miaßn an Duhlaf mocha und hiaz hot ma va da Bäankoupfau, iwan Bodawold und Beagl af Houßnreit obi gejh kiria.

Dejsmol is a owa nit do ohi gounga, ea hot iwan Gloucknbeag und iwa Uabachl af Schwoazboh umi wülln, drum is a ouwaholb va da Gloschittn, duhs Bänlouh gaunga. Wia a ba Stajgnwold int gwajn is, hot sie lounqsaum d Sunn zan intagajh gricht, es is owa nit finsta won, wal da Mouäjhl schou groiß und leichtat iwa Wulda gstaundn is. Va Stajgnwold bis Uabachl is' nimma weit gwajn und wia a doucht gwejn is, haumd nou a boa Mouna Toaf gstoucha. Oana hot min Grobscheit an neiha Stih ougfaunga, zwaj houmd nou. min Toafmejssa Ziagl gmocht und Oana hot min Toafkara gra'lt, a sou hot ma gsoat wun d Toafziegl zan drickan af d Seitn gfoahn won hand. Danoh hot mas nou stessln miaßn, dazua hot ma kastln gsoat, wal die fuchzejh Ziagl dej; ma gstesslt hot, Toafkastl ghoißn houm. Da Schroat hot den Mounan zuagschaut wias sou fleißi goawat und nit rechts und links gschaut haum, bis doun a Wei gschrian hot "wüllts nit hoam gaj, bleibts iwa d Nocht.do"? "Jejßas" hot Oana gsoat, "ma, Wei, wia spat is's dejn schou, woäßt i houn koa Uah dabei". "S Gebetleittn hobts is nit ghäacht" hot dej gsoat "es is' schou bold najni". "Kati" hot a Ounara gsoat, richt d' Suppm hea, mia kejman gleih, mia rouman s Weackzeig wejg". Es hot nit lounq daucht. D Mouna houmd, uis i' d Hittn trogn und .hand da Kati nochi gounga.

Am, Toafstieh is a Ruah gwejn, foßt wia i da Kira. Da Mouäjhl hot weide gschajt, netta a boa schei'wajda Wulkan hand iwan schwoazn Wold van Hochficht gschwumma und a Mousgoas hot af da Wies nejma Wold gmegazt. Noh an Walei is's in Schroat sou iwakejma, daß a 's Toafstejcha brouwian kinat. Ea hot sie va da

Hittn a Toafmajssa gnumma und hot zan Stajcha ougfonga. In Oufaung is nit guat gounga, wal a amol zhoi uda ztuif ahi kajma is, i da Seitn is's bejßa gounga, do hot a dazua gsehgn und wun mounchmol a Wuazln drinn gwajn hand, hot a oachtendli drucka miaßn. Wals eham loungsoum loungwali won is, hot a's Toafmajßa i'd Hittn ahi tou und is am Wajg af Schwoazboh weida gounga.

Da Wajg is domols duhn großn Wold gounga, dea van Gloucknbeag bis Wulda ohi und bis Houßnreit afi, gounga is. Da Schroat hot iwa Ejgatschlog af Schwoazboh gejh wülln und wia a a Zeitloug gmatli duhn Wold gaunga is, häacht a an kloan Buam schrei, "wou bist dein, Voda, Voda" und a Dianei hot recht heazhoft gwoat. Ea hot nit weit gajh braucht, do hot a die zwoa Kina najna Wajg in Gros sitzn gsehgn und wie a doucht gwajn is hot as gfroat, wos do toan und wajgn wos s Dianei sou oag woat. "Vajda" hot da Bua gsoat "mia haum in Vodan gejngajh wülln und hiaz findn ma nimma hoam und s Annei is schou sou oag mod und koun nimma gajh. und fiachtn toan ma uns ah". "Wou gheachts dejn hi' und wou is' ejnga Voda dahoamt" hot da Schroat gfroat. "Dahoam ham ma in Biarajahsl und unsa Voda is' da Biarasepp und unsa Heis1 is' am Wajg af Wulda". Da Schroat hot iwalajgt wou dos sa kinnat, ea hot si jo do int ah' nit auskejnnt, ea hot schou gwißt, daß ma wou af Wulda ohi kimmt, owa wos fia a Wajg dos sa sull? Den Kinan hot as nit sogn kina, daß ea ah nit woäß wia as hoambringa kou, "wißt's Kina mia miaßn zruckgaj und danoh wean ma schou hoam findn". "Vajda" hot da Bua gsoat "s Annei is' schou mod und koun nimma gajh, kinnts is nit am Oam najhma". Da Schroat hot a Walei nit gwißt wos a toa sull, ea hot nia drou dajnt, daß a, a kloas Dianei in Oam najhma miaßat" Owa wal da Bua wieda gsoat hot "Vajda kinnats sis Annei nit trogn, si is jo goa nit schwa" hot a gsoat". "Jo frali i trogs schou hoam" dabei hot as laungsoum va da Dred afghejbt und is froih gwajn, wia as am Oam oum ghot hot. er hot gmoat, ban, i'd Häh najma tat's eham brejcha. S Annei hot gleich in Oam um san Hols glajgt, hot eham s Gsicht gstreichlt und hot sie doun gaunz fajßt za eham zuhi kuschlt. Es hat nit lounge daucht doun hots fajßt gschlofm, si is jo recht mod gwajn. Da Bua is' a Walei najma Schroat gounga, daun hot a sej Häjnd gnumma. hots a wajng druckt und hot si' weisn lossn. Sou hands loungsoum am Wajg noh Ejgatschlog dahi gounga. Wias zan Wejg dea af Rotschlog geht, kajma hand hot ma va da Wei'n gsehgn, daß a boa Mouna mit Lotenan schreiat daheakajman, wia wuns wos suaha tan, "Vajda hot da Bua gsoat, "daj kajman, uns zan suaha, ma Voda is ah dabei". "Hiaz rajnn schnöll" hot da Schroat gsoat, "daß nit weida suaha miaßn, loß ma owa in Rouck do, daj brauh i." Da Bua hot in Rouck o'zougn und hot'n in Schroat gajm bevoa a za di' Mauna grejnnt is und "Voda, Voda," gschrian hot. Wia a bei ihn gwajn is haums'n gleich gfroat wou a herkajma tuat und wou a's Annei hot". "Wißt's" hot a gsoat "da Vajda van Wold, da Woldvajda; is mit uns gounga, wal ma nimma gwißt houm wous hoam geht, und wal s Annei schou oag mod gwajn is, hot as trogn und hiaz woacht a am Wajg wous af Schwoazboh geht". Wias hi' kajma hand is's Annei am Rouck in Gros glejgn und hot gschlofm, van Woldvajda

hot ma weit und broat nix meha gsehn. A wia da Bua "Vajda, Vajda " gschrian hot, hot si' neamd gmöld. Saj houn s Annei afg'hajbt und hand froih gwajn, daß d Kina wieda hoam kajma hand. D Mouna, daj suaha ghulfm houn hand ulli zan Biaresepp mit gounga, saj hound häan wülln wos ihn da Franzl, sou hot da Bua ghoißn, dazühln kou. Da wal hot d Muatta, s Annei i's Bajtt brocht, sie is ah neigiri gwajn wos' zan häan griagt.

Da Franzl is ba san Vodan af da Schoiß gsajssn und hot zan dazühln ou'gfounga. "Wißts Voda mia houn ajng gejng gajh wülln, i woß jo wous ajs oawatn toats und wia d Muatta Gros gmocht hot ham ma fuacht gounga. Mia ham am Buglwajg afi zan großn Stoa, wal owa dea nit kajma is, ham ma weida und weida gounga und uwal is a nit kajma. Wia s Annei mod won is houn ma a Walei grost bis ma wieda weida gajh houn kina. Mia ham weida gounga bis ma za an Wajg kajma ham, do houn i nimma weida gwißt. S Annei hot ah nimma gajh kina, do ham ma is Gros innagsajßn und houn gwoacht bis wea kimmt. I houn uwal wieda gschrian, ghäacht hot mi owa neamt bis daun da Woldvajda dahea kajma is und uns mitgnumma hot". Da Simeivajda, dea ah i da Stum drinn gwej is, dea hot'n gfroat. wos dajn da Woldvajda ou'ghot hot und "wia hot a dajn ausgschaut, wun ba da Nocht Oana untawajgs is, hoißt dos meist nix Guats". "Wißts" hot da Franzei gsoat, "ou'ghot hot a foßt nix, netta an oln Eadäjpflsock, dea am Koupf und in Iamln ausgschni'n gwajn is, i da Mitt hot an mit a Schnua zaumbundn ghot, Huat hot a koan afghot und boafiaßi is a ah gwajn. Meha koun i ajng nit sogn wals in Wold schou oag finsta gwajn is". D Mouna houn a Wal nohdajnt wea dos gwejn sa hot kina, bis da Biastlin Adam gsoat hot "Mouna dos is da Schroat da Woldgeist gwajn". "Na" hot da Franzei gsoat "Geist is's koana gwajn wal as Annei trogn und mi hoamgweist hot und dos koun koa Geist, d Geis'ta kinan nette d Leit schrajcka und grausli schraj und dos hot da Woldvajda nit tou".

Wia da Schroat alloa gwajn is, hot as Annei am Franzei san Rouck i's Gros ahi glajgt und wals nou sou guat gschlofm und sou u'schuldi und liab ausgschaut hot, hot a iah afs Hian nou a Bussl gajm miaßn, bevoa a schljani af Schwoazboh zua gounga is. Wia daun najma Wajg a boa Stauna gstoundn hand hot a si' do vastejkt und hot gwoacht wos do weida passiacht, ea hot in Buam "Vejda, Veida" schrej ghäacht, hot si' owa nit gmöld und wia sis Annei afg'hajbt und is Haus ahi trogn houn, is a iwa Schwoazboh recht nohdajkli hoam gounga. "Wejgn wos" hot a si' dajnt "rajnna d Leit va mia davou und Kina haumt goa koa Aungst va mia, hand zuatrauli und sougoa liab, Vajda hot da Bua gsoat und danoh a Woldvajda, wia recht a do ghot hot" Johare hand seit domols vagounga bis a wieda amol do ohi kajma is. Es is Summa gwajn und d Kina haumd Ferien ghot. Da Schroat is am Bäänstoa gwajn und hot iwa d' Wulda hoam gajh wülln Ea is va da Schajnajm af Wulda ohi gounga und hot daj Kina seha wülln daj a oamol hoam tou hot. Va Wulda is a an Hiwl afi gounga und va da Ajm hot ma schou af d' Heisa va Rotschlog umi gsehn. Va Wulda bis do afi und nou a bissei ohi, is domols nou Wold gwajn und wia da Schroat do außi kajma is, hot a gsehn, daß af da

Hoihwies najma Woldrouft, a Bua sani Kiah hiatn tuat. Loungsoun is a do umi gounga und wal da Bua gsunga hot, is a stajh blim und hot ahm zuagloust. Noh an Walei hot'n da Bua gsehgn is van Stoa af dejn a gsejssn is, afgstoundn und is za eahm hi' gounga. "Woldvajda" hot a gsoat "siacht ma ajng ah wieda amol, es is jo schou souloung hea seits uns hoam brocht hobts. S Annei tat si' ah recht gfrein wuns ajng wieda seha tat, hajt is nit mit gounga wals mit a boa Majscha Roitbejn brouka is,do in neiha Schlog hands schou guat zeiti"."Jo frali is's schod" hot da Schroat gsoat"wuns do gwejn wa, is da nei'i Schlog weit va do wajg, i mäjchats schon geen seha, wia groß wos schou is, du bist jo ah seit domols, schou a große Bua won". "Vajda wuns do am Viasaum weida gehts, kajmts schou hi', ajs kinnts nit ia'gajh und vafölln kinnts is ah nit", hot da Bua gsoat. "Pfiat ajng Goutt und kajmts wieda amol voabei", "Pfiat die" hot da Schroat gsoat und is, wia da Bua gsoat hot, am Woldrouft zan neiha Scillog umi gaunga. Eascht is's a wajng afizua gounga, oum af da Ajm is netta wülda Sejngbam und Biaschtlin gwogsn, dazwischn roida, gölwa und blowa Gugaza. Ehrnpreis, Lunga= und Johanneskraut. Hummln und Lusina hand umatum gflougn und a Learei is in Kroas, singat und fluigat uwal häha kajma. Ban weida gajh is a tuh a Gstaunarat kajma und do hot a gsehgn, daß do zeitigi Roitbajn gwajn hand, tuhs Gstaunarat hot a nou duh miaßn, bis a wieda am Wold.rouft weida gajhi hot kina. Es is nimma weit bis zan neiha Schlog gwajn, iwa seha hot an ah nit kina, wal koani großen Bam meha gwajn hand, nua kloani Gräjseian. Wia a'hi kajma is hot a d Majscha schou brouka gsehgn und ghäacht hot as ah, wals dazühlt und dabei ouft glocht houn daß a Frejd zan zualousn gwajn is. Da Schroat hot si af an Stoa hi'gsejssn und hot den Majschan a Wal zuagschaut bis van Wo!d a Bää außa kajma is, dea hot ah mit sejn Mal Roitbejn broukt, sej hand hult sou siaß und sou roit gwajn, wia a d Majscha gsehgn hot, daj eahm d' Roitbejn nejhman, hot as vajauga wülln, ea hot an Bläara tou und is loungsoun af sej zuakejma. Wia na d Majscha ghäacht houn, hands gleih davou grajnt, netta 0ani dej ba na Staun a schajs Platzl ghot hot, is sitzn blim, wals n' nit gsehgn hot und af daj is da Bää brummat zuagounga. Wias'n gsehgn hot, is va lauta Aungst gounz steif won und hot si nimma riahn kina. Wia da Schroat gsehgn hot, daß da Bää kiazngrod af dos Diane: zua geht, is a van Stoa afgstoundn und sou schnöll wos a kina hot in Bään entgajgn gounga und hot eham in Wajg vastüllt. Da Bää, wia a in Schroat gseha hot , is afgstoundn und hotn wülln mit da Totzn af d Seitn drucka, do hotn da Schroat ou'pfaust "gsch, gsch, geh fuacht, du host do nix valojn, gsch, geh schou". Wia da Bää dos ghäacht hot, hot a min Koupf beitt is af die via Fiaß ohi gsting, hot si' umdraht und is loungsoun zan Wold zruck gounga. Da Schroat hot eham nochi gschrian wal a goa sou loungsoun vaschwundn is,"i wüll di' do nimma seha" dou is a zan Diane hie gounga, hot iha ban afstajh ghulfm und hot za iha gsoat, "braugst da nit fiachtn, dea kimmt nimma, maj hiaz host da die gounzn Roitbejn ausgschitt, dos mocht owa nix, i woäß an Plotz do hand ella und zeiti hands ah'. Ea hot's Häjfal van Roitbejndoschat afghejbt und is mit iha zan Gstaunarat zruck gaunga. "Sog a

amol, wiast hoißt und wajms'd ghäast", hot da Schroat gfroat. " I bin d Anna und da Biaresepp is ma Voda" hots gsoat "und habts ajs nit da Woldvajda, da Franzl hot ma va ajng schou ella dazühlt. I bin jo domols nou sou kloa gwajn, daß i nix meha woäß". "Jo sou du bist d Anna, di' hät i nimma kajntt.groiß bist won und zaumgwogsn host di ah, bist a schejs Diandl. won". Sou ban rajn hands za die Roitbejn umi kajma und wal da Schroat ah proucka ghulfm hot, hot d Anna gsoat "Vajda mia najhman netta die zeitin die Ounan loß ma nou stajh". "Frali" hot da Vajda gsoat" wuns nit zeiti hand, hands ah goa nit siaß, do kajn i mi schou aus". Za Zweit houn's is Häjfal bold vull ghot und hand zan Franzl umi gounga. Dea hot schou gwoacht, daß a hoamtreim hot kina, die Zeit is ah schou do gwajn und da Schroat hot ah hoam miaßn. Pfiat.ajng Gout Kina" hot da Schroat gsoat und bevoa die Zwoa wos sogn houmd kina is a in Wold vaschwundn gwajn.Ea is nou nit lounng fuacht gwajn, do hot ma d Hansl Resi af d Hoihwies afi rajnna gseha, boafaßi, fost koa Luft hots meha griegt, wals goa sou schnöll grajntt is und wias oum gwajn is hot's netta außa brocht "is d Anna ba dia, mia houn a sejchani Aungst ghot, wals mit den ounan Majschan nit hoam kajma is, houn ma glaubt da Bää häts gfrajssn. Gout sei dounk daß ba dia is". "Jo woäßt Resi" hot d Anna gsoat "ums Hoa hät a mi ah ghot zan Glick is da Woldvajda dahea kajma und dea hot'n vajaugt". Ban hoamgajh hot da Schroat sinniacht, wejgn wos a Bää do ohi kajma tuat, wou dou's Bähnlouh da scheinstei Plotz fia saj gwajn is. Dickarat und Windbruh, a Stoawöldnis, daj va da Ajm bis am Hochficht afi gounga is, dazwischn Auwiesn und Mooa, wou metahoiha Foam und Schwowazbejndoschat gwogsn is. Sou oafoch geht va do oum koana fuacht, vülleicht is a z' habgiari uda z'raflusti gwajn.

In Rotschlog is s Lajm weida gounga. D' Joha hand schnöll vagounga und d Kina hand groß und grässa won. D Oawat is ah uwal meha won und ausgschaut hots, wia wuns sou weida gajh tat. Plogn houn si d' Leit nimma sou braucht, uiß is a wejng leichta won. Da Franzl hot gheirat und s Dahoamtani iwanumma und d Anna hot Heiratn wülln, d Scheingung hots ghot und af d Woucha is Trauung gwajn. D Weiwa, daj Buda, Möhl und Oi zan bocha fia d' Hoizat brocht houn, houmd zan Schnodan nou a Hejfal Kafee trunga und zan brouwian, die easchtn Kropfm, an Stritzl uda an Stru'l griagt. Zan Hoamgajh is d Anna mit ihra Tafgoudin, daj in Ejjgatschlog dahoam gwajn is, a Stickl in Bugl afi mitgaunga. Zwischn Rotschlog und Ejjgatschlog hots nou Wold ghot und af da Ajm hot d Anna "pfiat Goud" gsoat und is zruck gounga. Am Hoamwajg hots awal drou dajnga miaßn, wias min Wastl zaum kajma is. Majgn hots n jo eh schou uwal und wia iha Voda gsoat hot, dos wa a Mou fia di, hots nit na gsoat. Ea hot wos ghot, is zan Viah und za die Leit guad gwajn, is uwal i d Kira gounga und hot nit raffm und strein willn. Frali hät a ah, a kloas bißei Schneid hom kina. Ah a bißei an Mum, sou wia ounani Mouna, wou ma gsehgn hot, wun ihn da Bitzl in Gouda afi gstiegn is, wun's d Pfoadiaml afkrejmplt und koan Tejfl gfiacht houn. Dos hot ma ban Wastl, wun ma a nou sou gsuacht hätt, nia gfundn. Wias sou dahi. gounga is., hots

af oamol in Woldvajda najma Wejg af an Stoa sitzn gsehgn, wias za eham hi' kajma und "griaß ajng Goud Vajda" gsoat hot, is a afgstoundn hot "griaß die ah" gsoat. "I woäß du wüllst in Wastl heiratn, do griagst an guan Mau, dea af di ah afpaßn kou". "Wißt s Vajda" hot d, Anna gsoat "sou wa ea schon recht, netta a wajng a Schneid miaßat a schou hom". "Woäßt Anna" hot da Vajda gsoat, a Schneid. wos is dajn a Schneid, wun a boa wajgn rix und wieda nix raffm bis ihn s Bluat van Mal und va da Nos oha rinnt, najnt ma dos a Schneid. Wia da Wastl a kloana Bua gwajn is und Oa raffm gsehgn hot, dajns Bluat iwas Gsiclit ohi grunna is, hot a moat saj daschlogn si und gounz daschrajckt und bajwarat is a hoam grajnt. A boa Tog liot a braucht bis ma ehams ausrajn hot kima., daß netta grafft houn. Seit domols geht da Wastl jen raffm ausn Wajg und wennst moast, daß a wajgn dain a Feiglin is, wüll ah da wos dazühln, wos i sölwa gsehgn hou. I bin domols zweit wajg gwajn und houn nit hölfm kina. Da Beaghiasl hot najma Wold mit die Rouß gajgt, af oamol hot d Rouß wos gschrajckt und saj hand wia wüld davou grajnt, da Hiasl is mit die Fiaß an da Aiggn häjnga blim und saj houma hint nochi zoug. Die Biaraleit houmt af'm Ocka Stoan o'glaubt und hound gsehgn, wia d' Rouß schnua grod afs Gstoanarat zuatimmln. "Mochts is Krajz, daj hand ulli hie" hot da Biarasepp gsoat. Wia da Wastl dos gseha hot is a, sou schnöll wos a kina. hot, rajna hot a eh schou uwal kina, den Räjßan gajgn gsprunga und hots ajwajni min Zigl afholn wülln. Wia na s Rouß gsehgn hot, is mit die vodan Fiaß i'd Häh gstiegn und ea hot d' Zigl nimma glounga kina, mit da linkn Häjnd is a an da Beißkejn häjnga blim und s Rouß hotn mit i'd Häh grissn, mit brr brr und guan zuarajn, d Rouß hand jo d' Kina gwoud gwajn, hands sou kloaweis wieda ruahi won und wia'd Biaraleit kajma hand, hands wia Lameian do gstoundn. Zeascht houms no'n Hiasl gschaut, dea wia toit, do glajgn is und sie nimma griacht hot. Wias'n loughsoun va da Ajggn außa klaubt houn, hot in Wastl sa Muata gsehgn, daß ihan Buam s Bluat va da Häjnd oha rinnt, sie hot gleich an Stroafm va ihan Intaskittl ohgrißn und hat ehams ajbundn ea hot gsoat "s is netta a wajng afgrißn". Dahoam hot ma oft eascht gsehgn, daß dea Riß bis afs Boa ahi gounga is und lounghot's daucht bis's zuagholt gwajn is. Dajn Mosn siagt ma nou uwal, i muaß hitzt gajh, pfiat die und uiß guadi". Ea hot iha nou a Bussl afs Hian afi druckt, hot si' umdraht und is in Wold vaschwundn.

D Anna is recht nohdejgat hoam gounga, sou hot sa si dajnt, da Wastl is a recht guada Mou, sou loungsaum woäß i das sölwa ah schou und daß a hölfm tuat, wou a kau, is ma all nix Nejgs. Voa a boa Johan, ham ma in Stefanitog ba da Musi gwajn. Es is recht lusti gwajn und i houn va lauta tounzn foßt gschwitzt. Ban Hoam gajh is a eiskolda Wind van See oha kajma und mi hots ohbeitlt, i houn a woami Blischjackn oughot, owa da Wind is ma bis af d Boan ahi du'gounga. Wia da Wastl gseha hot, daß mi fruist, hot a gleich in Rouck o'zaungn, hot man umghäjngt und hot gsoat, ea tuat mi hoam. Dahoam, wia i eham in Rouck zruck gajm und daunga houn wülln, hot a gsoat, "woäßt i houn's geen tou und i woäß wun i va dir a mol wos brauha tua, koun i kajma, pfiat di". Ea hat in Rouck

au'gload und is wia wun nix gwajn wa hoam gounga, bis hajt hot a va mia nix braucht. Frali wun da Woldvejda soat, daß da Wastl a guada Mou is, wiad's schou sou sa, wal nix u'rechts hot dea nou nia gsoat.

In Rotschlog hand d Joha umi gounga und ban Wastl und da Anna is uwal nou nix Jungs do gwajn, d Leit hound schou gmoat, do wiads goa nix meha und daun is dou amol sou weit gwajn. Wias is in Wastl gsoat hot, is a vull Freid bis am Blavou affi gsprunga, hots in Oam gnumma und o'druckt, daß koa Luft meha griagt hot und häts am liawan is Gläjsakastl ahi stülln wülln. "Du"hot d Anna gsoat "a wajng lajbm muaßt mi schou lossn, ohune mi wiads nix und uiß ounari moch i schou sölwa, glaub mas". "Woast" hot a gsoat "va lauta Frejd woäß i nimma wos i toa sull" und seit dera Zeit is' s Lajm ba daj Zwoa nou scheina und glickliche won wia voahea.

Wias sou weit gwajn is und a kloana Beanhad i da Wiagn glajgn is, hot da Wastl nimma va da Stum außi willn, am liabstn hät a in Buam an gounzn Tog ummatum trogn. Ea is jo sou kloa gwajn und hot si nit hölfm kina, man hot n geen hom miaßn. Da Anna is's jo nit recht gwajn, "du vazuingstri gounz und wos sull i nochhea toa, wun ihn an gounzn Tog am Oam hom muaß, daß a nit bläacht" "Jo maj i mogn hult sou narrisch, daß is goa nit sogn kou", hot da Wastl gsoat, hot'n owa nimma sou ouft umatum trogn. Noh zwoa Johan is noumol a Biawei kajma und a boa Joha danoh nou a Diane, "daß d Stum full wiad" hot da Wastl gsoat". Ea hot ulli drei geen ghot owa die Kloa is' saj Heazbinkei gwajn.

Ma hots nit glaum kina, owa hitzt is's sou weit gwajn. I da Koltbrunna Gloschitt, hot ma noh hundat Joha afghäacht und draus an fiaschtlichn Bauna Houf gmocht .

Jo maj d Zeit is hult nit stejh blim Da Beanhad hot sa Agnes va Ajgatschlog gheirat. Saj houmt guat mitanouna ghaust und i'wa ulln is da Sejgn van Himmlvodan dabei gwajn. Mit die Joha hand via Kina kajma, drei Buam und a Majnsch und d Ahl hot den Kinan ouft va entaamol dazühlt, wias domols gwajn is. Wia si kloa woa und ah van Woldvajdan, van Schroat, dea iha a boa mol ghulfm hot und dea seits gheirat hot, nimma viara kajma is. "Wißts" hots weida dazühlt "gsehn houn ihn nimma, owa äjfta nou gspiacht. Ah oamol do hot ajnga Voda i da Hoihwies ghiat und wias zan Hoamtrajm gwajn is, is eham a Kuha o'gounga, daj is recht ejbültarisch gwajn, daj äjfta hoamgrajnt is wun iha wos mit paßt hot, wia a doun hoamkajma is, is's ah nit do gwajn und saj houmt zan suaha ougfounga, houms owa bis i'd Nocht ahi nit gfoundn. I da Fria wies weida suaha houm willn, is d Kuha min Holsream am Mistwogn ou'ghäjngt gwaj und zan frajßn hots an Oam vull Haj ghot, sicha hots da Woldvajda hoam tou. Da Woldvajda is jo schon recht old gwajn, ma Ahl hot va eham dazühlt und do is' a genau sou gwajn wia hajt, ea is recht leitschaj, wal wun a wou gsehn won is, hand d' Leit schreiat davon grajnt. Do was koa Wuna wun a sou won wa, owa d Kina hot a geen ghot und wun's n ajs amol seha toats, fiachts ajng nit und sogts "griaß ajng Goud Vajda uda



Woldvajda" ejs kajnts n leicht, ea hot sou guadi und leichtati Augn und netta a rufani Pfoad au" ..

A boa Joha danoh, es is zwischen, Heigat Koonschnaj gwajn, a recht a scheina Tog."A wejng z woam, i glaub hjt kimmt nou vos" hot die old Resimoham gsoat, wias ban Beanhad viagounga is, ea hot si grod min Schaltihl in Schwitz o'gwischt, "ajs weads schou recht hom" hot a gsoat "D Luft is recht druckat und die blindn Fluign beißn wia nit gscheit" Noumittog hand d Kina i'd Schwoazbejn gounga, saj hound a Kouhl und a jeds hot a Hejfal dabei ghot, wos sa si doun ban brouka um d Mitt ummabundn houn. Wias zan Wold kajma hand, es is koa richtige Wold gwajn, nea a boa groiße Tajnnan und Fiachtn hand drinn gstoundn. S meisti woa Dickarat und Krajßlina und wals recht noß gwajn is, hot mas "i da Au" gnejnt. Schwoazbejndoschat is iwarol gwogsn, ah Scliwoazbejn hots ghot, owa s broka hät do nit gschlout, ma häts suaha miaßn. wal d Leit va iwarol daheä zan brouka kajma hand. Saj houn schou a Wal suaha miaßn, bis a Plazl gfund houn wou ella und groiße gwajn hand. Die via Wastlkina hand recht fleißi gwajn und hound d Kouhl schou meha wiea holwats vull ghot, do hot si am See oum a Wejda zaum zoug und is schwoaz und fuiri d Wulda oha zua kajma.

D Bejnbrouka, daj dos gsehn houn hand glei'h hoam gounga, wal die old Bawlin gsoat hot "kajmmts gschwind, mia gajngan hoam, dos schaut graußli aus, dos wiad hejt oag" Die via Wastl Kina, iha Haus hot ban Wastl ghoißn daj houn dos nit seha kina, wals zwischn gäßani Bäjmajan gwajn hand, wia doun da easchi Blitz am schwoazn Himm! blajdat und zackli iwa Schwoazboh gfohan is, da Dunnara krochat in Boum zidan hot lossn, hot da Kloani da Franzei zan schraj und woan ou'gfounga "gajnga ma hoam, i wüll hoam, i fiacht mi" und hot weida gjammat.

Die Ounan haumd nit gwißt wos toa sulln, zan hoamgajh is schou zpat gwajn, wal's Wajda schou foßt iwa eha gstaundn is. In ihara Noit is da Woldvajda dahea kajma und hot gsoat, "Kina rajnts wos kinnts i'd Toafhittn ohi," gejbts ma d' Kouhl, i kimm nochi. Ea hot d Kouhl gnumma und d Kina hand sou schnell wos kina houn van Wold außi und gweax iwa d Wiesn za da Hittn umi, wies sou holwats ba da Hittn gwein hand, is af oamol a Stuum kajma, daß sa si umdrah houn miaßn. Weida hands nimma kajma, bis da Schroat zu eha nochi kajma is. Ea hot in Franzei am Oam gnumma uns s Dianei ba da Häjnd und a sou hands bis za da Hittn grajnt. Saj haumd nimma weit ghot do hots zan Rajgna ougfounga, owa a sou, wia wun da Himml oha follat und dabei hots blitzt und dunnat und finsta is won wia af 'd Nocht. Wias i'd Hittn ahi kajma hand, hand die zwej Buam bis af'd Haut noß gwejn, sej hound glei d Pfoad ozoug und ausgewundn, die Ounan hand nit sou noß won. "Do" hot da Vajda gsoat "kinna ma bleim bis s Wejda voaiwa is, loung wiads jo nimma daun". "Vajda kinnts uns nit wos dazühln" hot da Beahad gfroat", ajs habts jo sou. weit ummatum kajma, a kloas bissl wos"?

Da Schroat hot va entaamol ougfounga, wias do gwajn is, wia a daun die eastn Leit gsehn hot, va di Reh und Hosn, wia die kloan Haseian nohrajna spült houn

va die Bään, daj in gounzn Winta schlofm und in Friahtjoha mod und hungari wieda viara kajmand. "und wißt's, do ouwan Hochficht gajngan die Beagn nou weida afi, do kimmt da Reischlbeag, daun d Pläcknstoabeag, danoh da Dreisesslbeag, weida afi zua hoißt oana Arber da ounan Lusn, Rachl und da Osa., do oum bin i. netta oamol gwajn. Am, schajnstn is hult dou ba uns do hearint. S Wejda hot si schou vazougn, i muaß hitz gajh, ajs kinnts jo a nimma Brejnbroucka gajh, s Doschat is nou noß. pfiat ajng und griaßts ma d Ahl" Ea is ba da Tia außi und in Wold zua, bevoa a in Wold ahi is hot a noumol zruck gwunga. D Kina hand nou a Wal i da Hittn sitzn blim und hand danoh a loungsoum hoam gounga. Dahoam is ihn d Muatta schon gajnkajma, si hots duh's Fajnta kajma gsehgn und voa lauta Oungst hot sis schou voan Haus opaßt. "Wou kajmts dejn hea" hots gfroat, "hobts is Wajda nit gsehgn, daß hoamgounga wachts, mia houn sou Oungst um ajng ghot, s hot sou grausli tou daß ma gmoat hot d Wölt geht inta". "Woast Muata" hot da Wastl gsoa't, ba uns is da Woldvajda gwajn und wia dea kajma is, houn ma koa Oungst meha ghot, wun ah s Wajda sou grausli gwajn is". "Wos-"hot iha Muata gsoat "da Woldvajda. is ba ajng gwajn, frali do braucht ma koa Oungst meha hom.,dos is a sou, wia wun da Schutzejngl ba ajng gwajn wa und Kouhl mit di Schwoaazbejn is ah foßt vull". „Jo dej hot uns da Vajda trogn, wia ma i 'd Hittn rajna houn miaßn, wal a gmoat hot, wun ma hie folln kinnat mas ausschittn, an Gruaß fia'd Ahl hot a uns ou'gschoft" hot da Beanhad gsoat und d Agnes is mit ihari Kina gounz froih, is Haus ahi gounga.

Wun ma gmoat hot es geht sou weida, hot ma nix gwißt, d' Leit hand uwal meha won, da Grund owa nit. In Rotschlog is a sou gwajn wia iwarol. Da Üldasti hot's Haus griagt und die Ounan haum schou miaßn, wous bleim. Ba mouchi Heisa is ella Grund dabei gwajn, dajn hot ma toalt und es hot si oft Oana a Heisl bou kina, ba Onani is da Stoll z' kloa won und man hot uis gräba mocha miaßn. Do hot ma wieda Maura und Zimmaleit braucht und ah daj houn a Oawat und Auskajmma ghot.

Da Beanhad, dea sou ghoißn hot wia saj Voda, hot's Wastlheisl iwanumma und da Wastl hot ban Zimmalei'n goawat. In Rotschlog sölwa hot ma ouft an nejha Dohstuhl braucht. wuns Haus gräba gmocht won is und a in Ejgatschlog hots uwal Oawat ghot. In Stajgnwold bis af Goaßleichtn, is iwarol baut won, sougoa in Glöjcklbeag wou za deara Zeit schou iwa drei.ßg Heisa, mouchi schou iwa hunat Joha, gstoundn hand, ah do is uwal nou baut won..

Va Stajgnwold bis af Goaßleichtn umi hot da Fiascht ella Grund in Leitn vapocht wal doucht a sou'diga Boum is und Bam nit richti gwogsn hand. Wia die oln Bam wajggwajn.hand, is da Boum ausdrickat und die gsajztn Bäjml hound koa Feichtikeit ghot und hand vadrickat.Den Lei'n is jo recht gwajn, es hand uwal meah won und die houn meistens koan Plotz meah ghot. In Fiaschtn is's ah recht gwajn, wal a van Pocht mit da Zeit meha Göld griagt hot wia van Wold, dea foßt hunat Joah braucht hot, bis man schlogn hot kina und daun hot ma nou d Hulzhocka, s' fiahn und s' schwajmma zohl'n miaßn. In Stajgnwold hand ejtla Hajsja baut won und

do hot da Wastl ban Zimmalein goawat. Saj houma recht geen ghot wal a fleißi gwajn is und recht genau. In Stajnwold hot ah a Teifl a Tischla goawat, dea is in Rotschlog dahom gwajn und eascht va Ästarei hoam kajma Ban hoamgajh hands zrajd won, daß mit da Zeit nit lounga tuat wals netta Zwaj hand und mit d Tian und Feinsta bis in Winta nit fiachti wean, wals Tian und Fejnstastajck ah nou zan mocha hound. "Woast Gospa", sou hot da Teifl ghoißn, hot da Wastl gsoat, "Tian= und Fajnstastejck houn i a schou amol gmocht und wuns wajm braucht's kinat ih hölfm". "Maj" hot da Gospa, gsoat, "wun ma dos mocha kinnan, wan ma schou a Stickl wajda." "I muaß hult nou mi'n Franzl Moasta rajn, dea wiad frohi sa wun a dos häacht. Wal a eh schou uwal jammad, daß ma nit fiachti weam."

Da Franzl Moasta hot si oog gfreit wia a ghäacht hot, daß a a Hülf griagt und glei a Oawat fian Wastl heagricht. D Tiastejck. hound miaßn oum zapft und intasi gfolzt wen, daß nit varutscht hand, hot mas intasi mit an Hulznogl gnoglt, d Fajnstastejck hand iwarol zaapft won und daß voan Winta fiachti won hand houms va Friha bis finsta won is goawat. Ban hoamgajh hound die zwaj Rotschloga iwa uiß mäglichi grajt, iwa d Oawat, iwas Lejm und iwa d Leit, dej uwal großnosiga wean. A Bau, dea meah schlecht wia recht lejbt, sitzt si in Wiachtshaus an koanTisch wou a Knecht sitzt und zan sogn hot a Ounara ah nix meha wen dej banouna hand. "Woast" hot da Gospa gsoat, "mia ham ins jo nit neidi, wuns nua nit goa sou ougajm dan."

A Zeit danoh hot da Gospa an schlechtn Tog ghot, nix is gounga, ea hot uiß noumol zoumpassn miaßn. S Wejda is ah danoh gwajn, a boa Tog hot's Gnewlt und Gfajzlt und es is koa Aussicht af a bajßas Wajda gwejn. Ban hoamgajh hot si' daun da Gospa sani gounzn Soagn ban Wastl va da Söl oha grajd. Da Wastl is jo dou a boa Joha ültä gwajn und ma hot ah guat mit eham rajn kina. "Woast Wastl" hot a gsoat, "ba uns dahoam is s Lajm vahext, uiß geht vakeacht, da Beanhad hot schou lounge s Dahoamtani iwanumma und muaß uwal nou in Stiwl mit zwoa Kina hausn wal i hoam kejma bin. Die Ültä und die zwou Schwejstan kinatn schou is Stiwl afi, wal fia d Mejscha wa schou i da Koumma Plotz fia a Bajtt, wou owa ih bleibm sull, dos woäß ma nit". "Jo woäßt Gospa" hot da Wastl gsoat, "do ga'ts nua oas, auszuign, entweda du suagst da a Hiawa uda an Schlofplotz, am oafochstn was wunst heiratst. Do bist va dahoam wajg, bist vasoagt und host wejm, daß'd nit alloa bist und mit wejm rajd'n kounst. Aussuaha muaßt das sölwa, wal ma do nit za wos ro'n kou, wos nochhea nixt taugt". "Du host guat rajn" hot da Gospa gsoat, "bist da Oazigi ba dajn Bruada in Stiwl, du braugst di um nix kimman, host uiß und wunst i dana Freizeit wos tuast griagst an Nejna und a Jausn". "Frali hot da Wastl gsoat "drum beklog a mi jo nit, wun ih owa du wa tat a mi schou um wos umschou, sou loungst dahoam bist wiads nia wos rechts wen. Oani, daj a wejng wos hot, schau da um a Stiwl, uda kafst da a Heisl, vadean tuast jo wos und af oamol braugst is jo ah nit zohl'n, du kounst iwarol a Göld griagn und du host uiß wost zan Lejbm braugst". "Maj du host jo recht" hot da Ciospa gsoat, "owa wou sull i Oani heanajhma und i kajn koani, daj mi a wajng mog und daj s Dahoamtani a wajng

zoumholn kou. I da Gsülschoft houn i uwal Mejscha um mi uma, ba da Musi hand a a boa daj woachtn bis i mit ihn tounz, oub mi owa Oani heiratn tat, glaub i nit". "Jo" hot da Wastl gsoat, "host ah schou oamol Oani gfroat ous die heiratn wüll"? "Na woast i trau mi hult nit" hot da Gospa gsoat, "wun Oani na sogn tat miaßat i mi schouma und kinnat ma gaunz Lajbm nix meha mit iha rejn und iha i 'd Augn schou". "Riatz häa ma amol zua" hot da Wast! gsoat", "hot za dia nou neamd na, uda i koun nit, uda i mog nit, uda i wüll nit gsoat und dos hot da nix ausgmocht, owa wun a Mejsch dos soat, dats die schouma, du woast jo nit wajgn wos na soat. Wun iha Voda schou Oan ausgsuacht hot, kouns nit jo sogn uda wuns Oan oag geen hot, gehts ah nit dos hot mit dia goa nix zan toa und ban nächstn mol brouwias, s' is bestimmt nix dabei"-Ban Najnimocha hand's ah amol draf zrajnkajmma, daß da Wastl dahoam iwari is und ea heiratn mäjchat, "wißt's Vajda" hot da Wastl zan Franzl Moasta gsoat, "bis hiatzt hot a nou koani gfundn und schinian tua't a sie a awajng ". "Dos brauchts jo nit" hot da Vajda gsoat, "meistns woachtn d Majscha netta bis ma wos za eha soat und wun die Richtigi kimmt, koun mas schou passat mocha". Weida hot ma nit driwa grajd wal d Oawat wichtiga gwajn is und wos ma nou mocht, daß ma voan Winta fiachti wiad.

Da Franzl Moasta va Stejgnwold hot via Kina ghot und is recht ougsehgn gwajn, ea hot guat goawat und ma hot' n guat lajn kina, sa gräßti Soag is sa ütasti Toichta gwajn, sie hot koan Moun gfundn, ougb iha Voda oan brocht hot uda ous a Ounara gfroat hot, uwal hots na gsoat. Sie woa nit u'ajm und hot spoan und ah oawatn kina. Wajn wos koan gfundn hot, hot si. iha Voda nit eakläan kina. Am Ejnd hot a gmoat es hots wea vahext und hots min heiratn nimma plogt.

In holm August is in Wulda a Moakt gwejn und da Franzl Moasta hot die Zwaj zan Mooa af a Holwi ajglont. DaMooa is a schajs und groß Wiaclichtshaus gwajn mit an großn Houf und an schajna Tounzboum. In Moakt is ma va weit und broat do hi' gounga. Die zwaj Rotschloga hound si, zaumgrajd, daß um drei af Wulda umi gajngand. Es is a Tog gwajn, wia in August, woam, ah a boa Wülkan und a kiahla Wind is gounga, dea d Blattl af'm Baman beitt hot.

Wia's zan Mooa umikajma hand is Goststum schau grammlt vull gwajn und saj houn netta meha an Plotz i da Kuchl gfundn. A Dian hot in s' Bia brocht und daun is da Wastl in Franzl Moasta suaha gounga, ea hot'n ba ounani Stejgnwola i da Goststum gfundn, hot griaßt und gsoat, daß i da Kuchl a Platzl gfundn houn und wal a iwarol in Wajg gwajn is, is a wieda i'd Kuchl umi gounga. Saj hound iha Bia trunga und hand doun am Tounzboum afi gounga. Ba da Tia und af da ounan Seitn hand Tisch gstoundn und wal da Wastl a boa kejnnt hot, haums nou an Plotz griagt. D Musi hot gspült und die Meistn houn tounzt, seha hot ma nit vüll kina. Wias a Pause gmocht houn hand die Meistn af ihan Plotz gounga, Aunari hand banouna stajh blim, hound grajd und glocht und Dummhajtn gmocht. A boa Tisch wajda wajg hand a boa Buam und Majscha va Stejgnwold gsajßn, van seha hot ma si schou kajntt griaßtd und min 'du bist ah do' is ma glei is rajn kejma. Wia doun d Musi wieda weida gspült hot, hand die Stejgnwolda afgstoundn am Tounzplotz

gounga, netta a Majnsch is sitzn blim und hot den Ounan zuagschaut. In Gospa hots koa Ruah lossn ea is ah alloa ban Tisch gsajssn, bis a afgstoundn und za iha gounga is. "Griaß die" hot a gsoat "deaf i a Wal za dia heasitzn, i bin da Gospa va Rotschlog und hiaz oawat i in Stejgnwold, i haun die schou iagend wou gsehgn owa i woäß nit weast bist". "I bin va Stejgnwold und hoiß Agnes" hot sie gsoat, "du deafst die souloung beasitzn bis die Ounan wieda kajman". "Woast" hot ea gsoat "i bin nou nit laung va Ästarei kajma und hitz kajn i foßt neamd, a boa in Rotschlog und a boa in Stejgnwold und schou bin i fiachti, hjt bin i min Wastl, dea mit uns oawat dohea kajma, wal uns da Franzl Moasta ajglont hot". "Sou sou, ban Franzl Tislila oawatst" hot sie gsoat "do muaßt owa guat sa, wal dea recht agrat is und koa Pfuscharei duld". "Mei sou schlimm is a wieda nit, mia houn netta Feinsta, und Tian zan mocha und ba daj kaun ma nix vapfuschn" hot da Gospa gsoat. Hiatzt hot'n d Agnes richti betrocht ea is sou ounast gwajn wia die Meistn, sou wos nohgajwats, sou wos ruhahigs und sie hot'n gfroat wos a in Sunnta tuat wun a nit oawatn geht? "I Sunnta geht ma i 'd Kira und noumittog lajs i wos uda i gajhn zan Wastl, dea is mit sani Ültan alloa, .mouchmol gajnga ma a Bia tringa, dos kimmt owa söl'n voa und dos was schou" hot a gsoat und wal d Musi wieda a Pause gmocht hot, hot as nou gfroat, oub as nochhea zan tounzn huln deaf. Sie hot "jo" gsoat und ea is loungsoum za san Plotz zruck gounga.

Wia da Wastl zruck kajma is und gsehgn hot, daß da Gospa uwal nou ba sein Bia am Tisch sitzn tuat hot an gfroat oub a nit tounzn wüll, wal Majscha zan taunzn hot's jo gnua ghot und d Musi is ah guat gwajn. "Nochhea hot da Gospa gsoat, "wos a die frogn wüll kajnst du die Schwoz do ajnt ba den Stejgnwoldan, woast daj min roin Kittl". Da Wastl hot a Walei umi gschau, ea hot a boa Buam kajnt, owa die Schwoz hot a nou nia gsehg, zwajng dajn hot a gsoat, "na daj kajn i ah nit, sull i oan.va die Buam frogn weas is"? "Na dos braugst nit, wost wun sie amol außa griagt, daß ma zeascht gfroat hot wea s' is und wos hot, kinnat's hab wen". "Do host schou recht" hot da Wastl gsoat, "woast a sauwas Majnsch is schou, du dos wa wos fia die, daj schaut sou valäßli und agarat aus, hom tuats bestimmt a wos". "Woast" hot da Gospa gsoat "wajnga hom is ma jo nit, i bring jo sou vüll hoam, daß laungt und sölwa brauh i jo ah nit vüll".

D Musi hot wieda zan spüln ougfounga da Wastl is glei afs gstoundn, wal si da Gospa nit griacht hot, hot an ba da Oxl gnumma und a wajng beidlt und gsoat "hiaz trau da dou und huls zn Tounzn" und hot nit gwoacht bis da Gospa wos gsoat hot. Dea is sitzn blim bis die Meistn wajggwajn hand und is down za da Agnes umi gounga, hot an kloan Bugl gmocht und hots gfroat, ous iha hiaz recht wa"? Sie hot wieda "jo" gsoat und hot n ba da Händ gnumma und a sou hands zan Tounzplotz fiari gounga. Saj houmt ban tounzn nit vüll grajd, houn netta d Musi gspiacht und daß banouna gwajn hand. Oamol hot sie gsoat, "i bin hjt sou glickli und froi, daß i mitgounga bin". Wia wieda a Pause gwajn is, hand die Zwoa am Tounzplotz nou a Wal stjaj blim, saj houmt eascht wieda i`d Wöld zruck kajma miaßn, und down hot d Agnes gsoat, "kimm mia miaßn zruck", sie hot'n wieda ba

da Häjnd gnumma und hand za ihan Plotz zruck gounga. Am Tisch hot a' iha in Stuhl zan innasitzn gricht und wias gsajssn is, hot a iha d Häjnd af d Ochs1 glajgt und gaunz hoamli gsoat, "Agnes i mog die". Da Wastl is schou am Plotz gwajn und wia da Gospa zruck kajma is, ea is jo nejgiari gwajn, wias in Gospa gounga is und hot gleih gfroat, "wia is da gaunga und wea is dej Taunzarin"? "Gaunga is guat", hot da Gospa gsoat und daß va Stejgnwold is, wissn ma ah Agnes hoißt's und meha woäß i nit". "Maj" hot da Wastl gsoat, "dos is owa vüll wost außa brocht host, es lount jo ah wunst woast wias hoißt".

Ban Stejgnwoldan is's ah um an Gospa gounga. Ulli hand neigiari gwajn, wea dos is und wouhea si'n kajnt. "Wißt's" hot d Agnes gsoat, "ea is va Rotschlog und hoißt Gospa, meha woäß i nit". "Du Agnes" hot da Jakoub gsoat, "is dos nit dea, dea ba dajn Vodan oawat, dea is jo va Rotschlog" "Koun schou sa" hot sie gsoat, "i houna nit drum gfroat, owa is dos sou wos Neigs, wun i amol mit wajm tounzn tua". "Frali" hot da Michl" gsoat "va uns host jo koan wülln und hiaz ham ma schou neigiari wea daj Außawölta is, woäßt mia mäjgn die und mia majchtn nit daß'd is Uglick rajnst". "I mog ajng jo ah" hot d' Agnes gsoat, "owa zan heiratn hots hult nit glount und i dounk ajng schaj, daß sou um mi besoagt habts".

Wia d' Musi wietia zan spüln ougfouna hot, houn die Stejgnwolda Buam gwocht oub da Gospa wieda za da Agnes kimmt und wia a kajma is, san Bugl gmocht hot und gsoat hot "deaf i die zan tounzn bittn" hound ulli recht u'gleiwi gschaut, wal koana hots bishea fia noitwajndi gfundn, sou gschwuln zan dahea rajn.

Agnes is gleih afgstondn, hot'n ba da Häjnd gnumma und mitanouna hands, wia wuns schou uwal sou gwajn wa, tounzn gounga. Sou is bis zan Ajnd gounga, da Gospa is noh jedn Tounz af san Plotz zruck und hot d Agnes uwal wieda mit, "deaf i die bittn", zan tounzn ghult, bis d Musi den lajztn Wolza gspült hot. Noh dajn Wolza, hand die Zwoa nou a Walei banouna gstoundn urid da Gospa hot gsoat, "du Agnes i wüll mi nit afdrajnga, wiea is dajn min hoam gajh"? "Gospa hot Agnes gsoat, "wajng dein braugst da koani Soagn wocha, mia Stejgnwolda gajhgan mitanouna hoam und i houn jo nou a Schwejsta dabei".

Ban hoam gajh is da Gospa recht sinirat gwajn, da Wastl hot grajd und dazühlt und hot gmoat da Gospa dazühlt ah wos, owa dea hot nua jo und amen gsoat und sou hands af Rotschlog kajma ouhne daß da Wastl wos nejgs ghäacht hot. Da Gospa hot jo souvüll zan dajnga ghot, do woa dos, daß a dahoam iwari gwajn is, daß a, a Agnes gfundn hot, owa nit gwißt hot weas is und wias i san Lajm weida geha sull. Ea hot i deara Nocht nit vüll gschlofm und gounz iwanächti is a i da Friaht it Oawat gounga. Ah in Wastl is nit zan rajn gwajn und saj hand froih gwajn wias af Stejngwold kajmma hand.

Wia da Gospa va Ästarei hoam kajma is hot a in Wulda ba san Moasta wou a glehnt hot, "griaß ajng Goud Moasta do bin i gsoat". "Jejas da Gospa, Goud saj dounk daß' d do bist, die schickt ma Himml, i bin in a Zwickmühl, nette du kaunst ma hölfm". Jo Moasta wos gat's dajn" hot da Gospa gfroat, "wou sull i hölfm"?

"Woast Bua" hot da Tischla Moasta gsoat, "i haun in Franzl Tischla va Stejgnwold zua gsoat, daß i eham hölfm tua, ea hot si awajng iwanumma und ea hot foßt gwoat wal i hiatz sölwa a Oawat griagt hou, daj i mocha muaß und gsoat houn, daß i nimma kajma koun". Da Gospa hot a Wal iwalajgt, wos a toa sull., Oawat hot a eh nou koani ghot, frali. hätt a nou a boa Tog fa'lajzn wülln, "jo "hot a doun gsoat "i brouwias a mol , wun i ajng damit hölfm kou". A sou is da Gospan aaf Stejgnwold zan Franzl Tischla kajma, dea hot i da Hoastum van Howanbaun sa Weackstott ghot, wal a dahoam fia d Brajda und Tiapfoustn koan Plotz khot hot und die neibautn Heisa gleich danajm gwajn hand. Wia da Gospa hi' kajme is und gsoat hot, eham schickt da Wulda Tischla, wal a hölfm sull hot da Franzl Tischla a Stejmeisn wajg glajgt und hot gsoat "Goud sei Doung, hiatzt muaß i betn" und ea hots Kreiz gmocht und hot in Vataunsa bet. Da Gospa hot ah mit bet und a sou hand sa si gleich nähata kajma. Da Franzl Tischla hot in Gospan d Häjnd gajm und hot gsoat, "Gospa du kounst Vejda za mia sogn und wunst wüllst ah gleich ou'founga". In Gospa is's recht gwajn und sou is da Summa vagounga und da Hiascht is ah nimma weit gwajn, netta a boa Woucha nou und saj hand mit den zwoa Heisan fiachti gwajn.

Am Mouda nohn Moakt hot d Agnes ihan Vodan wajn a Gospa gfroat, "Voda ba ajng oawat jo a Gospa va Rotschlog, wia habt's dajn mit eham zfrienn"? "Woast Agnes, wun ma dajn da Himinl nit gschickt hät, was mit mia ausgwejn, do warat i mit da Oawat dajs Joha nit fiachti won und wea hät ma oft nou a Oawat gajm". "Voda dos haun i nit wissn wülln, i moa, wia a sou in Lajbm is, wißt's wia ma sou mit eham umgajh kou". "Jo mej" hot iha Voda gsoat "do koun a da nit vüll sog'n, ma koun mit eham guat auskajmma, ea is fleißi und spoasaum und zoani wiad a ah nit, wajng wos wüllst dajn dos wissn"? "Wißt's Voda i houn in Kiachta mit eham tounzt und ea gfollt ma, owa grajd houn ma nit vüll, drum majchat i schou a bissl meha wissn". In Vodan is a kloas Liacht afgounga, ea hots owa gleich wieda vagajssn ghot, äjfta hot iha schou oana gfolln und noclihea is's min heiratn nix won, drum hot a gsoat, "grajd hot da Gospa nia vüll und gfroat houn ihn nou nit, wunst wos wissn wüllst, muaßt'n hult sölwa frogn". "Jo wia dajn ea woäß jo netta, daß i Agnes hoiß und va Stejgnwold bin, glaubts ea koun mi findn" hot d Agnes recht vazoat gfroat. "I glaub i koun da hölfm" hot iha Voda gsoat "i schick dan moagn oha und doun kinnts mitanauna rajn".

Am nächstn Tog nohn Nejnimocho hot da Franzl Vajda sa Stejmmeisn gsuacht und hots nit gfoundn. "Du Gospa host nit mei dreiviachtl Zoll Stejmmeisn wou gsehgn i brauhats", "Na" hot da Gospa gsoat "mia is's nou nit intakajma, owa gejstan houn mas jo nou ghot". "Hiatzt woas i wous is, i haun's zan schleifm hoam trogn und liegn lossn, mäjgst mas nit huln, woäß Gospa du bist dou nou jinga". "Jo Vajda i gajhn gleich und brings". Ea hot in Roug ou'glajgt und is gounga. Es is dou a Stickl Wajg ohizua gwajn und a recht schajna Oktouwa Tog, a guldana Oktouwa is eham ajgfolln, do miaßt ma jo Glick hom, vülleicht ah i amol. Doun is's nou a Stickl ohizua gounga bis a zan Franzl Tischla Haus kajma is.

Vojdoan Haus hot a Wajwaleit mit an Bajsn um s Haus umma zoumkiacht, sie hot a Ahlhaum bundn ghot und a ausbloichti Schiazn. Wia a doucht gwajn is und gsehgn hot, daß d Agnes is, hot a gsoat "Agnes griaß di, wos tuast dajdn du do". "Gospa du, griaß die und wos i do tua, zoumkiahn wia siagst und wajgn wos bist du do"? "I muaß in Moasta s Stejmmeisn bringa, wos a dahoam vagejssn hot und wos tuast du do ban Franzl Vajdan, bist du do Dian"? "Und wun is wa" hot d Agnes gsoat, "Agnes dos wa guat, dos wa recht guat" hot da Gospa gsoat, "do kinatn ma bold heiratn, du woast i mog di". "Wun i owa koa Dian bin" hot d Agnes gsoat. "Wos bist dejn nochhea" hot da Gospa gfroat und hots noumol richti au'gschaut, sie woa wiakli zan ou'beißen und hot n sou liab und spitzbüabisch ou'gschaut, wia a sou valajgn voa iha gstaundn is. "Woast i bin souwos wia d Haustoichta und muaß mi ums meisti kimman", hots gsoat "wos häts tou wun i gsoat hät, i bin in Franzl Tischla sa Toichta". "Wos i tou hätt" hot da Gospa gsoat "hoamgounga wa i, hät zoumpockt und wa af Ästarei gounga bis i di vagajßen hätt wuns gounga wa, owa es is jo nou guat ausgounga, ah wun die Dian bejssa za mia paßt hät. Woast i bin a oama Heislbua und kaun koani großn Spring mocha, wun ma si um sou wos bajßas umschat und danoh nit mitoa kou bleibt ma da dummi Jogl und dos majchat i uns daspoan". Sie hot eham recht nohdajngli zua gloust und hot daun gmoat, wun ma Oan richti geen hot und s' Lajm maunchmol ah nit leicht is, glickli sa koun ma dou". "Host recht owa i muaß hiazt gaj sunst kimmt da Vajda sölwa oha", ea hot s Stajmmeisn gnumma und schlejni is a za da Weagstott afi. Oum hot a s Stajmmeisn glejh in Vajda gajm und gsoat "es is glajh najma Schleifstoa glajgn" und oune das a meha gsot hot, is a za sana Oawat gounga.

Wia da Franzl Tischla hoam kajma is, hot a'd Agnes gfroat oub s min Gospa grajd hot und wias gounga is. "Wißts 'Voda" hot sie gsoat, "grajd houn i schou mit eham owa ea hot nou nit gwißt, daß i ajnga Toichta bin und gmoat daß i'd Dian wa. Wia a zeascht gmoat hot, hät a mi gleih gheirat. Wia i gsoat houn, daß i koa Dian bin is a kloalaut won und ea is nea awajng ruahiga won, wia i gsoat houn, daß i sou wos wia a Haustoichta bin". "Mit ajng Weiwa sull si wea auskajna" hot iha Voda gsoat und is noumol i'd Weagstott gounga.

Ban Hoamgajh houn die zwaj Rotschloga iwa d Oawat grejd, daß do nit vüll zan mocha is, "woast Gospa, du kinatst jo Truhan und Kastn mocha, ba mia, ba mana Oawat is goa nix, do muaß ma froih sa wun da Winta wieda ummi is, "Woast Wastl," hot da Gospa gsoat, "Truhan und Kostn mocha is' schou schaj wunst a Weagstott host, owa i houn koani, i muaß ah schou oub i in Winta wou oawatn kou, oub mi wea braucht". Dajs Joha houn i eh läjnga a Oawat ghot" hot da Wastl gsoat, "d Zimmamouna houmt in gounzn Oktouwa nix meha zan toa ghot und eascht in Fruahjoha gehts wieda lois". Saj hand ban Wastl oukajma und mit "Guadi Nocht" hand's ausanouna gounga und haum nit gwißt, daß die lajztn Tog mitanouna hoam gounga hand.

Am Saumsta Noumittog hot da Franzl Tischla gsoat, daß fiachti hand und das as moagn noh da Kira aus zohnl tuat, ea dounkt ulli Zwaj, daß sou fleißi gwajn hand



und wünsch in weidahin uiß Guadi. Zan Gospa hot a gsoat, ea sull am Mouda noumol kajma, wal's d Weakstott afrouma miaßn und alloa kaun a dos nit. Die Zwaj houmd si zaumpockt und hand gounga. Ban Hacklsimoun in Rotschlog houms nou a Bia trunga, houmd iwan Summa grajd und daß dou schei gwajn is. "Schod das hiatzt aus is" hot da Gospa gsoat wias hoam gounga hand.

Am Mouta houn sa sie richti plogn miaßn. Sou schwa hand die Houwlbäjnkwajn und da Moasta woa nimma da jingsti, do hot hult da Gospa meha oupocka miaßn, daß gounga is. Z Mittog hot da Franzl Vajda gsoat, da Gospa sull zan Ejssn ahi kajma, die Weiwa wüllns a sou".I houn jo sülwa wos mit", hot da Gospa gsoat, hot s Blahl wajg tou, hot si o'putzt und is min Vajdan i'd Stum ahi gounga. S Ajsszeig is schou am Tisch glejgn und d Agnes hot eahm an Stuhl hi'gricht und hot gsoat "Gospa, do kounst die heasitzn". Ea hot si hi' gsajssn und wia d Moastarin mit da Suppm kajma is hot a "griaß ajng Goud Moastarin" gsoat, wal as recht söln zan seha griagt hot. "Griaß di. Gospa" hot si gsoat und "loßt's ajngs schmajka"sie is af ihan Plotz gounga und daun houms den "Engl des Hean" bet, grod sou wia dahoam. Da Gospa hot si ah nit schiniacht, ea hot jo ah schou ba Bajßani gajssn und hot gwißt wos sie ghäacht. In Lajffl hot a nit i'd Faust gnumma und hot nit gschmatzt und nit grajd, danoh hot a si s Mal mit an Tiahl o'gwischt, wos am Tisch glajgn is und hot gwoacht wias weida geht. Maunchi houmd nohn Eissn noumol bet, Ounani hand afgstoundn und an d Oawat gounga und Oa hand sitzn blim und houmd nouh dischgariacht. Da Vajda und die Ounan hand sitzn blim, ah da Gospa und ea hot gsoat "vagölts Goud Moastarin fia s Ejssn, sou wos Guats houn i schou loung nimma ghot". "Tua mi nitt goa sou geina" hot d Moastarin gsoat, "dos is' a Ejssn gwajn wia ulli Tog, göll Voda". "Jo" hot da Franzl gsoat "wia je'n Tog und sou wia uwal und hiatz miaßn ma uns iwaleign wias weida gajh koun, wal ma dajs Joha do oum gowat haum, is fia die ounan Leit nix meha gmocht won. Gospa, wunst sunst nix voa host, kounst ma dabei hölfm, wos moast". "Mia was schou recht, wal i jo nou ninast noh gfroat houn, wuns mi brauha kinnts, hülf i ajng ,geen". Mitanauna hands i'd Weakstott umi gounga und houmd gschaut, wos zeascht zan mocha is. D Weiwa houmd uiß in a Biachl ahi schriem, saj houn in Vodan nit in Koupf vull mocha wülln, wal a min Heisl bau, eh schou zväüll ghot hot. Da Vajda hot dos Biachl außa tou und mitanouna houms gschaut, wos zeascht zan mocha is. "Do wa a Schubkostn und a Truha fian Stroihaun, dos is nit sou trawi owa in Hounari miaß mas gleich mocha, saj Toichta heirat und daj kinnan ma nit woachtn lossn, saj wülln an Kostn, a Truha, a Gläjsakastl, a Bajtt, an Tisch und via Stiahl, do muaß i zeascht amol hie gajh und mit ihn rajn".

Hiatz is d Agnes i'd Weakstott kajme und hot gsoat "Voda g,rod is da Beagignaz do gwajn und hot gsoat sa Muada is gstoam und ajs sullts zan Majstn afi kajma". "Na" hot iha Voda gsoat "zeascht muaß i zan Hounari, hintari, daj brauhand d Aussteia fia d Toichta, i gajhn gleich und ajs Zwoa kinnts dawal d Houwlmajssa und d Stajmmeisn schleifm, daj wean ma nochhea ouft brauha und am Bau hands nit bejssa won". Ea hot in Rouk und in Huat gnumma und hot gsoat "i kim jo bold"

und is gounga. Da Gospa hot eascht d Stajmmeisn ougschaut, hot a boa af d Seitn glajgt und die Ounan zan Schleifm heagricht. D Agnes hot eahm dabei zuagschaut und hot'n gfoat, wia a si s Lajm weida voastüllt.

"Woast" hot a gsoat "wajgn vos sull i do loung driwa spekalian, s Lajm geht weida oub ma wüll oda nit. Glick is netta Ajbüldung. daj mouchi Leit houn, i houn koas und muaß damit zfriren sa". "Und bist du damit zfriren" hot d Agnes gfroat "Wea koun dajn aus majn Lajm schou vos ounasts mocha, es is gaunz schei vazwickt und wia sull i do außa kajma" hot a gsoat und d Stajmmeisn af d Houwlbajnk glajgt. D Agnes is za eham hi'gounga und hot gsoat "oamol is jo dou uiß ounast gwajn, do houn i gmoot uiß is liachta won oafocha und i houn mi sou draf gfreit, daß uiß a wajng schajna wen kinat bis doun da Seewind wieda kolt dahea kajma is und du mi nit gwamt host und i in da KÜln stajh houn miaßn, woast dos hot schou weh tou". Ban rejn hot sie gaiinz nossi Augn griagt und da Gospa, dea zuagloust hot, hot a amol driwa wischn miaßn. Saj hand najmanouna gstoundn, hound in Koupf häjnga lossn und hound is Innari ahi gloust, wias doucht ausschaut. Noh an Wal hot da Gospa da Agnes sani Häjnd af d Ogsi glajgt und gsoat "Agnes, daß a die richti geen houn, muaß i dia nit sogn, dos gspiast jo sölwa und daß i uiß fia di toa tat, dos woast ah". "Frali woast i dos" hot d Agnes gsoat "ah s ounani woast i und wajgn dajn heirat mi". Da Gospa hot vos sogn wülln, owa d Agnes hot eham s Mal zua holn und hot gsoat "hiatz sitz di amol inna" und wia a gsejssn is, is's af sa Schoiß gsejssn, hot eham d Häjnd uman Hols glajgt und gsoat. "Du glaubst, i hin a recht vazougns Mejnsh, wal ma Voda a Tischlamoasta is, du glaubst i houn in Himml af deara Wölt und du kinnatst ma dos gleichi nit gajm. I bin die ültasti va uns Kina. In Oufoung, is's uns ah nit sou guat gounga. da Voda is bis Wulda zan oawatn ohi gounga, hot oldi Bajtta und Kastn zomrichtn miaßn und d Muata hat dabei ghulfm, ba die Kina bin jo i gwajn und wun daj vos ougstüllt houn, d Buam hand ouft recht wüld gwajn, houn i grod stajh miaßn, gschimpft bin i won und Schläjg hots ah äjfta gajm, ouft bin i woanat ajgschlofm. In Vodan haun is oamol gsoat, wia a mia an Hoihzeita brocht hot und i na gsoat houn. Sei't deara Zeit loßt ma da Voda ah ma Ruah und hiatzt frog i di noumol heiratst mi". A Wal is ruahi blim, bis da Gospa gsoat hot, "sou schwa is daj Lajm bishea gwejn, du oams Haschal und wajng an heiratn, woast dos iwa loß i dia und hiatz kim, mia miaßn nou vos oawatn".

Ea hot iha a Bussl gajm, hot die Stajmmeisn gnumma und mitanouna hands i'd Laum umi gounga, wou da Schleifstoa gstoundn is. Wias umi gounga hand hot d Agnes gsoat, "ban Vodan houn i ouft stundnloung weafn miaßn wunst du ah souloung braugst, sogs glei, oft schick a da d Muata umma". "Dos tatst" hot da Gospa gsoat "daun griagt hult daj Muata s Bussl". "Und dos tatst" hot d Agnes gsoat. "Wajgn vos dajn nit" hot da Gospa gsoat "is jo daj Muata". In Schleifstouck is nou a Wossa drin gwajn und die Zwoa hound min Schleifm ougfounga. Da Gospa hot d Stajmeisn netta a wajng nohschleifm miaßn, drum hots ah nit loung daucht, bis fiachti gwajn hand. Wia da Gospa gsoat hot "dos hä'n ma,

mia ham fiachti", hot d Agnes gsoat "dos deaf jo nit woah sa und za dajn hät a da d Muata gschickt, bist wiakli fiachti". "Sunst dat is nit sogn, woast luign koun i nit und dia sogat i nia a U'woharat, glaub mas". Saj hand wieda i d Weakstott umi gaunga und da Gospa hot d Häjwl daj zan schleifen gwajn hand af d Houwlbäjng hi' gricht. Za da Agnes hot a gsoat, "du kounst nou za da Muata ummi gajh, bis i d Houwlmajssa zaum gricht houn, dauchts nou z'loung, mouchi braucht ma netta o'zuign und wunst sou loung nit kimmst, koun d Muata uiß Mäglichei dajnga". "Und wa dos sou schlimm" hot d Agnes gsoat und hot eham a Bussl gajm. "Frali was schlimm" hot da Gospa gsoat "woaßt voa die Leit tats ma nit vüll ausmocha, owa voa dajni Ülta mäjcht i nit sou schlecht do stajh".

Wia d Agnes gounga gwajn is, hot a si d Häjwl ougschaut. Ba mouchi hound d Majssa wiakli zan dabooama ausgschaut, a Moasta ba dejn a amol goawat hot, hot gsoat, ",af dein kinnat ma af Rom rajn". Oas hot a Schoachtn drinn ghot, guad das d Agnes wajg gwajn is, do häts sicha nit gsoat, "bist wiakli schou fiachti". Da Gospa hot d Häjwl zaumgstüllt, daj zan schleifm gwajn hand und daj ma netta o'zuign hot brauha, dazua hot a d Mejssa außatoa miaßn, ea hot a boamol min Houma am Houwl draf ghaut und schou hot si da Zwickl, dea s Mejssa holn hot, min Majssa außa zuign lossn. S Majssa und in Zwickl hot a zan Houwl dazua glajgt, daß as nit vawechselt hot wals zan Houwl paßt haum. S Mejßa mit da Schoachtn, hot a gnumma und is zan Schleifstoa gounga, daß d Agnes nit souloung drah hot miaßn, hot a d Schoachtn außa schleifm wülln. Zan richtin Schleifm hot as doun douh nou braucht. Bevoas sou weit gwjn is, is da Moasta hoam kejma und hot in Gospa gfroat, wia weit a min Schleifm is. " Wißts Vajda" hot da Gospa gsoat "d Stajmmeisn houn ma fiachti, d Agnes hot ma ghulfm und ban Houwleisn bin i am Schoachtn außaschleifm, do bin i nou nit gounz fiachti". "D Houwleisn koun ma schlecht alloa schleifm, do muaß ma schou za Zweit sa" hot da Vajda gsoat "und da Hounari will a recht a schajni Ausstei, daß a si nit schouma muaß, hot a gsoat, da Kostn und s Bajtt sulln aus Biarani Brejta gmocht sa und da Tisch aus an Keaschbam. Do muaß i schou oub i daj in Wulda griag sunst miaßat i ohi af Schwoazboh gajh". "Vajda" hot Gospa gsoat "i hät a groiße Bitt, deaf i d' Agnes heiratn, wißts i houn nix und i bin nix und koun netta oawatn owa daß i uiß fia sie toa wüll dos deaf's ma glaum". Da Franzl Vajda hot nix sogn kinna, goah zgah is kajmma. ea hot in Gospa ou'gschaut und noh an Wal hot a gsoat, "Gospa du wülst unsa Agnes heiratn, host's ah guad iwalajgt und wos soat d Agnes dazua, host schou mit iha driwa grajd, woaßt d Agnes is a bissl hoigli, iha paßt nit a jeda, du wast ma schou recht und daßt nix host, ah mia houn oam ou'gfounga und houms za a wejng wos brocht. Hiazt gajnga ma za die Weiwa umi, wal daj miaßn's jo zeascht wissn, daß sa si richtn kinnan".

Saj hand i d Stum ummi gounga und da Vajda hot den Weiw an gschrian, daß aha kajma sulln. Wia ulli banauna gwajn hand, d Miazl, da Agnes iha Schwajsta is ah grod do gwajn, sie hot in Schwoazboh ban Hamala in Wiachtshaus s Koucha gle'nt, hot da Voda zan rajn ou'gfounga. "Grod hot ma da Gospa gsoat, daß a unsa Agnes

heiratn wüll und oub ma nix dagajn houm, wal a nix hot und nix is. I houn eham gsoat, daß a mia schou recht wa,ajs wißt's jo, daß af mi alloa nit ou'kirnt,af z'eascht miaßat ma d Agnes frog owa i frog eascht d Muata, wos daj dazua soat. D Moam hot nix sogn kina, iha hand die Joha daj'si:mitanouna glajbt houm dun Koupf gaunga und hiatzt af oamol sull's aus sa, sull's iha Agnes valuisn. "Na dos geht nit" hots gsoat, "si koun mi douh nit alloa ba di Mouna sitzn lossn" "Muata" hot d Agnes gsoat,"wun i enta gheirat hät, wa i haj't nimma do und das ma i dana Nähat blajm,dafia wia i schou soagn". "Frali dos soast hejt, owa wos is danoh" hot d Moahm gsoat."Daun is da recht, daß d Agnes in Gospa heirat", hot da Vajda gfroat"? "Jo recht is's ma schou, nea wos sull i ou'ne si toa", hot d Moham gsoat. Da Vajda hot doun d Agnes gfroat ous damit ajvastoundn is, si hot netta "jo" gsoat und dabei in Gospa sou glickli ou'gschaut, daß eham gounz woam um's Heaz won is. Da Gospa is hiaz afgstoundn und hot gsoat, "i mäjchat hitzt ah wos sogn", ea is za da Moahm umi gaunga, hot iha d Häjnd af Ogsi glajgt und hots gfroat, Moahm gajbts ma d Agnes, i paß schou af sie af und sie sulls guad ba mia hom". "Gospa nimms nua, i woäß daß ba dia guad afghajbt is" hot d Moam gsoat. "Dounk ajng schei Muata" hot da Gospa gsoat und hot iha a Bussl geim.

Nochhea is a zan Vajdan gouna und hot gsoat, "Voda i doung fia dos Vatrau'n wos mia schajnga doachts" und ea hot eham fajßt d Häjnd druckt Da Miazl hot a ulli zwou Häjnd af d Ogsi glajgt und gsoat "is da recht daß i daj Schwoga wia uda host wos dagajgn". "Na nimms nua", hot d Miazl gsoat "doun houma schou oas wajniga, owa daß koani Klogn kajman, wal doun griagst is mit mia z'toa". "Dos wiad's nit brauha" hot da Gospa gsoat, "i muaß nou wou higajh, i bin gleich wieda do". Ea hot in Huat gnumma und is ba da Tia außi. "I mäjchat nea wissn" hot d Agnes gsoat, "wos a hiaz wieda voa hot, nix gscheits kouns nit sa". "Los'n" hot d Muata gsoat "ea woäß schou wos a toa muaß, mia kinan dawal a kloani Jausn mocha" und gleich is's wajg gwajn. "Miazl kim mia gajngan hölfm"hot d Agnes gsoat, und da Franzl Vajda is alloa i da Stum gsajssn und hot noumol uis iwadajnt, daß heiratn wülln owa woun und wia, do driwa is nou nix grajd won. Am Gospa hot a nix zan aussajtzn ghot, ea is fleißi gwajn sposoum und agarat und d Agnes is sölwa schou sou gscheit, daß woäß wos tuat. Loid hots eham schou tou, daß hiaz sou schnöll va dahoam wajg hot wülln, sie wiad uns schou o'gajh wuns nimma do is. Dos is eham in Koupf ummatum gouna bis da Gospa wieda kajma is. Voda" hot da Gospa gsoat wia a in Huat afghäjngt hot "Heiratn Heiratn ausmocha und nix tringa, dos geht nit, i houn uns van Wiachtshaus a Bia ghült, daß ma nit sou trucka do sitzn"."I hät jo ah droudajnga kinna" hot da Franzl Vajda gsoat, "d Weiwa wülln a Jausn richtn und danoh kinnan ma iwa uis rajn". "Jo" hot d Miazl gsoat, daj wieda i'd Stum aha kajma is, "a Hoizat ausmocha und nix zan tringa griagn, dos gaz jo netta ba recht knausarigi Leit, wun da Gospa nit gouna wa, hät i wos springa lossn". "Miazl rajd nit sou vüll und hul fia ajng Weiwa Glasl, mia gölts Voda, tringan liawa aus da Floschn"."Frali" hot da Franzl Voda gsoat "do

schmajcks am bajsan" und dawal d Weiwa mit da Jausn kajmma hand, hot koana meah wos gsoat

Nohn Jausna houms iwa d Hoizat grajd, d Agnes hot gsoat sie wüll nit souloung woachtn, sou bold wos geht und nit groß mäjcht sis hom. In Gospa is uis recht gwajn und da Voda und d Muata houn ah nix dagajgn ghot. "Do miaßn ma zeascht zan Pfoara af Wulda gajh und oft kinnan ma eascht uis ounani danoh richtn, um a Hiawa muaß a mi ah nou umschou, wal heiraten und nit wißn wou hi', dos is ah nix", hot da Gospa gsoat. "Du Voda" hot d Muata draf gsoat, "die Zwoa kinatn douh ban Stubani amol oufrogn, da Simou Vajda is za sani Kina gounga und s Stiwl is hiatzt laa, dos wa schaj, do bleiwatns i da Noihat". "Dos wa schon schaj wun ma do ahi kinatn" hot da Gospa gsoat' "göl Agnes". "Frali" hot daj gsoat "schaj was schau, wunst du danoh af d Oawat gehst haun i ma Muata i da Nähat und i bin nit sou alloa". Saj haum hiatz woachtn miaßn wos da Pfoara dazua soat und woun d Hoizat is, gleich moagn wülln's af Wulda is Pfoaoumt gajh houms nou ausgmocht.

Am ounan Tog hands gleich i da Friahe af Wulda i'd Friahejß gounga und gleich danoh in Pfoahouf, wous d Käjchin zan woachtn is Studiazimma ahi lossn hot, bis da Pfoara kejma is. Es hot eh nit loung daucht und wie a kajma is houmt die Zwoa, "gelobt sei Jesus Christus" gsoat und s Krejz gmocht, "in Ewigkeit amen" da Pfoara. Daun hot da Pfoara gfroat, "ajs mäjchats sicha heiratan, daß za mia kajmmts. Sunst wißt i nit wos i fia ajng toa kinat". "Jo" hot da Gospa gsoat, "und wuns geht recht bold" d Agnes draf. "I wüll jo nit moan, daß ajs miaßts" hot da Pfoara gfroat und hot die Zwoa ou'gschaut. D Agnes is roit won, hot van Pfoara wajg geschaut und gsoat, "miaßn toan ma nou nit, owa da Gospa is dahoam iwari, mia houn uns recht geen und majchatn mitanouna hausn und zwajgn dajn wüll'n ma sou schnöll wos geht heiratn". "Sou schnöll gehts ah wieda nit", hot da Pfoara gsoat, "ajs miaßts via mol va da Kounzl vakind wen und an da Kiratia muaß ma ajng ah nou aushäjnga, wal dajs sou Voaschrift is". "Hea Pfoara" hot d Agnes gfroat, "woun gehts dajn daun nou". "Jo mej" hot dea gsoat, "i schau amol" und ea hot in Kolejna gnumma, "wun mas sou schnöll mocha sulln, kina ma jo am Noumenstog va unsara "Gloawüadign Jungfrau" s eashti. mol vakindn und drei Woucha danoh, Ende Septajmba uda Oufourig Oktouwa, dos tat nou gajh". Do kinatn ma jo am easchtn Oktouwa heiratn, wunns in Hean Pfoara recht is" hot d Agnes gsoat. "Dagejgn houn i nix" hot da Pfoara gsoat " und wuns is sou trawi hobts, kina mas am easchtn Oktouwa richtn, ajngani Tafschej' hand jo do, hiatz sogts ma nou ajngani Nam und wouns geboan habts, daß a mas afschrejme koun und daunn ham ma fiachti, owa drei mol miaßt's nou za mia i'd Christleha kajma, jedn Dunastog af d Nocht um siemi". Die Zwoa hound dos uis ou'gajm, hound "pfiat Gout Hea Pfoara" gsoat und hand froih und glickli hoam gounga. In Uabachl, hot da Gospa gsoat, "woaßt wos, noh dajn Ulln kinan ma nit gleich hoam gajh, mia kehan ban Hounasn Wiacht aj', is da recht". "Jo recht is ma schou" hot d Agnes gsoat, "a woama Tee tat ma gounz guat und a Wal rostn tat ah nit schon".

Saj hand ahigounga und wal netta d Moham dahoamd gwajn is, hot si's i' d Kuchl mit gnumma. Da Gospa hot d Moahm va enta amol kejnnt, wal da jingsti Bua wia eha in Wulda gl'ent hot, is a a boa mol mit san Moasta doucht gwajn. "Mej" hot d Moham gsoat "siagt ma di ah wieda amol, du bist jo va Rotschlog und wos koun i fia ajng toa". "Mia mäjchtn an Tee, sou oan wia man ba da easchtn Kouminioun ghot houn, wuns geht, mit uns brauchts ajng koa Oawat mocha". "Ah na" hot Moham gsoat, "a Fui houn i nou und s Wossa is schölll hoaf, ajs miaßts hult nou .a Walei woachtn und bis sou weit is, dazühlts wias ajng geht und wos toachts".

"Jo wißt's Mohan" hot da Gospa zan dazühlri ougfounga, "wia i in Wulda ausgle'nt ghot houn, bin i in Ästarei a wajng umatum gwoundat, i houn ma doucht d Oawat ougschaut, houn amol doucht und do goawat, bis mi wieda hoam zoug hot, hajt ham ma ban Pfora gwajn, mia mäjchatn heiratn und wal ma do voabei gaunga ham, houn ma awajng ajkehan wülln und wos tuat dajn ajnga Peda, hot a a schejni Oawat, i houn schou loun nix meha va eham gheacht". "Jo unsa Peda dea oawat ba den Fiaschtlichn, in Summa is a af da Au" hot d Moahm gsoat "und in Winta hülft a in Hejga ban Hultz, s Wossa is woam gleich kinnts in Tee griagn".

Sie is zan Oufm hintari gounga, wou af da Gspoa a Häjfal mit kouchatn Wossa gstoundn is, doucht hot's an schwoazn Tee ahi tou, zuadajckt und aft d Seitn gsüllt. Sie hot van Gläjsakastl drei Glasl außa tou, hot in Zuga und d Rumfloschn dazua gstüllt und hot gsoat, "a Wal miaß'n man nou zuign loßn, oft is a fiachti. In Winta hot da Peda ban Hultzkugln hölfm miaßn und dabei is a ausgrutscht und is hintarucks am Bugl gfoln, in Krajz hots nix tou owa s Oaschhagl hots eham zoug Haut, daß a viazej Tog nit liegn und sitzn hot kina. Goud sei dounk is wieda uis guat won. Sie is gounga hot in Tee brocht und hot gsoat, "hejt tring i ah oan mit ajng, do kinan ma glejh weida dazühl'n göl du bist da Gospa, sou weit i mi erinnan kou und wea is daj Zukimftigi, wos schaj's und agrat's host da ausgsuacht, i wunsch ajng uis guati und daß glickli weachts mitanouna". "Daunk schej Moam, dos kinan ma guat brauha" hot da Gospa gsoat und hiatzt hot ah d Agnes zan rejn ou'gfouriga.

"Wuns ajng recht is, sog i ah Moham, i bin d Toichta van Franzl Tischla va Stejgnwold und wal da Gospa dahoam iwari is, houn ma uns zouggrajd daß ma heiratn". Wias in Tee austrunga ghot houn hot da Gospa gfroat, oub a nou a Bia und fia d Agnes a Glasl Waj' griagn kinat. "Frali" hot d Moham gsoat, i bring ejngs gleich" is afgstaundn, hot's i da Goststum ajgschajnt und die Zwoa i'd Kuchl außi brocht. Da Gospa hot gleich zohlt und wal a in Tee va da Moham ah mitgrechnt hot is da Moham nit recht gwajn, sie hot gsoat, "dos is jo zväll, do muaß i jo ajng nou wos außa gajm". "Na" hot d Agnes gsoat, "dos is schou recht und da Tee is wiakli guat gwajn, i bin froih, daß ma ba ajng aha gounga ham".

"I muaß ajng hiatz alloa lossn, bleibts sitzn i muaß fia d Drajscha, daj ma hajt houn s Najnibrot mocha" hot d Mohm gsoat und is i'd Goststum außi und di Zwoa hand alloa i da Kuchl gsejssn. "Bist glickli." hot d Agnes in Gospa gfroat, ea hot iha i'd Augn gschaut und hot gsoat, "woaf Agnes i fluig in a Wulkan, uiß is

sou leicht und schei und va dia geht wos woams douna, sou wia va mana Muata wuns mi als Ki ' in ihari Oam gnumma hot, mia is wia wun i goa nimma do af da Wölt wa". "Und wou bin i,"hot d Agnes gfroat, "host mi wieda i da Kühln stajh loßn"? "Na Agnes,oamol is viakajma, do houn i sou vüll nit gwißt und daß i hajt da glickligsti Majnsch af da Wölt bin, dounk i dia und i wias ah nia vagajssn". D Agnes hot eham gounz glickli zuagloust und wal a i.ah Häjnd holn hot, sou wia wun as nimma valuisn mäjcht, hot's eham a Bussl gajm. Saj hand nou, a Wal sitzn blim, es is a sou gwajn wia wun koas den schajnstn Traum dajns mitanouna ghot houn af holn hätt wülln. "Gospa" hot noh a Wal d Agnes gsoat "kim mia miaßn hoam gajh". S easchti mol hots gsoat mia miaßn hoam gajh, in Gospa hot dos ajwajni sou guat tou, "jo" hot a gsoat "gajnga ma hoam" und mit pfiat Gout Moham hands gounga.

D Agnes hot sie ban Gospa aj'ghäjngt, sie hot schwari Fiaß griagt "woaßt" hot's zan Gospa gsoat, „in Wei' bin i nit gwount und in Tee, is ah souvüll Rum drin gwajn, du bist jo do und bringst mi guat hoam". "Du kannst die af mi valossn, i bring die, woust ah bist, va iwarol guat hoam, gfreist die schou, wun ma nochhea alloa af d' Nocht banouna sitzn, uis is ruahi, netter du und i, iwa uis kinan ma rajn, woast es wiad sa wia in Himml". "Jo und du nimmst mi in Oam und gibst ma a Bussl und i druck mi fajst an die und ulli Zwoa ham ma glickli und zfrien, wal ma banouna ham". Es is mit weit va Uabachl bis in Stejgiwold und wias za die easchtn Heisa kajma hand, hot d Agnes in Oam van Gospa nou a wajng druckt und hot gsoat, "es schickt si nit wun uns wea siach't am liawan tat is gounzi Lajm mit dia sou weida gajh, owa wajng die Leit kinnan mas nit mocha". "Ah i" hot da Ciospa gsoat "mäjchat mit dia sou wajda gajh, sou loung wos ma lajbn mäjcht i die ba mia hom, owa zeascht miaßn ma nou ban Stubani s Stiwl au'schau, grajd houn ma jo mit eham schou nohn Rosnkraunz beten ba da Beag Ignazin, mia kinan is Stiwl ahi".

Wias ba da Agnes dahoam gwajn und i'd Stum ahi kajma hand, hot d Muata gleih gfroat wias gwejn is. "Muata" hot d Agnes gsoat "du wiasts nit glaum, mia kinan am easchtn Oktouwa heiratn" und voa lauta Freid hots is in Oam gnumma und iha a Bussl gajm. "Wos host gsoat "schou sou bold, do weam ma jo goa nit fiachti, wos glaubts wia vüll Oawat dos is, bis ma uis gricht hot und oft nou koucha und bocha und". "Muata" hot da Gospa gsoat,"do braucht's ajng nit otoa, es hand jo nou viaWouchan und wun ma ulli hölfm, wiads schou gajh"."Muata mia miaßn gleih zan Stubani umi gajh" hot d Agnes gsoat, "wißts, mia mäjchtn s Stiwl ou'schou, wal mas voa da Hoizat nou ajrichtn wülln". Saj houmd s Feichtagwound o'zougn und s Weachtagwound ougloat und hand s Stiwl ou'schau gounga.

Ban Stubani is nea sie dahoam gwajn, die Ounan houmd Eadäjpfl grom und daj hot gsoat, "schauts ajngs nua au, ma Mou hot ma schou gsoat daß ajs kajma weachts, ajs kinnts za mia Resi sogn, daj boa Joah wos i ülda bin lougan nit za na Moahm". "Mi kajnnts jo schou und dos is da Gospa, ea wiad maj Mou und wal ma schou i via Woucha heiratn, mäjchtn ma voahea s Stiwl ajrichtn" hot d Agnes

gsoat. Saj hand umi gounga und dabei hot d Resi gsoat, "da Voda is fuacht gounga und hot uis liegn und stajh lossn, uis is do, ajs kinnts gleich ajzuign, und wos ajng nit gfollt rauma ma aua". Saj hand is Stiwl ahi kejma und es is wiakli uis do gwajn, a Tisch mit zwej Stiahl, dahinta d Ajckbjnk und a Oufm, af dajn ma ah koucha hot kiria, a Bajtt und a Kostn, s gounzi a bissl old owa ma hots nou najhma kina. D Agnes hot dawal die kloa Kaumma daj, dabei gwajn is ousshaut und za da Resi gsoat, "dos is uis sou gro und liacht, do gfolts ma schou" doun hots in Gospa gfroat "was moast dajn du"? "Mia is schou ah recht, dos koun ma uis stajh lossn wias is, netta s Bajtt wiad fia uns Zwoa a wajng z schmol sa wals netta a oaspanigs is und weiina mia ma ah nou voahea". "Woast Resi mia kajman af d Nocht nou mol umma und rajn mit dajn Moun noumol driwa pfiat die", hot d Agnes gsoat und die Zwoa hand wieda gounga. Af ' d Nocht noh da Suppm hans noumol umi gounga, wals min Jogl rajn houm wlln. Da Jogl is dahoam gwajn und hot schou af die Zwoa gwoacht. Danoh is ah' d Resi kajma und doun houms iwas Stiwl grajd. "Zescht mia ma weiina und dazua mian ma s Bajtt aui rouma, s Ounari kina ma zaum stlln" hot da Gospa gsoat. S Bejtt kina ma af Dln afi toa, do hots Plotz" hot d Resi gsoat, "und an Plotz fia' s Hulz kinna ma i da Laum hint mocha". "Woat Resi" hot d Agnes gsoat "i gfrei mi schou wuns sou weit is und mia ba ajng ajzuign kinan". "Jo da Winta is holt sou loung" hot d Resi gsoat "und do is's guat wun ma wajm i da Nhat hot, i gfrei mi ah schou wuns ba uns habts".

"Wajnga Bajtt" hot da Jogl gsoat, "kimmst moagn um siemi uma und oft rauma mas wajg, uis ounari kinnts jo aloa mocha, wuns wajm brauchts, z Mittog kim i hoam und do kinna ma wajda driwa rajn". "I glaub nit" hot da Gspa gsoat, "da ma nou wajm brauhan, i dounk schaj und hiaz mian ma hoam, guadi Nocht" und ah d Agnes hot "guadi Nocht" gsoat bevoas gounga hand. I da Fria hands um siemi wieda do gwajn, ah da Jogl is gleich kajma und die zwaj Mouna houm s Bajtt af Dln afi trogn. Danoh is da Jogl Eadjpfl grom gounga und di Zwoa hand mit anouna in Stiwl gwajn. "Sou, hiaz ham ma aloa" hot d Agnes gsoat ", sie hot si af an Stuhl innagsizt und hot zan Gospa gsoat sitz di a wajng hea za mia und gib ma a Bussl". Ea hot si hi' gsajssn und hot iha a Bussl gajm und gsoat, "maj wun mia sou weida oawatn kina ma af d Woucha ah nou hea gajh". "Lo uns eascht iwalajgn, wou ma ou'foungan" hot d Agnes gsoat. Da Gospa hot si in Stiwl umgschaut und hot gsoat, "als easchts mian ma in Oufm putzn, wal ma nit wissn koun woun a s lajzti mol grualt won is, an Boachtwisch und a Oskiahnschaufl houm ma da bei, owa an Kiahwisch fia d Oufmrhn brauhan ma nou. Agnes du kinatzt za da Resi umi gajh und frogn oubs oan hot". Ea is afgstaundn, hot in Boachtwisch gnumma und hot s Oufntial afgmocht. Do hot d Agnes gsoat, "Gospa" ban Oufm putzn foungt ma oum au, im Foll dat is nit woat, i gajhn hiaz". Wia d Agnes fuacht gwajn is, hot da Gospa d Plottn va da Spoa o'gringlt und hot gschaut wia da Zug za da Rhn umigeht. In starei hot a amol an Maura ban Oufmsajtzn zua gschaut und dea hot eham gsoat wos ma toa mua, da s Bochani schaj va da Rhn auakimmt "dos liegt netta am Zug" hot dea gsoat, "man kaun a stlln, da d Rhn i da Hh z



hoß wiad, uda intasi uis vabrajnt, drum muaß ma schau', daß i da Häh a kloas bissl weiniga Hitz hot wia intasi". Wia daun d Agnes min Kiawisch kajma is, haums sis Roah putzt und wal nit vüll außakajma is hot d Agnes gsoat, "da Äjhl hot nit vüll gschiacht, stunst häts meha Ruaß ghot. Wun mas gwißt hän, hän ma uns d Oawat spoan kina". "Jo wun mas gwißt hän" hot da Gospa gsoat, hiatz founge ma hult do au' und do sullt sou sa wia wuns Nei wa". Iwa da Rähn is a Ruaßdajekl gwajn und ah intasi und wia da Gospa in Ruaß und d Oschn wajg ghot hot, hot a gsehgn, daß da Maura dea dajn Oufm gsejzt hot, wos vastoudn hot. "Woßt Agnes" hot a gsoat "i moa i da Rähn koun ma ah wos bocha, ausschau' tuatz danoh". "Dos wa schou recht und af d Nocht bronni Eadäjpfl und a sauri Mil und in an Sunnta a Haummafleisch und Sajmlknäjl, meha koun ma si jo nit winschn", hot d Agnes gsoat und doun hands hoam gounge, wals in Kol und d' Weißwol nou richtn houm miaßn.

Noumittog houms gweißint, saj hand guat fiacht won, d Agnes hot a boa Scheitl Hulz va dahoam mit brocht und hot ajghoatzt, "daß bajßa trickat" hot's gsoat. Danoh hants a Wal banouna gsejßn, s Stiwl hot noh Kol gschmejkt in Oufm hot a Fuirei brunna und in Häjfal, wos af da Plottn gstoundn is, hot s Wossa gsejst, richti gmiatli is gwajn. In Gospa hots koa Ruah meha lossn, ea hot nou di kloa Koumma weißina wülln, ea is af gstoundn und hot damit ougfounge und d Agnes hot dawal d Stiwlbruck afgwoschn. Wias flacht gwajn hand houm sa si aj'richt in Tisch houms wieda is Ajck gstüllt, die zwej Stiahl dazua und in Kostn af die ouna Seitn. "Woast Gospa a wejng späali schauts schou aus" hot d Agnes gsoat, "wuns Bajtt nou aha kimmt bleibt nou ella Plotz, do kinat ma nou an Schublonkostn aha stüln, moast nit ah". "Jo schou" hot da Gospa gsoat, "wos wüllst dajn do ahi toa? A Truha bringst jo mit. do is daj Ausstej drinn, an Kostn houm ma fia' s Feichtagwound do und wunst nou an Schublonkostn braugst. daun griagst ah oan, du muaßt nua a wajng Geduld hom". Da Tog is sou lounsoum umigaunge wias banouna gsejssn und grajd haum. Iwa da Wulda, Schwoazboh zua, is da Newl lounsoum i'd Häh kralt und is bis Uabachl noh und noh dahea gwuslt kajma. "Moagn wiads wieda a schajna Tog" hot d Agnes gsoat, wias hoam gounge hand und da Newl iwa da Au gwowült hot. "Moast" hot da Gospa gsoat, "moagn miaßn ma i'd Kira gajh, do wean ma s eashti Mol vakind, gfreist die schou draf". D Agnes hot eham netta a' Bussl gajm und die Zwoa houm iwa den moagin Tog noh dajnt.

I da Friaht wias i'd Kira gounge hand, es is "Maria Geburt" gwajn, is Afgebot, daß heiratn wülln schon af da Kiratia gwajn. noh da Prajdi hot da Pfora vakind. "In den Stand der Ehe wollen sich begeben, der ledige, ehrsame Kaspar Teufel, katholisch und volljährig mit der ledigen und tugendhaften Agnes Watzl katholisch und volljährig. Für beide bitten wir die Gottesmutter um ihren Segen", danoh haum ulli mitanauna s "Gegrüßet seist Du Maria" bet. Noh da Kira hand die Rotschloga Mouna noh a Wal banauna gstoundn, haumd Viah ghoundlt und iwa die Nejikeitn dejs gajm hot dischgariacht Ah da Wastl is dabei gwejn und wia a in Gospa gsehgn hot, is ah glei za eaham hi' gaunge und hotn gfloat, "Is woha, du heiratst und sou

schnell is hiaz gaunga, göll d Agnes, dos is d' Toichta van Franzl Tischla". "Woäßt" hot da Gospa gsoat "Du woäßt jo wias ba mia Dahoam is und drum bin i frohj daß i do außa kim. Frali is fia mi a bissaj gah kejma, owa d Agnes hots sou hom wülln und wun d Weiwa wos wülln, is ambajstn ma gat noh". Wal d Stejgnwolda sou no und noh hoamgouna hand, is da Gospa a gouna und hot geschaut, daß a za sani Leit kajma is.

Am ounan Tog hot a san Schwiega Vodan i da Weakstott ghulfm und af 'd Nocht houn die Zwoa jo af Wulda zan Pfoara gejh miaßn. In Gospa hots nix ausgmocht, ea hot gwoacht wos do kimmt, owa d Agnes is schou a bissl afgrejgt gwajn, uwal wieda hots die zejhn Gebote oha gsoat und in Gospa gfroat oubs ah recht hand und ba den siem Haupt Sindn hots nit gwißt wias da Reih noh gajngan. Da Gospa hots uwal wieda trästn miaßn und hot gsoat "moch die nit varuckt und woacht wos da Pfoara froat, es koun jo ah sa, daß a uns netta wos dazühlt"- "Dos glaub i nit, wal d Steffl Nani gsoat hot, ba da Christleha hots da Pfoara sou vüll gfroat und wals nit uis gwißt hot, sou oag plogt, daß danoh nit gwißt hot oubs a Mandl uda a Weiwl is und dos geht ma uwal nou in Koupf um". "Woast" hot da Gospa gsoat "du woast jo meha und i koun da mounchmol hölfm, mia weans schou hinta uns bringa" und wals in Wulda schou zan Pfoahouf kajma hand houms nimma weida grajd.

Da Pfoara is i da Studiastum gwajn, ea hot d Prejdi fian Sunnta gschriem, hots owa gleich wajgtou wia die Zwoa, "gelobt sei Jesus Christus" gsoat houn. Ea hot "in Ewigkeit amen" gsoat "guat daß schou do habts, do kinan ma gleich Oufouna. Ajs wüllts heiratn und do muaß i ajng a boa Frogn stülln oubs ah dazua taugts, zeascht sogts ma amol mitanouna in Vata unsa af". Wia die Zwoa ougfouna houn, "In Namen des Vaters", hot da Pfoara schou gwißt, daß sis Betn nit valehnt houn. Ea hot si ah nou s "Gegrübet seist du Maria" und in "Engel des Hean" betn loßn und hots doun um die zehn Gebote gfroat, "Wal daj hot uns da Himmlvota gajm" hot a gsoat. Die Zwoa haum ah die zejhn Gebote gwißt, hiaz hot da Pfoara weida gfroat "wun ma heirat gibts a Hoizat, dos hoißt ba uns Ehe und dos is a Sakramajnt, kann ma oas sogn wos dos is". "Jo" hot d Agnes gsoat "ah die Taufe und d Fiamung und die Housti und die Buße". "Jo und daun gaz nou a boa" hot da Pfoara gsoat, "owa i moa wos dos hoißt uda wos ma dabei vasteht". "Hea Pfoara" hot da Gospa gsoat "dos is a kiachlich Houndlung daj uns sindigi Leit in Heagoud nähata bringa tuat". "Jo Gospa das host guat gsoat und hiaz häan ma af" hot da Pfoara gsoat und s nächsti mol rein ma iwa die biblische Gschicht". Ban hoamgajh hot da Gospa za da Agnes gsoat, "siagst es is jo goa nit sou schwa gwajn wias gmoat host" "Frالي" hot d Agnes gsoat "wal ma uis gwißt houn, wos wa owa gwajn wun ma stajcka blim wan". "Woäßt da Pfoara hät schou ghulfm" hot da Gospa gsoat und die Zwoa hand vüll leichta hoamgouna. Sou zwischn ahi hot d Agnes a mol gsoat, "wun i die nit ghot hät, i woäß nit oubs do ah sou guat gouna wa. Wia i zan Pfoara ahi kajma bin hound majni Fiaß oag ziattat, i moa, wun mi dea wos gfroat hät, i hät koa Woacht außa brocht". "Woast da Pfoara hot schou gwißt, wia a oufouna

muaß und min "Vata unsa" hot a uns d Oungst gnumma, daj ma vülleicht ghot hän".

Wias hoam kajma hand hots d Muata gfroat wias ihn gounga is und d Agnes hot gsoat "wun da Gospa nit gwjn wa, i glaub, daß mi da Pfoara hoam gah hätt lossn". "Sou loungsoum hot da Voda gsoat "miaß ma uns ah iwalajgn, wajm ma za da Hoizat ajlonan, wal vagajßn deafm ma neamd". "Wajm najhma ma dajn als Hoizatloda und d Agnes braucht ah nou a Brautkload und a Kranzl und fian Gospa brauha ma a Streißl, ah fia uns und ulli daj ma lonan" hot d Muata gsoat. "Jo und i." hot d Agnes gsoat, "brauh nou a Praungarin und woäß nit wajm i najhma sull". Moagn gajhn i wajgn dajn Brautkload za da Feri Nani umi", hot d Muata gsoat "oub's is i dea kuazn Zeit mocha koun, wuns nit geht miaßn ma af Wulda ohi gajh". "Moagn is ah nou a Tog" hot da Voda gsoat" und hiatz gajnga ma is Bajtt, daß ma i da FriaH wieda außa kinnan".

Am ounan Tog, d Mouna hand i da Weakstott gwajn, hound di zwou Weiwa ougfounga d Nam va die Leit daj zan ajlonan hand, af a Blattl Popia zan schreim. Do hand Vajdan und Moham, d Gäjn und d Goudina, d Gschwistakina und d Nohban und Ounani, daj ma ah ajlona miaßn. "Maj" hot d Agnes gsoat, "dos wean jo uwal meha, wun

da Gospa ah sou vüll hot, wiad da Tounz boum zkloa" " Den zwaj Buam miaßn ma ah nou schreim, daß kejman und ah d Miazl muaß hoam kajma sunst weam ma nit fiachti". D Muata is afgstoundn und hot gsoat, "hiatz gajhn i za da Fera Nani umi, wuns is mocht, kounst gleich zan oumajstn gajh, walst du zeascht fiachti sa muaßt" Sie is bold wieda kajma und hot gsoat, "d Nani mocht da's Gwaund, nua in Stouff dazua muaßt da sölwa kafm, wal sie koan passatn dahoam hot. Hiatz mißn ma schou, daß d Mouna wos zan ajssn griagn".

Wia d Mouna zan Ajssn kajma hand, hounds gleich gheacht, daß moagn zan ajkafm i'd Plou fohan miaßn, wal mas nit zlong außischuim kou. Da Gospo is gleich nohn Ajßn zan Baun umi gounga, ous moagn FriaH d Rouß griagn kinan. "Jo" hot da Hiasl gsoat, "moagn friah kinnts is schou griagn. Mia brauhans eascht Noumittog zan Eadäjpfl hoam foahn". "Daunk schei, mia miaßn i'd Plou zan ajkafm fohan" hot da Gospa gsoat "und wal d Weiwa ah mit wülln is bejssa mia najhman a Wagl". "Wuns is Wagl nejmts brauchts netta oas" hot da Hiasl gsoat, "do nejmts ma Fuchsl,. daj gfreit si schou wuns van Stoll außa deaf, ajs kajnts ajng jo aus wun va uns neamd do sa sull". "Jo" hot da Gospa gsoat, wa jo nit s easchti Mol pfiat ajng" und'doun is a gounga.

I da FriaH is da Gospa ums Rouß und s Wagl gounga und wal d Weiwa schou gwoacht hound, houms gleich wajgfohan kina. I da Plou houms s Wagl und s Rouß i da easchtn Wiachtschoft ajgstüllt und hand is Logahaus afi gounga. In Logahaus is netta da oldi Feachtl gwajn, dea mit an Greisatbajsn zoumkiacht hot, dea hot gfroat wos wülln und wia as gheacht hot hot a in Bajsn af 'd Seitn gloat und hot gsoat, "ajs habts schou zajhn Joha zspat drau. Domols hätts nou uis va uns griagt, owa hiatzt haum ma va dajn Zeig nix meha, do miaßts schou zan Loung

Schuasta ohi, dea hot uis wos brauchts und a Auswohl hot a, daß ma netta sou schou muaß".

Saj hand iwan Moaktplotz ohi gounga, af da Häh oum is d Kira gstoundn und va doucht ou' is da Guatwossabeag gah afigstiegn. Najm da Kira is da Wajg af Hounatschlog umi gounga und oha zua is d Schul und s Stajoumt und a boa kloani Kauflon gwajn und nou weida ohi da Miasaua wous is Wagl ajgstüllt houm. Wias ban Loungschuasta ahi. kajma hand, is netta ea sölwa drin gwajn und ea hots gfroat, wos wülln. Wia a ghäacht hot, daß an Stouf fia a Hoizat brauhan, hot a san Wei gschrian, wal a si do nit sou auskajnt hot. Sa Wei is gleich kajma und wias ghäacht hot wos wülln, wal d Agnes a blobs Gwound mäjgn hätt, hots gsoat "i glaub nit daß blob za dia paßt mia prouwians a mol, mia haum ajtla do, van vejgei blob bis schwoaz, mia foungan amol min vajgein au". Sie hot an Stouf, dea schei afgwicklt gwajn is aus'n Stulasch auða zougn, hot iha a Ajck iwa d Ogs glajgt und hots ban Spiagl gfroat obs iha ah gfolllt. "Jo gfollln dats ma" hot d Agnes gsoat "owa fia d Hoizat is a wajng z höll, a wejng wos dunkla sull schou sa".

Wal d Weiwa in Gospa nit braucht houm hot'n da Schuasta gfroat, oub ah ea wos braucht. "Wißt's a Pfoad an Krogn und a Brustlatzl brauhat i ah und doun nou Manschettn" hot a gsoat. "Dos houm ma uis do", hot da Schuasta gsoat und is af die ouna Seitn umi gounga, wou a Regal, intasi mit Schublon gwajn is. Ea bot a Bandl gnumma und in Gospa sajn Hols gmajstn. Doun hot a aus'n Regal ajtla Hajmada am Vakaftisch auða gloat und hot gsoat, ea sull si davou oas aussuaha. Da Gospa hotn ouschaut und gfroat, oub's ah passn. "A Pfoad" hot da Schuasta gsoat, "braucht netta am Hols wajnga Krogn passn und daj i do heagloat houn, houmd ulli daj Holswein". Da Gospa hot nit gwißt wos a fia oas najhma sull, am liawan hätt a da Agnes gfroat hot si owa schiniacht und hot doun a wajng a gstroafst gnumma. Da Schuasta hot oft nou an passadn Krogn und Manschettn dazua glajgt und ah Krognknäjpfl und Manschettnknäjpf. Ban Brustlatzl hot da Gospa wieda nit gwißt wos fia oas wos a najhma sull und do hot da Schuasta doun gsoat, "nit sou a steifs, wal do griagt ma foßt koa Luft". Do hot doun da Gospa oas gnumma und hot gsoat, "meha brauh i hajt nit ajs kinnts mas ajpocka, zohn tua i uis mitanouna". Ea is doun za die Weiwa hintari gounga und hot gschaut wia weit daj gwajn hand. Wia na d Agnes gsehgn hot, hot's gsoat "grod houn i da schraj wülln "schau amol wos ma uns ausgsuacht houm, bestimmt gfolllts da". Es is a blob greana Stouf gwajn, sou wias Wossa va da Wulda, wun d Stunn intagounga is und si da Wold drinn gspiaglt hot.

"Woäßt Agnes hot da Gospa gaoat "du kinnast uis oulajgn, dia paßt uis und i bin nea najgiari ob i die min Brautkload ah nou kajna tua". Wals in Oktouwa mounchmol, schou recht kolt gwajri is, houmd d Weiwa ah nou fia'd Agnes a Joupm aus Plisch ausgsuacht und an dazua passadn Krogn aus an Lammlföll. Da Loungschuasta hots zoumpocka ougfounga, dawal hot saj Wei zaumgrechtn. Wals nou a Kranzl und a Streißl braucht houm, hot da Schuasta gsoat, "dos houm ma nimma, mia houm koan Plotz dafia owa d Schneida Fanni, sie hot in Lodn gleich

intaholm Logahaus, ajs kinnts nit iagajh, wal a boa Staffl afi hand und in Fajnsa hots a Kranzl und a ' Strajßl häjnga, daj hot Kranzl, Streißl, Mascheian und Bandl und uis wos ma sou brauha tuat". Da Schuasta hot s Kafti noumol nohgrechtn und da Gospa hot zohlt, ea hot sani gaunzn Krejza zoumsuaha miaßn, daß as zom brocht hot.

Ban umigeih za da Fani Schneidarin hot da Gospa d Schwiegamuata gfroat, uob's eham a Göld leiha kaun, wal ea zwajng mit'gnumma hot, ea gibt ihas dahoam gleich zruck. "Woast Gospa" hot daj gsoat, "ba da Fani zohl daun i und dazua is d Agnes ah ma Toichta" Es is nit weit umi gwajn und suaha houms a nit miaßn. Wias ahi kajma hand is neamd drinn gwajn, netta a Gläjckei hot iagndwou gschewat. "I kim gleich" hot ma a Stimm ghäacht und noh an Walei is d Schneida Fani kajma. Sie hot "griäß Goud" gsoat und "wos mäjchts dajn". "Maj Agnes wüll heiratn" hot iha Muata gsoat "und do brauchan ma a Kranzl und wos dazua ghäacht" D Fani hot si d Agnes ou'gschaut und hot gsoat, "do miaßn ma a Kranzl mit wos grean najhma, wos host dajn fia a Kloadl, wal dos muaß uis zaumpassn". "Da Stouff fias Brautkload is a dunkls grea" hot d Muata gsoat und saj hound zan aussuaha ou'gfaunga. Da Gospa hot sie dabei zruckholn, van zoumpassn hot a nix vastoundn und ah nit wos ma do uis braucht. Ea hot

gsoat, "i gajhn und trog dawal s Packl ohi, mi brauchts jo eh nit" und ea is gounga und hot in Umtrieb am Moaktplotz zuagschaut. Weiwa hand ejkafm gwajn uda eascht gaunga, a boa haums recht wichti ghot, saj hand banouna gstoundn und hound dischgariacht und dabei mit die Häjnd umatum gfuchtl. Mouna hot ma nit vüll gsehn. Oana is mit a Scheibtruha afizua gfohan, a Maura hot voa an Haus an Haffm Saund umgschauflt und vojdan Logahaus is a Wogn mit Räjssa gstoundn.

Da Gospa is ouwan Oumtsgricht af die ouna Seitn umi gounga, do hot da Greawajwa sa Wiachtschoft ghot, danajm is a Bäjcka und a Fleischhocka gwajn und wal a boa Kina, mit Säjck, Schochtl und Binkeian dahea kajma hand, hot as gfroat, wos saj aj'kaft hound. Da gräßani Bua hot draf gsoat, "aj'kaft houn ma nix, mia wülln a Göld fia unsari trickatn Bloaman, wal da old Krouma kafts und wal ba uns in viazajh Tog unsa Kiachta is brauha ma a Göld". Wal d Weiwa va da Schneidarin außa kajma hand, hot a gschaut, daß a za eha kajma is und ea hot d Schochtl, daj jo nit schwa, owa recht u'gshickt zan trogn gwajn is gnumma und sou hands zan Miasaua ohi gounga. Ba dajn houms nou a Wal aj'keacht bevoa's hoam gfoahn hand.

D Tag hand schnöll vagounga, ah da Sunnta, saj hand s zweiti Mol vakind won und schou is wieda do Tog gwajn, wous af d Nocht zan Pfoara gajh houn miaßn. In Pfoahouf hot da Pfoara schou af saj gwoacht und nochn betn hot a gleich min Frogn ou'gfounga, "Wea koun ma va da Biblischn Gschicht wos dazühl?" "Zescht woa nua da Adam" hot d Agnes gsoat" und wal a sou alloa gwajn is, hot eham da Heagoud aus a Ripp d Eva gmocht". "Sej hand in Paradies gwajn", hot da Gospa gsoat, "hound koa Gwound braucht wals doucht woam is und houn si nit schiniacht wals nockat gwajn hand". "Sou is's ungefäh gwajn" hot

da Pfoara gsoat, "und wajgn wos houn sa si nit gschoumt uda schiniacht, wia da Gospa gsoat hot"? "Wals nit gwißt houn, daß nockat gwajn hand" hot d Agnes gsoat, "eascht wias in Oupfl. gajßn houn hands draf kajma". "Jo dos ah" hot da Pfoara gsoat, "d Eva is jo a Stickl van Adam gwajn und wajgn dajn houn sa si nit schouma brauha, wun hiatzt oa heiratn, weans wieda Oas und voaranauna brauhan sa si nit schinian". "Wals in Oupfl gajßn houn, da Heagoud hot in's vaboun" hot d Agnes gsoat, "houms van Paradies außi miaßn und a Ejngl mit an fuirign Schwert loßt neamd ahi". "Sou stehts i da biwlischn Gschicht" hot da Gospa gsoat und die Zwoa hound zwaj Buam griagt in Kain und in Abl und da Kain hot in Abl daschlogn und hot i'd Wölt außi miaßn". "Doun is da Noha mit san Schiff und da Sindflut" hot d Agnes weida dazühlt "und da Abraham, da David mit'n Riesn Goliak". Da Pfoara hot nua zuagloust Wal die Zwoa sou in dazühln drinn gwajn hand und ea nix drejrajn hot wülln. Da Gospa hot gleich weida gwißt, "da Moses, dea viazejh Tog i da Wüste ohune Ajßn und Dringa i da Hitz gfoßt hot und danoh hot a die zajhn Gebote van Heagoud als Stoaplottn griagt". Hiatt hot amol da Pfoara wos gfroat, "wos glaubts dajn ajs, wajgn wos as af Stoaplottn gschriem hot, ea hät jo ah wos ounas najhma kina"? Die Zwoa houn a Wal nohdajnt, bis doun d Agnes gsoat hot "wun da Heagoud af a Popia gschriem hät und s Blattl wa noß won, hät mas nimma lajsn kiria" und da Gospa hot gsoat "wos Gschriems kinat ma sou manipulan, daß nit d Woharat sa tat und koana kinat meha sogn, daß sou und sou is. Ba da Stoaplottn koun ma nix dustreih und ah nix umäjndan und dos wos draf steht koun ma tausnd Joah lajsn". "Voahea hot da Moses sani Leit va da Sklavarei in Ägibtn außagweist und ea is mit eha du's roidi Mea gounga, wal ehams da Heagoud sou. ougajm hot" sou hot d Agnes weida grajd. "Fia hajt miaß ma afhean" hot da Pfoara gsoat, af d Woucha rajn ma iwas heiratn und iwa die Gebote fia d Eheleit" und doun houms nou mitanouna in Ajngl des Hean bet, bevoas gounga hand.

Ban hoamgajh hot da Gospa d Agnes gfroat wia weit wos min hearichtn fia d' Hoizat hand, wal, i da Weakstott is nit driwa grajd won.. "Woaßt Gospa" hot d Agnes gsoat "bis hiatz houn ma koa Malhöa ghot, d Musi houn ma griagt, mit da Zughamanie spült da Hounsn Jakoub, dea a in Hoizatloda mocha tuat, dazua da Doumandl Kool mit da Klarinett und in Bumbadoun spült da Pedan Franzl" "Und ajs zwoa Weiwa hobts uiß fiachti griagt, daß mia Mouna netta in "Gest-hintari" oulajgn brauhan und af'd Hoizat gajh kinan" hot da Gospa gsoat. "Woaßt" hot d Agnes gsoat, "va ajng Mouna koun ma jo goa nix va lounga, ajs gehts i'd Weakstott, sogts nit mu und mäh und loßt's uns hudln, ouft kimmt wos gscheitas außa, wia wuns ajs drajrajn tats, owa woacht nua, mia gajbm au und ajs kinnts zohln". "Jo frali "hot da Gospa gsoat, "dos houn i schou kajma gsehgn, owa ajs kinnt's nit sou vül ausgajm, wost ma weacht bist" und wals hoamkajma hand, hot a "guadi Nocht" gsoat, hot iha nou a Bussl gajm und is ins Stiwl umi schlofm gounga.

Am ounan Tog, af 'd Nocht, es is schou foßt finsta gwajn, ban Tischla houms iwa d Hoizat grajd, tuats af oamol an Juhaza und a Wal draf an Krocha und danoh wieda an Juhaza und wias außi gschaut houn is a Bua draußt gstoundn, dea gsoat hot: "I bin da Hoizatsloda, ma Voda hot si in Fuaß vastaucht und ea hot gsoat fia eham sull i gajh, wuns ajng recht is". "Kimm nua aha" hot d Brautmuata gsoat, "do heraußt is schlecht rajn". Saj hand i'd Stum ahi gounga und doucht hot d Agnes gsoat, "sitz die inna und wia heißt dajn"? "Hoißn tua i Touni und wun i lodna gajh kou', brauh i die Nam wou i hi' gajh muaß". "Mia houn schou ulli Leit afgschriem, du kounst dos Blattl Popia gleich mitnajma" hot d Agnes gsoat, „owa eascht soast ma da Sprichl zan ajlona". "Jo woäßt" hot a gsoat "da Voda hot ma a boa gsoat, i moa hult, das dos wos i sogn wüll am bajßan paßt, ou'founga tua i wia ba ajng, min juhatsz, oft schuiß i und danoh juhatsz i wieda. Wun d Leit außa kajmand sog i juhu juho, da Hoizatloda is do, dos Brautboa lond ajng heazli aj, ajs süllts am Sunnta af Stäjgnwold gajh, loßt ajng nit afholn und bleibts fajßt drou, wal d Agnes van Tischla griagt hiaz an Mou". "Guat host dos gsoat" hot d Marie, da Agnes iha Muata gsoat, "und hiazt griagst a Stampal Schnops fia's lona" sie is gounga und hot eham an Weiwa Schnops, an Fajnjchlschnops am Tisch hi'gstüllt, "tringn nua" hots gsoat "dea schod da nit". Da Toini hot'n trunga, "sakara is dea guat, hot a gsoat "du sullst nit schön, dos steht schou i da Biwl", hot d Marie gsoat. "I woäß schou, owa dea woa hult sou guat" hot a gsoat, hot's Blattl zan ajlona gnumma, hot "dounk schei" gsoat und is gounga.

A boa Tog danoh, es is schou um najni und finsta gwajn, hots draußt wieda an Juhatza tou und wias außi gschaut houn, is da Touni draußt gstoundn. Ea bot an Huat mit foabigi Bandl af ghot, in Lonastecka mit Maschln und a Hoizatsträjßl am Rouckgroggn. "Schuißn tuast nit" hot d Agnes gsoat" wals in Oiwaschl nit guat tuat". "I hät eh nimma schuißn kina" hot da Touni gsoat."i haun koani Gapsln meha, ma Voda hots ohzühl ghot und wal i in Ejggatschlog zwoamol houn schuißn miaßn, d Moam hot gsoat d Nobban miaßn's ah häan, gehts nimma". "Geh aha" hot, da Gospa gsoat "und dazühl wias gounga is". "Eascht bin i af Uabachl gounga", hot da Touni dazühl, wias i da Stum drin gwajn hand "do houn i gschaut, daß schou a wajng dusta gwajn is, wal zan schuißn muaß ma ah wos seha, netta da Krocha alloa bringt's nit, danoh bin i af Ejggatschlog und nohn Rotschlog bin i hoam, ulli houn si gfreit, daß i kajma bin und iwarol. hätt i ahigajh sulln. Fia's Lona houmt ma die meistn a Göld gajm, a hoa Stampaln Schnops houn i ah tringa miaßn, koan sou guatn wia ba ajng , mouchi Leit hand sou afdrigli, daj houmt gsoat, a Hoizatlona muaß oan tringa". "Hot a da gschod, wüllst nou a Glasl" hot'n d Agnes gfroat? "Na hajt nit" hot a gsoat "gschod hot a ma nit, i bin netta a wajng damisch davou won. hajt houn i eh schou zfüll trunga, hiazt pfiat ajng und guati Nocht" und fuacht is a gwajn.

In Pfigstn ban Braoutoumt, hots ella Leit ghot, do hand Rotschloga, Stajgnwolda und Wuldina gwajn. D Brautmuata is va Wulda gwajn und do hot da Kirachoa s Liad "Hier liegt vor dajner Majestät" gsunga und wal dos ulli kinna houn, hot mas

bis zan Mooa ohi ghäacht. Da Steira Adolf hot nochhea gsoat, eha hot sou laut gsunga bis d Kiazn am Oltoa zan woggl'n ougfounge houmt.

Af d Nocht nohn Fuadan hand die ajglo'na Leit und d Musi kajma und gounge is bis i da Fria. Um sajgsi, is netta meha a Tisch min Brautpoa und mit Mouna dogsajssn. S Brautpoa hot schou enta gajh wülln, do hot da Hounsn Jakoub gsoat "ajs kinnts uns jo nit alloa sitzn lossn, bleibts nou a Wal do, mia gajngan jo ah wun ma austrunge houm". Wal owa da old Hausa va enta amol zan dazühln ougfounga hot, hand ulli, nou sitzn blim. Da old Krana is a Vajda van Gospan san Vodan gwajn und wal a va Spitznbeag gwajn und als Vihahoundla iwarol umamatum kajma is, in Rotschlog is a daun sitzn bilm, hot a van groß'n Wold, van See dea vawunsch'n sa sull und van Schroat dazühlt. Bevoa a ougfounge hot, is d Gschicht van Wülldiab dazühlt won, dajn da Hejga, Sauboastn in Hintan ahi gschouß'n hot und dea, da Rasiera hot nit ulli außabrocht, via Woucha am Bauh hot schlofm miaß'n, wal daj, daj nou drinn gwajn hand, außaschwian houm miaß'n. " Wal ma schou ba die Hejga ham" hot da Krana weida dazühlt, muaß i ajng va mana Hoamat wos dazühln.

Do is amol a sakarischa Hejga, d Leit haum a nit mäjgn, gounz af d' Häh afi gstiegn, d Bam wean do oum uwal kleana und ihari Wuazln hand ouft va da Dre'd heraußt, sou wia wuns af ihn stajh miaßatn. Stoana hots, daj enta amol va da Häh oha gsaußt hand, do oum is da Hejga umatum gounge, bana Liachtung siacht a af oamol an Rehbouck stajh, old und gounz grab is a schou gwajn, a Gwiclitr hot a ghot, vulli Roisn. Ea hot loungsoum s Gweah oha tou und hot gwoacht bis a eham s Blat'l zua draht, doun hot a gschouß'n. Da Bouck hot an Sotz gmocht, hot noumol zruck gschaut hot's Locha ou'gfounge, daß in Wold und oum af die Fül'n ghüdat hot und is davou grajnt. Woucha loung hot a dos Locha in Oiwaschl'n ghot und nua loungsoum is vageunge, sou hot'n da Schroat aus glocht, dea do oum hausn sull.

"Jo wißt's da Woldgeist" hot doun da Leitna gsoat "ella hot ma va eham enta ghäacht, oub wos Wohas drau is, mouncha glaubts, gsehgn hot n jo neamd". "Man Äjhl san Vodan" hot da Gospa gsoat, "hot a trogn miaß'n, ea woa nou recht kloa und hot nou nit schnöI rejna kina. Die Kina hand Schwoazbeejn broucka gwejn und do is a oags Wajda kajma, saj houmt nit gwißt wos toa sulln, do is da Schroat kajmma und hot's i'd Toafhitt'n ohi. tou. Wal da Kloani nit mit kajmma is, hot an am Oam gnuma und is mit da Schwoaztbeejnkaul und min Buam za da Hitt'n ohi grajnt, mia sogn hult Wold Vajda, wal Geist is koana". D Hanni, d Wiachtin is ah nou ba eha gsajssn und hot hiaz gsoat. Enta amol hot ma meha van Schroat gheacht, ea sull recht Leitschaj sa und oum ban Bläcknsto'a hausn, sehgn loßt a si nit geen, wal d Leit Oungst va eham houm, trinks aus, i mäjchat is Bajtt gajhn und ajs miaßts ah nou a wajng schlofm". Da Schroat hot ban Fajnta ahi schaut und wia va eham d Rajd gwajn is, hot a si gfreid, daß'n in Gospa sani Leit nit vagejssn houm.



Die Zeit is uwal schlechta won, nit fia ulli, owa d Houndwears, d Maura, d Zimmaleit und d Tischla houms schou gspiacht.

Da Fiascht hot wieda amol a Göld braucht und in Krummau houms koas ghot. Do is sou a Gscheita gwajn, dea gsoat hot, wun ma an die Leit d Hajsl und an Grund vakafm, dos bissl Zins was daj zohl, kinat ma am Sunnta in Klingbajtl ahi toa, wa schou was, mit dajn ma rechna koun und wal da Fiascht dos ah sou gsehgn hot, haum d Leit, daj kina houm was ogläst.

Da Gospa hot nou a Zeit ba san Schwiegavoda goawat bis a gsehgn hot, daß ba dajn d Oawat wajniga wiad und ea hot si sölwa a Oawat gsuacht. Ba Oan is a Tial zan mocha gwajn, ba an Ounan a Fajnta, amol hot a a Stumbruck ausbajssan rniaßn, wal daj af oan Ajck dafa'lt gwajn is. Min Wastl hot a amol an Saustoll mocha miaßn, dea hot ah do oum umatum goawat. Baut is i deara Zeit nit vüll won, wal d Leit eascht in Grund o'gläst houm und dos oani Heisl was baut won is, houms in oan Summa fiachti ghot.

Ah ban Fiaschtn is nit sou gounga, wia a si dos voagstüllt hot, ea hot jo du's Umbau van Schlouß, Schuln mocha miaßn und Göld is recht spärli dahea kajma, af da ounan Seitn is sou vüll Hulz in Wold dafa'lt und koana hot gwißt wia ma dos za Göld mocha kinat. Do hot da Inschinia Rojsnauer an Ajfoll ghot, wu ma an Kunal mochat und s Hulz af Ästarei außi schwajmma kinnat, gabs ella Oawat und da Fiascht wa ah zfrien. Ea hots noumol af da Loundkoachtn noh grechtn bevoa a zan Fiaschtn gounga is. Dajn hots zwoa gfoln, hot owa koa Göld zan ou'faunga ghot, drum hot da Rojsnauer s easchti Sticckl van Kunal sölwa zohl miaßn. In Ou'foung hot a gmoat, ma sull zan oawatn die Leit najhma, daj ban Fiaschtn a boa Tog oawatn houm miaßn, ouhne Göld, wia sis ban o'läsn intaschriem houm. Dos is owa nit gounga wal ouft a Knecht uda a olda Voda schickt won is, daj van Kunalbau' nix vastoundn haum und uwal wieda ounani Leit kajma hand, dajn ma sogn hot miaßn was toa sulln. Bis daun ou'gfounga houm is foßt Mittag gwajn. Wia da Rojsnauer gsehgn hot, daß a sou nit weida kimmt, hot a Toweara ajgstüllt und mit daj is a recht zfrien gwajn. D Geometa houm in Kunal ausgmajstn, houm ulli zwoanzg Schritt an Stajmpm ahi schlong, ba a Reib, ulli zajhn Schritt. In Ou'foung is nit sou guat gounga, ma hot nit gwißt, wia broad was man mocha muaß, wal af beidi Seitn Stoan zan ahisajtzn gwajn hand und daj hand wieda tiafa wia da Kunal ahi kajma. Zan Kunal mocha hot ma ah Leit braucht, daj van majßt und van Oawatn was vastoundn houm und daj ah mit die Leit a wajng umgajh houm kina. Oawat hots za dea Zeit wajng gajm drum hand va iwaroll, Leit zan Kunalmocha kajmma und daß ah wajng a Oachtung gwajn is, hand Pachtian mit zajhn Mouna gmocht won und davou is Oana da Voamou gwajn. Ea hot i da Fria d Noum, daj dogwajn hand ban Schreiwa ou'gajm miaßn und danoh hot a ah mitgowat. An mouchi Tagn hand souvüll Leit zan Kunal mocha kajma, daß nua sou gwuallt hot und jeda hot gwißt was a toa hot miaßn.

Am Sunnta noh da Kira, da Wastl hot in Gospan zan an Bia ajglond, hands iwa a Oawat zan rajn kajma, da Wastl is schou, wal a ounasts nix gfundn hot, af

Gläjcklbeag zan grom afi gounga und ea hot zan Gospa gsoat ea sull's ah prouwian, "woaßt" hot a gsoat "Mouna daj vos glent houm, kinans uwal brauha, iwalejg nit lounge, moagn Friahe um holwa siemi bin i ba dia, wal um siemi ou'gfounge wiad". Am Mouda is da Gospa mit zan Kunal grom gounge, zeashts hot a si ban Schreiwa möln miaßn, do hand a boa gwajn daj ah s easchti mol do gwajn hand. Da Schreiwa hot an je'n gfroat vos a glent hot und no dajn hot as ajtolt. Ban Gospa wia a ghäacht hot, daß a Tischla is, hot a gsoat "du muaßt nou woachtn". Die Ounan hot a zan ausgrom umi gschickt. Wia doun da Geometa kajma is, sani Leit houm i deara Zeit d Stajpm ghockt, dajs zan ausmajstn braucht houm, hot a za eham gsoat, oub a an Tischla brauha kinat, sunst muaß an zan ausgrom schicka. Da Geometa hot in Gospa ou'gschaut und hotn gfroat oub a sie mit a Sajtzweg auskajna tuat. "Hea Geometa" hot da Gospa gsoat "an Tischla dea koa Sajtzweg kajnt gaz goa nit". "I muaß die dos frogn" hot dea gsoat "i wüll da daj Oawat zoign" und ea is zan an Tisch gounge wou ajtla Popiarulln glajgn hand, hot oani afgmocht und hot in Gospa zoigt wia da Kunal gajh muaß. "Woaßt" hot a weida grajd "mia houm netta a Stickl van Kunal zan mocha und das dos mit den Ounan, daj voahea und danoh gmocht wean zaumpasst, miaßn ma gounz genau sa. Dos is dos Stickl vos ma mocha miaßn". Ea hot a ounani Rulln gnuma und do is da gaunzi Bähmawold draf gwajn und da Kunal is roit afgmoln gwajn, "siagst und dos kloani Stickei vos zwoamol roit is miaßn ma mocha". Da Geometa is min Gospa zan Kunal gounge, doucht hand drei Mouna drin gwajn, daj houmd d Suhl, sou houms zan Boum van Kunal gsoat, ajm gmocha miaßn, da Geometa hot in Gospa d Sajtzweg zoigt und s Moß, dos da Kunal hom muaß, daß s Wossa, rinna koun. "Wunst die nit auskajnst uda wunst vos frogn wüllst i bin gounz voirou und du kounzt jedi Zeit za mia kajma", hot a nou gsoat bevoa a gaunge is.

Da Gospa is za die drei Mouna in Kunal ahi gstiegn und hot gsoat, "i bin da Gospa und i sull ajng hölfm". "Woaßt" hot da Jakoub gsoat, "mia miaßn dos vos die ounan schloumpat mochan ausbajssan und ouft is da Geometa nit zfriend und mia miaßns noumol mocha". Da Gospa hot si die Sajtzweg ou'gschaut, daj is guat gwajn owa d Lottn vos zan majstn ghot houmt, hot sih duhbougn. Zan Mounan, daj eham zuagschaut houm hot a gsoat, "mit dea Lottn kina ma nit oawatn, i wia schou, daß i vos gscheits find" und ea is za da Hittn. wou d Houndwera gwaj hand gounge. Doucht hot Oana an Schauflstühl. gmocht und dajn hot a gfroat, wou a an dickn Lon uda Ostl griagn koun. "Hinta da Hittn" hot dea gsoat, "is a Logaplotz und wunst do nix finds muaßt zan Inschinia gajh". Da Gospa is hinta d Hittn gounge, do hots Brejda, Schwachtlina, Lottn, Ostln und Bolkan ghot, a ausghockta Bolkn, dea do glajgn is, dajn hot a sih heagricht, hotn gmajßt und wal a s Moß nit gounz ghot hot, is a um an Houwl gounge und hotn passat gmocht. Doun hot a in Jakoub gschrian und mitanouna houms in Bolkn zan Kunal umi trogn. Saj houma i'd Mitt ahi glajgt, noh da Sajtzweg gricht und min oawatn ou'gfounge. Es is guat gounge, wou a Bugl gwajn is, houms o'grom miaßn und d Lahn houms mit Stouan

und Grund ougfüllt und inna trett, intasi is meistns Loahm gwajn und dajn hot ma wia an Tajntt ajm mocha kina.

Wias Mittog gmocht houn is da Gospa zan Wastl viari gouna, ea hot gwißt, daß a am Oufoung oawatn tuat und doucht hot an ah gfoundn. Da Wastl is ba die easchtn Mauna gwajn, daj d Mosn o'groumt houn, ea hot mit an Gromhackl nochn Moß die zwoa Seitn van Kunal duhghockt und die Ounan houn ausgrom und wajg gschaufft. Da Wastl hot si gfreid, daß da Gospa kajma is und hotn gfroat wos eha mocht. Eha muaß am Ajnd in Kunal putzn, daß a intasi ajm is und ah richti follt, hot da Gospa gsoat. Da Wastl is min Gospa nou a Stickl am ausgstajcktn Kunal viari gaouna. Das d Geometa ausmajßtn houn kina, hand d Bam daj in Wajg gwajn hand, umgschin gwajn und da Wastl hot gsoat "bis hiatzt is jo guat zan grom gwajn, owa do voirou kimmt a stoniga Houng, wia ma do dukajman woäß ih nit , zan Glick houn ma ajtla Inschinia do und daj weand schou weida wissn".

Hearintan Kunal isa Wajg gmocht won, sou broat, daß zwej Wagn viaranouna kinann und fia d Treiwa hot man ah braucht. Ouwas Kunal, af da Woldseitn hot ma zan Stoa sejzn , netta bis af d Suhl n grom miaßn, af da ounan Seitn owa tuifa, wal sunst s Wossa wia in a Seihpfoun duhgrunna wa, hot da Maura gsoat, dea doucht d Stoana gsajzt hot. Sou hot mas mocha miaßn wal s Wossa in Beag nie afi rinnt owa ohi zua uwal an Weig suacht, wous vasickan koun. Wias min Kunal fiachti gwajn hand, saj houn nua a Stickl gmocht, dos d Koumisioun beguatachtn hot miaßn es hot si ums Göld ghoudlt, wos va Wean zan dawoachtn gwajn is, wun die Hean zuastimman.

Da Meiahouf, dea is afm Plotz va da oln Gloschittn gstoundn, wajnga umbou af Oawata Wouhnunga, hotn da Fiascht rauma lossn, ea hot laa und valossn sou dahi' gnopfazt, bis daun d Leit van Kurial grom kajma hand und min umbou ougfouna hound. Da Rosnauer hot Woldmouna braucht, daj Hultz gmocht houn und daj ma ah zan Treim ban Kunal braucht hot, wal van Gläjcklbeag bis in Nejoufm koani Leit gwajn hand. Wias mit dajn Stickl, wos da Koumisioun zoign houmt wülln, fiachti gwajn hand, hot a d Leit zoumkajma lossn und hot gfroat wea ban Umbou van Houf hölfm wüll, dea sull si i da Schreibstum möln. Doucht hand via Schreiwa gsajssn, da Oani hot d Maura, da Ouna d Zimmamouna, da Oa d Tischla und oana d Togwera, ma hots als Zuaroiha braucht, a fgeschriem, es hand nit vüll zoum kajmma, den meistn is's zweit gwajn. Oawat häns schou braucht owa zwou Stund do hi'gajh is ihn zväll gwajn. Da Gospa hot si afschreim lossn und da Wastl hot nit gwißt, sulla uda sulla nit, da Gospa hot eham zua grajd und hot gsoat, "wajgn da viachtl Stund dajst za mia braugst, daj kounst vagajssn und afhään geht uwal nouh" do hot si ah da Wastl afschreim lossn.

Zan Umbou van Houf hot da Rosnauer an Maura va Heiraffl gnumma, dea hot die gounzn Zeichnunga und Planunga griagt. In Vawoltastiwil hot a si sa Schreibstum aj'griecht, ea hot ah drinn geschlofm. Zan Ajßn is a is Hiatahajs l za die Knecht gouna, daj in Houf blim hand und wajnga Umbou hot mas doucht hi' toa miaßn.

Wia doun d Leit van Kunal mocha kajma hand, hot d Oawat min Umbou van Houf eascht recht ougfounga.

D Zimmaleit houn i die Zimmawiesn mitn aushocka ou'gfounga und die Ounan houn s Doh und in Dohstutil ohagrißn. D Lotwäjnd d Vihbaan und in Boum haums wajggroumt und außgrom. Wia da Wastl und da Gospa is Vawoltastiwl kajma hand und "griäß Goud" gsoat houn, da Maura va Heiraffl hot grod mit an Zimmamoun, dea' s aushocka iwa numma hot, grajd wals owa läjnga daucht hot, saj hound noumol am Plan nohschou miaßn, wal wos nit richti gwajn is, hot a die Zwaj gfroat, ous do in Houf oawatn wülln und wos gle'nt houn. Do hot da Gospa gsoat "mia houn gheacht, daß do a Oawat gat und das ma braucht weam. Dos is da Wastl, ea is Zimmamou und i bin da Gospa und bin Tischla, sogts amol ajng miaßat i jo kajna, es is schou recht loung hea und i kim nit draf". "Woaßt" hot da Heiraffl Maura, sou is a va ulli gnajnt won, gsoat, "i bin sou vüll i da Wöld ummatum kajma, i houn ah mit ella Leit goawat owa wou a die hiatz hi' toa sull woäß i ah nit". "Ajs hobts dou in Frieweag dos Baunhaus gmocht, dos wos a bissl außaholb steht und do hot a Tischla va Wulda d Fejnsta und d Tian gmocht, i bin doucht da Lehabua gwajn und wals recht woam gwajn is, houn i ajng miaßn s' Wossa zan tringa afi bringa". "Jo und daun is s' groiße Wajda und da Stuam kajma und hot uns s gounzi Grißt wajg grissn, i koun mi schou drou erinnan, owa die hätt i nimma kajnt". "Wißts" hot da Gospa gsoat "i bin domols jo nou a kloana Bua gwajn hajt bin i vaheirat und houn sölwa schou an Buam". "Jo d' Zeit vageht" hot da Heiraffl Maura gsoat "und du Natzl nimmst gleich in Wastl mit und soast eham wos a toa sull". Ea hot a Rulln Popiea am Tisch ausanouna broat und hot in Natzl gfroat wos do nit stimma sull. "Wißts Vajda an da Nr. 1 haum ma ougfounga, do woan die Mooß nou guat, owa ba da Nr. 7 do kajmama mit die Spaara nit af 'd Maua und do hots ah nou, Taxn do woäß i nit weida". "Du mogst is asou wiaßt moast, wal da Rosnauer hot gsoat, wuns wou nit paßt sulln mas sou mocha wie ma moan, holn muaß hult". "Oft woäß i schou wos i toa muaß, kim Wastl hiatzt kinna ma gajh" und die Zwaj hand gounga Zan Gospa hot a gsoat, "du gehst hiatz duhn Houf duh, ban Toi außi, afizua is a Oubau, do hand d' Tischla drin, du soast, daß i die schick und da Matin sull da sogn wost mocha stullst". Da Gospa is a sou gouga, i da Mitt van Houf is a Grount gwajn und runduma is gowat won. Am Oufoung va die Hajsja houmt d Zimmamouna schou min Dohstuhl afs'tülln ougfounga, d Maura hand doucht schou fichti gwajn, owa va die Tian und Fajnssta hot ma uou nix gsehgn. Wia a doun i'd Tischla Weakstott kajma is und gsoat hot daß a van Heiraffl Maura do heagschick won is, hot da Oani gsoat "i bin da Matin und Goud sei Dounk daß kajma bist,. mia kajman va lauta Oawat den Mauran nit noh. Mia sulln via die easchtn Heisa d Tian= und d Fajnstastajckj hi'toa und mia kajnnan uns nimm va lauta Fajnssta und Fajnstaln und Tian und Tialn aus". Da Gospa hot sa Kraxn af d Seitn gstüllt und hot si Tian und Fajnstastajck daj in a Ajck gloaht hand ougschaut, oft hot a in Matin gfroat wou da Plan van Umbau is. Wal dea koan ghot hot, is a noumol zan Heiraffl Maura gounga und hot'n gfroat

oub ea oan hot, dea hot ah koan ghot und hot gsoat "d Tischla houmd, sou vüli i woab, die Moß van Fajnstan und Tian griagt und wal ulli gleich hand brauhans koan Plan nit". "Doun" hot da Gosoa gsoat, "brauhat ih a. Blattl Popiea wal i muas mas afschreim , wos ma fias easchti Heisl, und sou weida brauhan, daß ma mit di Ounan fiachti weam" Ea hot a Hajft griagt und hot af da easchtn Seitn van Plan, dajn da Maura ghot hot, s Heisl Nr. 1, af da zwejtn Nr. 2 und af da 3. drei ahi gmoln. Wia a damit fiachti gwein is hot a gsoat "Vajda fia drei Heisa houn is gmocht hiaz kina ma ban easchtn oufounga". "Schau das owa noumol ou, wals ouft nit ist, wias da Plan ougajm tuat" hot da Vajda Michl, da Heiraffl Maura gssoat. Da Gospa is als easchts is Heisl Numma oas, gounga,. hot d Fajnsta min Zollstob gmajßtn und afgschriem, da noh Tian und wia a fiachti gwajn is,. hot a gschaut, daß a wieda, i'd Weakstott ummi kajma is. Doucht hot a Tian und d Fajnstastajck, daj ma ban easchtn Heisl braucht hot, zoungtüllt: und hot za die Ounan gsoat, daj brauha ma als easchts, daj miaßn ma gleich umitoa, daß d Maura ajmaun kinan" Danoh hot a fias zweiti Heisl s gleichi mocha wülln, do hot a koan Tiastouck gfundn. Tiastajck hand jo nou oa do gwajn, fia d Haustian, daj' a wajng breada gwajn hand, hot a oan mocha miaßn. Wia a fiachti gwajn is, haums ah fia's zweiti Heisl die Stajck ummitoa kina. In zweitn Hajsl i's ah da Gloucknstuhl min Dachl afi kajma und do hot miaßn a Doohlucka gmocht ween. Da Gospa hot schou mi'n Zimmamaunan grajd und daj houmd gsoat "eascht wun ma lottna, kina ma song wia groß wos mas brauhan." Wajn dajn is da Gospa in Mittog zan Maura Michl gounga und hot ehams gsoat und dea hot eham gsot, daß i via Heisa schou Leit ahi wüll und ea schou in Pochtvatrog gmocht hot.

Da Gospa hot jo eh schou läjnga um wos Ajngs ummatum gloust, hot bishea nix rechts gfundn. Do hot da Gospa gfroat "kinat i ah oas griagn". "A jeda koun si oas aussucha, ea muaß owa die Satztinga, daj in Pochtvatrog stajngan ej'holn, wal na sunst da Fiascht vatreim kou". "I muaß owa nou mit majn Wei rajn, wal wuns nit do afa mog, koun i koas najhma". "Woabst Gospa" hot da Michl Vajda gsoat "loung iwa lajgn kints is nit, wal a boa schou gfroat houm und sunst wou is nit sou oafoch wal do ba uns braugst koa Göld zan Oufaunga. S Hajsl bleibt Eigentum van Fiaschtn und da Zins, ea is nit vüll, wiad gleich van Vadeast o'zoug,n". "Es is hult sou" hot da Gospa gsoat "wal i a Tischla hin, brauh i ah a Weakstott und oub dos a geht und in Houf wos is, miaßat i wissn". "Woacht damit, bis va die fiaschtlichn weakirnt hot da Vajda gsoat "mit daj kounst doun rajn". Min Wastl hot da Gospa ah schou grajd, dea is schou zwoa Joah vaheirat gwajn und hot a wos gsuacht, wos a moat und wia driwa dajnt. "Woabst" hot dea gsoat," sou wos is jo nit schlecht, maj Agnes wüll nit wou ahi, wou sou vüll Leit banouna hand, sie wüll wos, wous ums Haus ummatum gajh kau und wou nit d Weiwa inta da Haustia drotschnd und oan ausrichnd, i muaß iha do recht gajm, es is schou ella Unfried und Ülajnd dabei außakajma". "Wastl du host schou recht", hot da Gospa gsoat "woabst i koum in Stiwl nit ewi drinn blajm, nit wal mi d' Igazn Leit außa hom wülln, owa wun ma siacht wias loungsoum ajng wiad, wal d Kina gräba wean und a je'ds an Plotz

braucht, do muaß ma sölwa seha, daß sou nit weida geht. Woäßt Wastl, du host nou meha Zeit und kounnst woachtn bist wou wos findst". Frali, sou schlejn tuats ma jo nit" hot da Wastl gsoat, "owa mit da Zeit is's schou bajßa, wun ma wos Ajgns hot und dahoam is jo nix zan findn".

Es is a Zeit umigounga bis d Agnes und da Gospa sou weit gwajn hand, dou in Hittnhouf a Hajsl zan iwanajmma. Min Rosnauer hot da Gospa schou grajd ghot und do hot ma in Pochtvatrog ahi gschriem, daß a als Tisclila a boa Ausnahmen, ma hots Priorität gnajnt, griagt hot. Zan intaschreim hot d Agnes ah in Hittnhouf kajma miaßn. Da Wajg najma Kunal is fiachti gwajn und wia sie s easchti mol in Wold gsehgn hot, wou d Fichtn, fost schwoaz bis in Himml afi gloungt houm., wou d Wiesn, daj grea und vull Bloaman bis zan Hoihwiesbeag gounga hand und dea, east in Oufong recht stad, danoh gah i'd Häh afi gounga is und s Beagl hot sie stoani dazwischn ahi druckt. D Sunn hot woam gschajnt, d Schwolmajan hand zwitscharad und lusti i da woama Luft dahi gsegt. D Agnes is do glei dahoamt gwajn und si hot zan Gospa gsoat, göll do blajm ma". "Gfollts da do" hot da Gospa gfroat und sie hot gsoat "woäßt do is uis sou friedli und hoamli und wun ma dos amol siacht, dos koun ma nimma vagajßn" und sou hands in Hittnhouf afi kajma.

Saj hound owa nou a Zeit woachtn miaßen, wals min Haus nou nit fiachti gwajn hand und goa sou pressiacht hots a nou nit. D Hausnumma zajhn wos griagt houm, is easchti am intan Ajck gwajn, wun ma am Hochficht afi gschaut hot und ba die Fejnsta hot ma af's Beagl, af Schwoazboh und afs Bähnlouh ohi gsehgn. Da Agnes hots recht gfoln, wal da Stoll und da Stool ban Haus gwejn hand.

Danoh hands zan Intaschreim umi gounga und do is in Maura Michl sa Su'h do gwajn, sa Voda hotn braucht, wals uwal meha Oawat gajhm hot und min Vatrog mocha, i's a nimma sou mitkejma, dos hot da Lorajnz gmocht. Dea hot den Lei 'n a gsoat wou iha Wies und iha Ocka is und is ah mitgounga, wun a wea braucht hot. Wias intaschreim ghot houmt, hot da Lorajnz am Plan van Hittnhouf d Hauswies und in Beaglocka zoigt und hot gsoat, daß ah a Heisl dohearoum bou' wüll, ea woäß oaw nou nit oub sa Wei mit gajh tuat. Da Wastl hot si ah in Plan ougschaut und hot gsoat "woäßt, in gounzn is's schou guat, d Wiesn und d Acka, hand nit weit wajg und daj Hauswies kounst van Fajnstä aus seha, netta das d Heisa sou banouna hand, i woas nit oub dos ah guat tuat. Dahoam hand d Haisa wajda ausanouna, schou wajgnan o'brajnna, wuns do amol passiacht, brinnan ulli Heisa, do koun ma nou sou afpassn und wun da Blitz ajschlogn tuat bleibt van gounzn Houf nix meha iwari.

"Woast" hot da Gospa gsoat, "do hoißts, daß amol a Zigajnarin, daj ma in Moahouf ba an oagn Wejda afgnumma hot, gsoat, daß da Houf nia o'brinna tuat. Wal iha d Leit nit glaubt houm hot's gsoat es sull iha wea an Schaub Strohi bringa, va dajn hot a Wei an Holm außa zuign miaßn, dajn hot's duhn Schaub duhgstajekt und ouzundn, da Strohiholm is duhn Schaub duhbrunna und s Strohi is nit brinnat

won. D Gloshittn is hunat Joha old won, danoh is da Moahouf wieda hunat Joah gstoundn und nia is da Houf o'brajnt, moast nit daß do wos drou is".

Da Wastl is sou loungsoun traf kajma, daß s Lajbm in Hittnhouf nit goa sou schlecht is, netta in Houf sölwa, hot sa Wei nit ahi wülln und wia a amol min Hajga grajd hot, ea hot gmoat dea woäß meha, hot'n dea zan Loarenz i'd Kounzlei schickt "woäßt" hot da Lorenz gsoat " zeascht miaßn ma in Houf wajg hom. Danoh do hät i nou a boa scheini Platzl zan Haus bou, oana is ba die Zimmaheisa a ounara in Gräjtzl und ba da Mühl hots ah nou wos, owa du miaßatst zeascht do van Houf wos najma, du und da Gospa schlofts jo mounchmol in oln Schoffa Heisl, wia was wunst du dos nimmst, bist a Ounas bau kaunst, hint is ah a Wies dabei und sou oag drinn is jo ah nit, nua daj Wei miaßat hult mounchmol Bia vakafm, wal jo dos ah a Goststum bleibt". Da Wastl hot nit loun gebraucht, bis a gsoat hot, "host recht, i wia schou das ma Wei min Buam affa kimmt und dajn ba die Zimmaheisa nimm ih ah, kounst mas bis sou weit is frei holn". Da Lorenz hot die Schriftn aus a Mappm außatou und hot gsoat "zwoamol muaßt intaschreim und wun dei Wei intaschreim hot griagst ah oan Vatrog, da Ounari bleibt do und mia schickna daun af Krummau", "Va gölts Goud" hot da Wastl gsoat und is froih gwajn, daß a wos rechts gfundn hot.

Die Zeit is nit stajblim und ah d Heisa in Houf hand loungsoun fiacht won, ah in Gospan sajs und ea hot va Stejgnwold afa zuign kina, in Oufoung is's recht schaj gounga, ulli hand frohi gwajn, daß wos Eings ghot hound und wuns ban Koa, ban Wossa zoumkajma dand hot a jedi wos Neigs gwißt, es is wia a groißi Frejdschoft gwejn.

Sou is's a boa Joah gounga und doun hot d Ratscharei ougfounga. Nejma Koa is a hülzana Grund gwajn und do hound d Weiwa iha Wäjsch gwoschn, do hots min ausrichtn ougfounga, am Ajnd hand nua meha a boa zan woschn hie gounga und die Ounan hound nua gschleidot.

Amol af'd Nocht is da Wastl zan Gospan umi gounga und dea hot gsoat, daß sana Agnes in Houf nimma recht gfollt. "Du host jo schou recht" hot d Agnes in Gospa sa Wei gsoat, wias dazukajmma is "do heroum is s Leim nit schlecht, netta in Houf sitzt Oana am Ounan, du host koa Platzl wost alloa bist, wunst am Saumsta. in Houf kiahst und du a wajng za da Nohbarin umi kimmst, moat daj gleich si hot schlecht kiacht und du kiahst iha noh". "Jo wajgn wos schauts iha nit ah, daß wou ounast wos griagts", hot da Wastl gsoat, "Platz zan Bau hots jo nou ajtla, nette. a Schneid maß ma schou a hom" "Du host guad rejn" hot da Gospa zan Wastl gsoat "i koun jo nit zwoa Heisa van Fischn griagn und wou sull i dos in Houf hitoa", "wunst wajm hätst, dajns dis gajm kinast, muaßt hult a wajm ummatum lousn gajm tuats mouchi, daj oas mäjchatn. I houn min Kolbrajnna, Hawli, hoißt a, dea ban Buhina in Stiwl is grajd, dea suacht wos Kloas, wunst amol mit eham rajdn tatst " Da Gospa is a boa Tog danoh zan Kolbrajnna Hawli., zan Buhina obi gounga. Ea is nit dahoam gwajn und sa Wei hot gsoat, daß a hint ban Koloufm is. Wal a nit woachtn hot wülln, is a hintari gounga wou da Hawli ban Koloufm noh gschaut

hot. Da Gospa hot mit eham grajd und hot n gfroat, oub a sa Heisl in Houf iwajma mäjcht, wals fia eham zkloa wiad und ea a gräbas braucht. "Woaßt" hot da Hawli gsoat "majgn tat is schou, netta mia fahlts Göld und a ajngs Bajtt und an Tisch miaßat i ah kafm". "Do driwa kinna ma rajn, i loß da a Bajtt und an Tisch stajh, va mia aus ah nou meha wunst wos bauchst, owa oas muaßt nou wissn, du kounst nit afi zuign bevoa i baut houn, wajgn dajn zohl i weida in Fiaschtn in Zins und dajn Zins van Buhina zohl i ah, is da sou recht". Da Hawli hot a Wal nohdajkt of't hot a gsoat, "recht is ma schou i muaß owa ma Wei frog, wuns iha a recht is, koun i ah jo sogn". Mit anouna hands zruck gounga und do houms iwa d Wiesn und Acka grajd, daj zan Heisl dazua ghäacht houn und wal d Hawlin nit sou richti wülln hot, si hot gmoat, daß sis kafm miaßn und wias ghäacht hot, daß ohune Göld za an Heisl kajmand, hots jo gsoat und a boa Tog danoh hands zan intaschreim gounga.

Da Gospa hot doun gleich an Plotz gsuacht, wou a bau hot kina, ea hot oft dajn Plotz ouwas Grajgei gnumma, hot owa nou woachtn miaßn, wos d Agnes dazua soat. Af spat hands mitanouna zan ouschou afi gounga. Saj hand af da Trieb ban Odum außi und hound gschaut wou a passata Plotz is. I da Trieb is a olds Kreiz gstoundn, wea dos hi'tou hot woäß ma nit, owa doucht is da scheinste Plotz gwajn. D Agnes hot gsoat "siagst da Hea Goud is's schou do und das a uns beschützt und seigna tuat miaßn ma äjfta do betn" und sie hot glei an Vataunsa bet.

Va do oum hot ma weit umatum schou kinna, gaunz weit wajg da Pläcknstoa, noichata da Scheschibeag und da Bodawold und zwischn Beagl und Bähnlouh, hot ma bis af Schwoazboh ohi gsehgn. Sou in umatum schou hot af oamol da Wold zan rauchn ougfounga, sou hoamatli wia a in Stajgnwold tou hot. "Gospa" hot d Agnes gsoat "häast is a, wia ba uns dahoam, in Houf drin houn i in Wold nia saun ghäacht". "Woaßt, do hearaußt is uiß ruhi und drum häan mas;" hot da Gospa gsoat, "hiatz miaßn ma owa hoam, sunst griagt uns do hearaußt d Mousgoas".

Da Wastl hot a hülzas Heisl baut, ea hot gsoat, dos geht gschwinda und is bülige" wias damit fiachti gwajn hand, hot ma min Gospan san ougfounga. In Gospan sajs hound Maura gmocht und ea hot d Zimmaleit nea zan Dohstuhl braucht. Wal da Wastl a holbs Joha enta, umzuign hot kina, hot d Agnes uwal wieda gfroat, wuns ba ihn sou weit is "i holts nimma aus, jedn Tog wiads schlimma". "Woaßt, s bou geht hult nit sou schnöl", hot da Gospa gsoat, "in a boa Woucha ham mia a sou weit, bis dohie muaßt schou nou woachtn". "Du host guad rajn hot d Agnes gsoat "du bist i da Weakstott und i muaß mi um uis kiman, d Kina vawüldan gounz, saj fuign nimma, hand uwal af da Gostn mit ounani und mochan netta U'sinn, wos oana nit woäß, follt dajn ounan aj'. Voagajstan hots grajngt, do hands bis zan Bauh noß gwajn, wie'as hoamkajma hand, wals die gounzn Lockan austrettn houn, i woäß nit wia die ounan Weiwa a Oachtung mocha kinan".

In Fruajoha i 's doun sou weit gwajn, daß is neihi Haus ahi kina houmt. Frali is nou ella zan mocha gwajn owa mit da Zeit is douh uiß fiachti won. Als easchts hot da Gospa a Bäjng vojdan Stumfejnstan gmocht, wal va doucht is a recht guadi



Aussicht gwejn. Die zwou Kiha houmt schou a boa Tog braucht, bis si dajn neiha Stollgwou'd gwajn hand. Da Stoll in Houf is sou finsta gwejn, daß ma ah ban Tog a Liacht braucht hot.

A sou hand a boa Joha vagounga, bis doun a neihi Vaoadnung außa kajma is, daß Kina van siemtn Joha au i'd Schul gajh mißn. Da Richta hot an Zejttl in Houf umatum gschickt und da Pfoara hot's ah i da Kira vamöld, daß mas in Gläjcklberg i da Schul ajschreim lossn muaß. Da Gospa hot san Buam in Michl und sa Toichta ougmölt und in Hiascht houms i da Gläjklbeaga Schul ougfounga. Es hot a Zeit braucht, bis rna gwound hot, daß d Kina um siemi i'd Schul gajh houn miaßn, owa noh a Zeit hot mas gwout hot. D Leit hound iha Oawat ghot, d Mouna hound, sou bold's in Kunal koa Eis meha ghot hot, Scheida gschwejmmt. Dos is bis in Stumma gounga, wunn s Wossa in Kunal zwajng won is, oft hot ma mi'n Hejgn ougfounga. In Wold hand Mouna eascht wieda in Hiascht gaunga, wun d Bam koan Soft meha ghot houn, wal da Soft hot die Sog sou ahpickt, daß mas nimma rihan hot kinna. Sou is bis in Winta gounga, bis gnua Schnee zan Schajta zuign gwajn is.

Wal ma in Wold koa Lauwat hejgn hot deafm, hand d Äjst va die umgschnina Bam af an Hafm zaumgwoafn won und in Winta hot mas hoam zougn. Do hot mas af an Plotz ohglacht, wou in Frujhjoha d Sunn guat oukinna hot und wun's a wajng woam won is hound d Weiwa min' Strahhocka ougfounga.

In an Summa am Johanitog hot da Gospa i'd Friahtmajß gajh wülln, ea is am Kirasteig, dea owaholb da Soundgruab af Gläjcklbeag geht, recht gmiatli dahi gounga. S Gros is schou recht hoih gwajn, ah s Wintakon is i'd Häh gschoussn und d Sunn hot mit a boa Wulkan iwa Schwoazboh, schou zan wama ougfounga. Bevoa a in Wold kajma is, is da Steig duh a Gstaunarat gounga und do is af oamol a Bää voa eham gstoundn. Ulli Zwaj houmt si gschrajckt, da Bää hot an Brumma tou hot sih umdraht und is zruck gounga. Da Gospa is a zruck gaunga und is am oldn Wajg ohigounga.

Sou in dahi gajh is eam ajgfolln wos sa Voda amol dazühlt hot. Sa Ahl, wias nou a kloas Dianej gwajn is, hot amol a Bää vazahn wülln, do is zan Glick da Woldvajda kajma und hot 'n vajuagt. Ea hotn ougschrian, wos a do tuat ea sull hoamgajh und u'wülln is a doun vaschwundn.

Da Wajg ban Grejgei is nou va da Gloschittn gwajn und wal a duh s Mooa gounga is, hound daj van Moahouf in Wajg weida afi gmocht, daß bajssa za die Völda und Wiesn kajma hand. Am Wajg ohizua hand Wiesn und Acka wajn, Leareian hand singat i'd Häh gflounug und a Gugaza hot min san Kukuk nit af ghäacht. Sou is da Gospa bis an s Bän'louh kajma und wieda is voa eham a Bään gstoundn, dajsmol hot an ougschreian "wos mogst du do geh hoam", wal da Bää nea min Koupf beitt hot, do hot da Gospa a boa mol Häjnd zoumgschlogn das knollt hot, do is da Bää sou gschind wos a kina hot in Wold ahi grajnt. Da Gospa hot a Wal ummatum gschaut, oub nit da Woldvajda i da Nähat is und wal a nix gsehgn hot is a hoam gounga. Dajn Tog is a nimma i'd Kira gounga.

Wal da Gospa a Tischla gwajn is, hot ma dos nei'i Hajsl wieda ban Tischla gnajnt und dos voahearigi hot ma hult doun noh san Naum Hable, ban Hawli gnajnt. I dera Zeit hot da Richta, dea's Odum Heisl ghot hot, wajgna Ülta, s Oumt in Sebastian Springer, dajn ma Wastl gnajnt hot, iwagajm. Ea hot's Heisl in die Zimmawiesn Haus Nr. 35 ghot.

Loungsoun uda schnöll wia mas ouschaut hand d Joha umigounga, d Kina hand gräba won und da Wajnzl, da Bua van Gospa hot in Wastl sa' Toichta, d Resi gheirat und s dahoamtani iwanumma. Und wieda hand ajtla Joha vagounga. In Gläcklbeag is a neiha Pfoara kajma, a recht a schoafa, dea hot iwa d Hüll und iwas Fegfaj prajdigt und das da Hea Goud ah die kloanst Sind strofm tuat. Oamol is d ' Resig in Wajnzl sa Wei , daj jo Teifl ghoißn houm, ba sou a Prejdi i da Kira gwajn. Woanat is hoam kajma und wias da Wajnzl gfroat hot wos hot, hots ehams dazühlt.

"Da Pfora hot iwa d Hüll prajdigt und das da Teifl schlimm is, daß owa sani Weiwa nouh schlimma hand und do houmd ulli Leit af mi gschaut und ban hoam gajh, i bin am Kunal gounga, hand die Ounan am Kirasteig gounga und i bin alloa gwajn. I gajhn nirnma i'd Kira, wun d Leit sou schound wia wun i d Pest hät i houn jo neamd wos tou". "I woäß ah nit wos d Leit houmd" hot da Wajnzl gsoat "i miaks ah scliou, houn owa nix sogn wülln. Zan Pfoara kinama nit gajh, i wia amol min Simoun Bruada rajn, dea woa jo schou amol Richta, vüleicht woäß dea wos". Dea hot ah nix gwißt, ea hot gsoat "do is amol driwa grajd won, daß ma an najha Noum griagn kinnat, owa wos genau woaß i nit, mia kinatn jo in Maura Feachtl dajn hajtign Richta frogn oub ea wos woäß". Dea hot ah nix gwißt und wia da Hajga davou gheacht hot, wias mit den Teifln umgajngand, hot a den Mounan is Gwissn grajd, das die Teifln fia ihan Naum nix dafia kinan und recht oachdantlichi Leit hand. Gülfm hots nit vüll und wunn d Weiwa ban Koa banouna gstoundn hand, is netta iwa d Tuifl grajd won. "Weign wos hands dein van Houf außi" hot Oani gsoat "daß ma ihn nit sou af'd Häjnd schou kou". "D Wäjsch wos daj ghot hot" a Ounari "nia a zrißni Pfoad uda oldi Housn und s Bajttzeig is ah uwal nei gwejn, hajt wos ma wajgn wos". Es hot ah Ounani gajm, ba die Oan houms drotscht und da Resi uis brüahwoam dazühlt. Oamol hot da Wajnzl mit a Kuah zan Stia miaßn wia a doucht gwajn is, hot Oana, dea grod viagounga is, ahi gschrian "Hiasl kimm, da Teifl is do", dos ho't in Wajnzl schou ghabt.

Da Resi iha Schwajsta, d Kathi, hots nit sou oog gfoundn, sie hot nua gmoat, d Leit miaßn jo wos zan ratschn hom, bis wajm Ounan findn, wous iha Gift vaspritzn kinan. Owa d Resi is do kizli und ah recht guraschiacht gwajn, "mia houm neamd wos tou" hots gsoat" und mia lossn uns dos nit gfoln, ih gajhn zan Hejga und sog ehams und wun dos ah nix hülft, gajhn i af Wean zan Kaisa". Da Hajga hot gsoat, ea wiad umatum lousn, oub wea wos woäß und oft soat a ihn wos mocha kinan. Zwou Woucha hand umigounga, bis van Hajga wos ghäacht houm, ea hot gmoat, saj sulln a Gsuach af d Hauptmounschoft af Krumau zwejngs Namensänderung mocha und oft weats sehe wos daj dazua sogn. Es hot a Zeit daucht bis a Schreim

va Krumau kajma is, daß dejs Gsuach af Wean gscliickt houn, wal saj nit berechtigt hand und a Audienz ba sana Majestät, den Kaiser va Ästarei dazua noitwajndi is.

Sajne Hoheit unsa gnädiga Herr hot bei sajner Majestät um a Audienz nochgsuacht und drum miaßt iha noch Wien ins Palee von Fürstn Schwarzenberg kajma. Sajne Hoheit unser gnädiger Herr hat befohlen euch für die Reise bestrnöglich zu unterstützen und ajnen Kurier von Krumau als Begleiter mit zugeben.

In Hittnhouf is dos wia a Lauffui umatum gounga, daß d Teifl zan Kaisa af Wean fohan, wals an ounan Naum wülln, recht houms, hots ghoißn, als Teifl hettns jo nix schajs meha ghot und Schlechts hot ma ihn ah nit nochsohn kina. Das da Fiascht sou gnädi gwajn is hot a Schreim va Krumau am Fiaschtn gmocht, do hot a Administrator, dea fia d Plou und afi zua zuaständi gwajn is, af Wean gschriem, daß saj do d Gerichtsboakeit iwanumma houmt und schou miaßn, daß Ruah und Oachtung gat.

Da Fiascht hot dos Schreim nia griagt, wal a iagnd wou af da Jogd gwajn is, ea hot jo nou gnuat Leit ghot, daj fia eham d Owat gmocht houn und daj houn sie gsoat, loß ma die Teifl af Wean fohan, es koust uns nit vüll und daj hound ihan Wülln.

Sou is dazua kajma. Es is mittn in Septejmba gwajn, daß a Schreim van Fiaschtn kajma is, saj sulln si zoumrichtn und af Krumau kajma. Wia d Resi dos glajsn hot, is zeascht amol innagsajßn, ihar'i Knia houn ziadat, wals nou nia weida wajg gwajn is und hiatzt sullns af Wean fohan. Af d Nocht wia da Wejnzl kajma is, hots schou gwoacht und hot ehams glei da zühlt, daß af Wean foahn miaßn. "I houn owa nix zan oulajgn," hot d Resi gsoat, "Woaßt" hot da Wajnzl gsoat, "hiatzt in Hiascht kinama i die Summasochan eh nit fohan, lajgn ma hult ou wos ma houn, ah in Wean gaz nit lauta reihi Leit". "Mitnajhma sulln ma ah wajm, mia Zwoa und ban Kaisa ham a wajng zwajng" hot d Resi gsoat. "I wia in Simoun frog, oub dea mitfoacht". Da Wajnzl is am ounan Tog za eham hintari gounga. Da Simou wa geen mitgfohan, owa ea hots sou in Kreiz ghot, daß a nit gajh hot kina, ea hot gsoat, "da Adam sull mit ajng gajh, ea sull a wos va da Wölt seha". Dea is schou geen mitgfohan hot owa sa Wei mit najhma wülln, Sou hands via Leit gwajn, daj da Fleischhocka Nazl af Krumau gfohan hot. Saj houn'd Rouß am Flößbeag ajgstell und da Nazl is mit ihn iwan Kalvarienbeag zan Sciloußgoachtn afi gounga. Iwa d Mountlbruck hands is Schlouß ahi kajma, wous gfraot houn wou sa sie möln kinan. Ban Scholta is a Mou gsajssn dea s Schreim recht loungsoum glajsn hot, oft hot a gsoat, "ajs miaßts weida gajh bis van Schlouß außi kajmts, doun iwa d Bruck und af da rechtn Seitn hand die oazölne Offis, do miaßts ajng wieda möln". Da Nazl is bis dohi mitgounga, hot pfiat Goud gsoat und is i'd Stodt ohi. Die Viea hand hiatz do gstoundn und houn nit gwißt wos toa sulln, do is a Mou mit an Schwingei und an Bajsn kajma, dea s Lauwat zoumkiacht hot, daj houn gfroat wou sa sie möln kinan. Dea hots a Wal ouschaut doun hot a gfroat

wous hea kajman und wias ehams gsoat houn, hot a gsoat, "Sou va da Plou kajmmts, jo do gehts nua ahi und kloupfts ou und wun wea herein soat, gehts ahi und dei kimat si doun um ajng". Sei hand ahi gounga, a lounga Goung is bis is hintari Ajnd gounga, lauta Tian mit Numan und a Popadajekl wou a Noum draf gstoundn is und wal koa Majnsch zan seha gwajn is, hot da Wajnzl. ba da easchtn Tia klopft. Koum hot a kloupft ghot is schou s herajn kajma. Die Via houn a Wal braucht bis sie d Tia afgmocht hound und ahi gounga hand. D Mouna hound in Huat aha tou und "griaß Goud" gsoat. Hinta a trum Tisch is Oana gsajssn, dea hot in an Packl Popia bladlt und hots gfroat wos wülln, und da Wejrizl hot gsoat, mia mäjchtn uns oumöln und hot eham in Briaf gajm. Dea hotn glajsn, hot a Wal nohdajnt und gsoat, va dajn woäß i nix, wos sull i dajn toa"? Ea hot die Leit noumol ouschaut do hot da Wajnzl gsoat" i woäß's ah nit, i dajn Briaf steht, daß ma weida hölfm sulst und wuns ajs nit wißt wia, doun fohan ma zan Fiaschtn af Wean und frogn a sölwa" Dea Mou hintan Tisch hot an roin Koupf griagt und hot gsoat, "sou houn i dos nit gmoat". "Owa gsoat houms is" hot da Wajnzl gsoat "und hiatz wüll i wißn toans wos fia uns, jo uda na". "Frali hölfma, netta i koun fia ajng nix toa., do miaßn ma zan Administrator umi gajh dea den Bezirk va da Plou iwanumma hot, dea kaun ajng hölfm". Ea hot in Briaf gnumnia hot gsoat, "kajmmts" und is ba da Tia außi. A boa Tian weida hot a kloupft und af "hea rein", is a ahi gounga, ea hot nit gwoacht bis die Via nochi kajma hand" is zan Tisch gounga und hot gsoat" do hand die Leit va da Plou, daj si do möln sulln" und ea hot eham in Briaf gajm. Wia dea dajn gsehgn hot,' is a afgstoundn, hot za dajn Moun, deas brocht hot gsoat, "ea koum glei in Vawolta bringa und ea sull in Franzl mit najhma". "Sehr wohl Herr Rat" hot dea gsoat und is sou schöll wos a kina hot ba da Tia außi. Za die Via hot a "griaß Goud" gsoat und "mia gajhgan is Nejmzimma do kina ma bajssa rajn", ea hot a Tia afgmocht, hot gwoacht bis die Via drinn gwajn hand und hot gsoat "sitzt ajng inna" In Najmzimma is a groiße Tisch drinn gstoundn, rund umma hand Stiahl gwajn. Da Herr Rat hot d Tia zuagmocht und is za eha hi'gsajssn. Ea hots gfroat, wias af Krumau kajma hand und wajgn wos saj an ounan Noum wülln. "Wissns Herr Rat, af Krumau hot uns da Fleischhocka Nazl mit gnumma und an ounan Noum brauhama, wal ma Teifl hoißn und dos gibt a u'guats Bluat" hot da Wajnzl gsoat. D Resi hot doun weida dazühlt, "seha loßn kina ma uns nimma, uwal hoißts d Teifl hand schou wieda do und uiß Schlechti wos gajm tuat, toan mia, i bin najgiari wuns sou weit hand., daß uns hi'mochan,. Mia houn uiß brouwiacht, ban Richta ham ma gwajn, min Hajga houn ma ah grajd, owa- ghulfm hots bis hjt nix". Da Rot hot ihn guad zuagrajd und hot gsoat, ea wüll uiß toa, daß wieda in Friedn lajm kinan und daß va Wean ah wieda gsund hoam kajman.

Zwischn ahi hand

zwaj Mouna kajma, daj ah za eha hi'gsajssn hand, "hiatz miaßn ma driwa rajn", hot da Rot gsoat "wia ma ajng af Wean und wieda zruck bringan" . "I bin da Franzl" hot va die Zwaj oana gsoat " i bring ajng af Wean und ah wieda zruck, woun habts

sou weit"? "Mia kinan gleich gajh" hot da Wajnzl gsoat, "wal ma uiß ba uns houm und in Krumau houm ma nix zan toa, ajkafm kinan ma jo wun ma zruck kajman". "Doun Herr Rat" hot da Franzl gsoat, "kina ma mit da Poust um zwoa af Linz fohan, doucht telegrafia i oub a Hulzschiff af Wean geht und sunst kina ma mit da Eisnbouh fohan, i brauch nou die Genehmigung, daß ma fohan miaßn". Daj houn i schou gricht" hot da Rat gsoat "und uis is i da Mappm drin". "Mia doukan ajgn recht heazli dafia und da Hea Goud sull ajngs vagölln", hot d' Resi gsoat. Die Ounan houm "pfiat Goud" gsoat und hand min Franzl, dea d Mappm mitgnumma hot, gounga. In wajggajh hot da Franzl gsoat, "hiazt gajnga ma Ajssn, wal bis Linz mißn ma via Stud fohan und kinan ninazt wos Ajssn" . "A wejng wos houn i in Keawl", hot Resi gsoat, "zan Jausn mocha laungts fia ulli"

I da Schloußkuchl houms gajssn und danoh, hands am Plotz afi gounga, daß ah mit da Poustkutschn mitkajma hand. Saj houmt nit loung woachtn miaßn und mitgfohan is ah neamd, sou hands recht zuigi af Linz kajma. In Uafa hot, da Franzl gleich telegrafacht und gschaut wias weida kajmand, do houms eham gsoat, daß moagn a Schiff mit Hulz af Wean geht und um zajhni af da Oulejg Stull in Linz is. Do hot da Franzl d Ouweisung gajm, daß in Linz a boa Leit mitnajhma miaßn. Iwa d Nocht hands in a Gostwiachtschoft blim, wal da Franzl gsoat hot , afs Schiff houm ma nit weit, netta iwa d' Doana umi und doun zejhn Minutn obi zua. Um holwa zejhn hands wajggaunga, und wia d Kathi d Doana gseha hot, is stajh blim "maj" hots gsoat "sou groß und sou vüll Wossa is drinn, wun do Oana ahi follt dea kimmt nimma außa". Voa zejhn hands za da Oulejgstüll va die Schiff kajma. Groß is daj gwajn, groß wia i da Plou da Moarktplotz. Da Stodt zua hand Hittn und. Logaheisa gstoundn und a duranouna is gwajn, doucht wou da Wajg i'd Stodt afi gounga is, hand Fuhaleit und Kraxn'troga, Mouna mit an Dragasch uda mit a Scheibtruha gwajn und iwarol Leit.

Die Viari aus'n Wold hound netta sou schou miaßn, dos wos gseha hound hot wia a Ameisnhaffm ausgschaut. Mit lauta schou houms nit gsehgn, daß Hulzschiff kimmt, wuns nit blosn hätt, daß kajmma tuat und ulli Leit gschaut hä'n, hätt'n sis iwasehgn. Daß a Hulzschiff is, hot ma gseha wals gounz mit Hulzscheida zuagstesslt gwajn is. Af die zwoa Seitn hand Wossaraal gwajn, daj, wia s Schiff am Doanarounft ougstroaft hot, stajh blim hand. Groß is gwajn wia a Haus i da Mitt hots an Rauhfoung ghot und a Hittn mit lauta Fejnsta. Zwaj Mouna hand van Schiff oha gsprunga und hound mit dickn Strick s Schiff um an Bamstouck oubundn, daß nit wajgscliwimma hot kina, doun houms a broats Brajtt zan afigajh hi'glajgt. Da Franzl hot mit eha grajd und daj hound gsoat "mia kinan gleich weida fohan, mia miaßn a boa Leit mitnajhma". Wal die Viari eh ba eham gwajn hand hot a gsoat "mia kinan gleich afi steign, i gajhn voirou und paßts a wajng af, wals recht rutschi is". Da Franzl is gleich za da Hittn afi gounga, doucht hand drei Mouria drinn gwajn, Oana hot a Koppm af ghot, dea is da Schiffsfiahra gwajn, ma hot "Käptn" za eham gsoat. Da Franzl hot eham die Genehmigung, daß mitfohan kinan gajm und dea hot in an Trochta, dea ah i da Hittn drinn gwajn is gsoat "klar Schiff"

und Oana hot iagend wou gsoat "Schiff is klar", doun hot da Käptn gsoat "ablegen" und ma hot dajs "aj aj Käptn" nou ghäacht und d Wossaraal houn zan rajna ougfounga, eascht loungsoun und danoh uwal gschwinda und s Schiff hot an Bougn gmocht, bis i da Mitt va da Doana gwajn is. Da Käptn is am Fejnsta gstoundn, bis da Mou dea voa an Raal gstounga is und doucht draht hot , a Häjnd i'd Häh tou hot , oft is a za die Leit hie gsajssn und hot gsoat, "mia kinan duhfohan bis Wean und wuns guat geht, ham ma i via Stundn int".

Da Franzl hot min Käptn a Wal grajd, daß a die Leit zan Kaisa bringa muaß, wal sie do nit auskajnan, saj hand Hulzmocha van Wold und mochan daj Scheita wos am Schiff hand, danoh weans in Kunal gschwajmmt, dos is fost sou weit wia va Possa bis Linz ."I hät mas nia trauma lossn", hot d Resi gsoat, "daß ma sou schei af Wean ohi kajman und wun ma dos dahoam dazühln, daß ma af an Doumpfschiff, sou groiß wia Haus, gschwumma ham weans is foßt nit glaubm"."Und daß oa Mou, an an Raal draht und s Schiff geht hi' wou as hom wüll kaun ma ah foßt nit glaum" hot da Adam gsoat. "I siags schou" hot da Käptn gsoat, "i muaß ajng a wajng wos dazühln Enta amol houn ma uns schou plogn miaßn, do houn ma Knecht ghot, daj houn ohi zua schou miaßn, daß i da Mitt va da Doana blim hand. Zwaj hand vojrou mit loungi Traufln gstoundn, daj houms Schiff glajnt und hint harid ah Zwaj gwajn, daj hound ghulfm, afizua is netta Oana hint und Oana voirou gwajn, die Ounan houn s Schiff zuign miaßn. Va Linz bis Possa hot ma sougoa Räjssa najhma miaßn. Wal s Wossa sou vüll Zug hot, daß ma nit dagejng oukimm".Die Teifln houn neigiari ba die Fejnsta außi gschaut, uiß is ajm gwajn und d Leit houn nou afn Földan goawat, hound Eadäpfl grom und Koon oubaut, "do" hot d Resi sogn miaßn, "do kinat ma guat hausn, wun i an unsari bugladn Wiesn und Földa dajnga tua, ulli Tog koun hiaz schou da Lauwatschnee kajma, owa scheina is dou ba uns. Da Wold af die Beag und die grean Wiesn mit ella Bloamam und da Gugaza wun a in Summa schreit und d Leareian, i glaub dos dat uns ohgajh", "Iwarol wou ma dahoam is schei" hot da Käptn gsoat, "die Oan hand liawa i da Stodt, daj kinan si nit dajnga wia schei wos ah af an Doaf sa kou, es is schou recht wias da Hea Goud gmocht hot". Wal da Mou am Leink Raal pfiffm hot, is da Käptn afgstoundn und zan Fejnsta gounga ea hot gschaut wajng wos, oft hot a gsoat, "do kimmt uns a Schiff gajng und wal ma mouchmol wun d Sunn scheid anouna nit siacht, miaßma Pfeifn und wal ma ohi zua wajniga Daumpf braucht, pfeifm ma äjfta. Af da Doana hot ma gseha wia a Schiff loungsoun, saj hand vüll gschwinda gwajn, voabei foacht und da Mou am Raal mitn Huat wahl. Saj hand an Grein, Mölk und Krejms voabei gfoahn und je weida wos ohikajma hand desto lajbhofta is won. Schinakl., Seglschiff und Fischaboot hand i da Doana umatum gschwumma, da Raalmou hot uwal äjfta pfifm, daß die Ounan ausweiha houn kina. A sou hand's af Tullm und zlejtzt af Kornajburg kajma. "Nou a holwi Stund und mia ham doucht" hot da Käptn gsoat. Saj hound nou a guadi holwi Stund braucht, bis ba da Olah gwajn hand. Doucht houms wieda schau miaßn, wals sou wos nou nia gseha hound, da Doanarouft hot a Reib ahi gmocht und do hot ma

in Ouleigplotz fia d Hulzschiff gmocht. Voa ihn is grad a Schiff ausglond won. A Bruckakran hot Saustoll groißi Keab auß Eise af s Schiff ohi ghajbt, do hands mit Scheida gfüllt won und da Kran hot die Keab afs Uafa, wou Britschnwagl af Schienen gwoacht houn, afi gstüllt. Saj häjn nou läjnga zuaschou wülln, owa da Franzl hot gsoat "mia miaßn gajh, wal ma nou ounatholwi Stund brauhan bis ma in Palee ham".Saj houn zan Käptn "pfiat Goud " gsoat und hand lousoum van Schiff ohi gstiegn, saj houn's Schaukn van Schiff nou i die Knia gspiacht.

Ba den easchtn Heisan hot da Franzl gsoat, "mia najhman an Fiaka und foahn zan Palee". Die Viari hand mod und froih gwajn, daß foahn houn. kina. Iwa d Ringstroß hands doun zan Palee van Schwoznbeaga kajma. Va auswajni hots nit Fiaschli ausgeschaut, da Wajnzl hot in Gutscha zohl wülln, dos hot da Franzl nit zualossn wal a in Aftrog ghot hot, saj zan Kaisa und ah wieda zruckbringa muaß. Saj hand ba da Ajfoacht in Houf ahi gounga,dea is wia a Baunahouf gwajn, netta vüll, vüll gräða, mit Stoan pflostet und i da Mitt is a stoanana Graund gstoundn. Rund ums Haus umma is a Pawlatsch gounga. Wals sa si oumöln houn miaßn, hands iwen Houf bis af die auna Seitn gaunga, wal da Hausmoasta sa Hiawa und sa Schreibstum doucht ghot hot. Da Franzl hot die Via iwagajn und hot goat, "moagn kina ma a wajng Wean ouschou, wal iwamoagn houn ma koa Zeit , pfiat ajng dawal "und is gounga. Da Hausmoasta hot iwalajgt wou as hi'toa sull, wal fia die Gostzimma houms dou a wejrig oamsöli ausschaut. Nejma Roußstoll hound d Gutscha a Stum ghot, doucht tua i d Mouna ahi und d Weiwa miaßn hult ban weiblichn Personal, gleich najm da Kuchl schlofm. Ea hot gsoat "i zoig ajng wous blejm kinnts wuns ba uns habts und wous wos zan Ajssn gajm tuat". Es is nit weit umi gwejn, wou d Deastboun a Stum ghot houmt, "do kints Togs iwa bleim und zan Ajssn is d Kuchl gleich danajm, d Weiwa schlofm ban Personal, do is Plotz gnuwa, wun ma koa Gsüllschoft houn, d Mouna kinant ban Gutschan schlofm. Hiatz gajnga ma za da Käjchin umi , daj sull ajng a Jausn mocha, i schick ajng d Nani, daj koun ajng uiß zoign und wuns a wajng außi wüllts, kouns mit ajng gajh, i muaß za mana Oawat ummi". Ea is nou mit ihn za da Kuchl umi und is gounga. D Käjchin is mit ihn i'd Stum umigpounga und hot gsoat, saj sulln si innasitzn und doun hot sis gfroat wos za da Jausn bringa sull. Da Wajnzl hot gsoat "wuns geht a Brot wal ma seit friha nix rechts ejssn houn kina". "Dos" hot Käjchin gsoat "koun i schou bringa" und is i'd Kuchl außi. D Resi is noh an Walei afgstoundn und hot gsoat, "i schau amol, oub i wos hölfm kou und is za da Käjchn i'd Kuchl außi. Doucht hot d Resi gfroat oubs wos hölfm kou." "I wia schou alloa fiachti, saj kinnan d Brajdl und d Majssa ahi trogn, dos is uiß i die Schublaln". "Sull i fia ajng ah wos hearichtn" hots d Käjchin gfroat," i deaf zwischn ahi nix ajssn weil i sunst z'dick wen tat" hot daj gsoat. Ban Ajssn houms doun dazühlt, wal Käjchin gfroat hot wous heakajman. Mia kajman van groißn Wold, va die Beagn, va da Oaschicht do oum und van vülln Schnee in Winta. Dawal is d Nani kajma und hot ah zuagloust. Wias fiachti gwajn hand hots gfroat oubs nit a wajng außi gajh wülln, si mäjcht ihn a wajng d Gajnd zoign, daß ah wos dazühln kinan. A wajng wos" hot da

Wajnzl gsoat "mäjchat ma schou seha, wun ma ah schou recht mod ham". Va da Stum hot ma gleich af d Gostn außi kina, ah do is da Plotz pf'lostet gwajn, nit a sou wie dahoam, wou ma die Stoaplotn wias gwajn hand hi' gload hot, daj hand voahea ohgschliffm won. Danajm is a Wies gwajn, wou oldi Bam gstoudn hand und am Moa is a Mau ummatum gouna. D Nani hot dazüht, daß die Heaschoftn, daj in Summa do hand, ihan Kaffee, wuns Wajta schei is, geen do bearaußt tringand. Saj hand weita gouna und hand af die vojda Seitn van Palee kajma."Do deafm mia jo sunst nia gajh, wal da Wajg netta fia die Heaschoftn is", hot d Nani gsoat "owa hajt, ajs miaßts jo ah seha wias Voirou ausschaut". Die Viari hound ihari Augn nit traut wos do gseha hound. Wos bis hiazt gsengn houn woa nit schlecht, a bajßana Baunhouf, owa hitz, die vojda Seitn, a groiße Plotz dea mit an stoanan Zau o'grajnt gwajn is, loungi broati Staffl daj afigouna hand, zwoa stoanani Salna haum oum a Voadachl trogn und d Haustia, Poatal hound daj gsoat und driwa is s Woppm min Tiaknbuam gwajn."Wißts" hot d Nani gsoat,"d Heaschoftn fohan mit da Gutschn bis zu die Staffl, steign aus und da Gutscha foacht af da ounan Seitn außi und hint in Houf ahi. Da Fiascht sölwa hot sa Wouhning najm da Kuchl die gounz Seitn van Palee" hand da Ballsoal und die Gostzimma, schlofm tun die Heaschoftn daj dobleim intan Doh". Saj hand ba da Ajfoacht banan groißn ,eisanan Toi, danajm is a kloas Tial gwajn, außi gouna. Va auswajni hot ma s Palee netta a wajng zwischn die Bam gsehgn.Saj hand a Stickl am Wajg weida gouna und hand af an Wajg kajma wous hint ahi geht. "Sou mia ham wieda do und moagn wiad ajng da Franzl Wean zoign, va gaißts nit i da Koalkira zan betn, dos sull Glick bringa, pfiat ajng" hots nou gsoat wias sis i da Kuchlstumm o'gliefat hot.

Die Viari hound recht guat gschlofm. I da Friaht hots a Möhlsuppm gajm und bronni Eadäjpfl, danoh nou Brot, Kas und Buda, wias fiachti gwajn hand is ah da Franzl kajma und saj hand Wean ouschou gouna. Wals Palee in zwoarazwoanzign Beziak gwajn is, haums wieda an Fiaka gnumma und hand gleich zan Ring gfohan. "Wißts" hot da Franzl gsoat "hoamzua kina ma uns uiß ouschou" .Zescht hands zan Stefans Dom umi gouna, in Tuam hot ma schou va da Wajng gsehgn. Wias hi' kajma hand, hot d Kathi gsoat, "maj is dea groiß, do tat unsa Kira zajhnmol ahi gajh". Drinn hot ma nit vüll gsehn, es is recht dusta gwajn und lauta Salna hots ghot. Af da Seitn, hand lauta Koböln gwajn, mit da Maria, mit Ajngln und min Jesus, ban ummatum gajh houms a boa Vataunser bet. Wal d Resi gsoat hot, saj miaßn ah nou i'd Koal Kira gajh, is da Franzl am Wajg dohi gouna. Scheini Heisa und Gachtln mit Bloaman und Bam hots do ghot und da Adam hot gsoat "daj Leit miaßnd dou recht ella Göld hom, daß sou wos bou und daholn houn kina". Schei is schou' gwajn wos zan seha griagt houn. Do hand Leit spoziat gouna, Fiaka hand gfohan, Reita und Mouna, dajs presiacht hot .Do is a Duranouna gwajn und a jeda hot gwißt wou a hi' muaß. Sou hands za da Koalskira kajma, daj is ah recht schei gwajn, af da links Seitn is a Gwülb gwajn wou d Vakindigung gwajn is, d Maria, da Ejngl und i da Häh is grod da "Heilgi Geist" als Taum kajma. Ulli Viari hand inna kniacht und houn bet, "da Engl des Heern brachte Maria die



Botschaft und sie empfing den Heiligen Geist". Danoh hands nou i da Michl Kira gwajn und ba da Belveder hands am Hoamwajg voabei gounga. Noumittog hands in Prota gounga, Leit hand nit souvüll gwajn und saj hound ninatzt loung woachtn miaßn. Gleich ban ahi gajh hot ma schou s Riesnraal gsehgn und da Franzl hot gsoat, "fohan miaß ma ah, wal ma va do oum gounz Wean iwasiacht". Da Wajnzl hot fias ahi gajh zohln miaßn, ea hot zwoa gsoat, saj gajhngan eh netta a Walei ahi, owa dea in Heisei hot gsoat., s ouschou kost ah wos. Do drinn is souvüll zan seha gwajn und fia uiß hot ma zohln miaßn, daß da Wajnzl amol gsoat hot "bülli hand's grod nit, do brauhad ma an Göldscheiße, mit unsan Vadeast tat ma nit weit kajma". Saj hand ban Wochsfiguan gwajn und in Irgoachtn, ban Ästreia Trochtn und ba die Soldon. Als lejtzts hands ah min Riesnrod gfohan. do hot ma, die gounz Stodt gseha und wun da Franzl nit gsoat hätt wos do uis zan seha is, wää s Göld fias mitfohan außigwoafm gwajn. Ban hoam gajh hot da Adam gsoat, "Goud sei Dounk daß ma wieda hoam kajman, in Wean kinat ma d Oawat vagajßn und dos umatum Zigejnan wa ah nix fia uns". Da Franzl hots in Palee o'gliefat und is gleich zan Hausmoasta umi gounga, wal a frogn hot miaßn, oub va da Resistajnz schou wos kajma is, dea hot eham an Briaf gajm, wou drinn gstoundn is, daß um nejni za da Audiejnz kajma sullen.

Da Franzl is za die Teifln gounga und hot ihn gsoat, daß Moagn um ochti fiachti sa sullen, wal um najni miaßn ma doucht sa". Daj Nocht houm die Viari nit vüll gschlofm, uwal wieda houms an Moagn dajnga miaßn, wos wiad da Kaisa sogn, wiad a uns an ounan Noum gajm, uda schickt a uns hoam und es geht weida wia bishea. Um holwa Oochti houms schou gwoacht bis da Franzl kajma is und gsoat hot "mitnajhma brauha ma nix, i houn uis ba mia und mia kinan gajh". Saj hand wieda min Fiaka gfohan. Die Viari hand sou vazoat gwajn, wia wuns zan oawastn Richta kajma hän miaßn, daß nix ghäacht und gsehgn houm bis doucht gwajn hand. Wun da Franzl nit gsoat hät "mia ham do" und o'gstiegn wa, weans sitzn blim.

Ban Toi is a Mou va di Kaisajaga gstoundn, dajn hot da Franzl gfroat, wias do gajh miaßn, daß zua Audiejnz van Kaisa kajmand. Dea hot ihn gsoat "am Ajgoung voabei, ba da nägstn Tia gehts ahi und doucht is a Tia, af dea Audienz steht, do kinnts ahi gajh". "Dounk schei" hot da Franzl gsoat und is voirou gounga, bis za a Tia min Schüldl kajma hand. Da Franzl hot oukloupft und wal neamd wos gsoat hot, is a mit die Via ahi gounga. Saj hand in a gräßani Kouma kajma, wou af oana Seitn Stiahl gstaundn hand und af da ounan Seitn a Tisch und driwa da ästareichischi Odl. Voa a Tia is af jeda Seitn nou a Kaisajaga mit a Gramhocka gstoundn, daj haums voa da Tia krajzt, daß neamd ahi kajma is. Ban Pult is a Schreiwa gstoundn, dea gsoat hot, ajs miaßts nou a Wal woachtn, sitzts ajng ina". Da Franzl is za eham gounga und hot eham s Schreim, daß zua Andienz kajma deafm, gajm. Dea hot gsoat, "is recht, af da Listn houn i ajng schou und hiatz koun i ajng ah oumöln", ea hot wos af a Zejtltl gmocht und wal na da Franzl gfroat hot, oub a ah mit ahi gajh koun, hot dea gsoat, "es hand netta Viari genehmigt" Saj

houm nit loung woachtn miaßn, oft is Tia afgounga d Wochta houm iha Gramhackl wajg tou und fimf jungi Mauna hand recht gifti außa kajma. "Nix i's und wieda nix, wia ouft miaßn ma nou kajma". Da Schreiwa hot gsoat, "seits stad und gajbts a Ruah wal sunst muaß i ajng ejspian loßn". Saj hand gleih gounga und noh an Walei is wieda Tia afgounga und a Mou mit an roit, weiß, roitn, drahtn Stecka, wou intasi, wia ban Dreikinigspül va die Hiata eisani Ringeian drou gwajn hand, kajma. Dea hot min Stecka afm Tiastouck gloupft und gfroat, "hand d Teifl schou do". Da Schreiwa hot "jo" gsoat und hot eham a Zajttl und a Schreim gajm. "Doun kajmts aha" hot dea gsoat und is af d Seitn gounga, ah d Wochta houms ahi lossn.

Wia die Viari in Keisa ban Tisch sitzn gseha houmt, hands glei ba da Tia stajh blim, d Weiwa houmd ihn Houfknix gmocht und d Mouna houm in Huat oha tou und "griäß Goud" gsoat. Da Keisa hots a Wal ouschaut, wias sou oamsöli do gstoundn hand und da meisti Grant, dajn a ba die Jungbaun va da Holiday griagt hot, is loungsoum vagounga und doun hot as gfroat "wos fia a Ouliegn hot ma", wal die Teifl nix gsoat houm, saj houmt jo nit gwißt, daß hitz rajn kinan, hot da Zermonienmoista gsoat "die Leit kajman van Bähmawold, a boa Heisa mittn in Wold und wia da Fiascht Schwoaznberg schreibt, ea ficht fia die Teifl um Leib und Lajm und bittet seine Majesstät um eine Genehmigung ajner Namensänderung". Da Keisa hots ouschaut "noi jo" hot a gsoat, "an ounan Noum wüllns, wos toan ma dajn do, Gustl hülf ma, wia sulln mas dajn najna". "Majesstät" hot dea gsoat, najna mas Jungbauer, i moa daj mochan uns nit sou vüll Soagn wia daj va da Holiday. "Mia genehmigen dos Gsuach" hot da Keisa gsoat "und saj kinan sie Jungbauer najna". Da Zeremoienmoasta hot schou miaßn, daß as außibrocht hot, wal voa lauta Dounkboaakeit hät d Resi in Keisa d Händ bussl wülln. Da Wajnzl hot nou sogn kina "Majesstät, da Hea Goud sull ajngs dounga, mia kinans nit". Man hot ihna gsoat, saj miaßn aschlin za da Tia außi gajh, wals eh schou ba da Tia gwajn hand, houmt die Mouna a Kniabajg gmocht und d Weiwa ihn Houfknix und woanat hands min Zermonienmoasta ba da Tia außi gounga. Dea hot nou min Schreiwa grajd, daß s Gsuach genehmig won is, das die Leit hiatz Jungbauer hoißn, daß a Schreim af Linz und a zweits zan Fiaschtn Schwoaznberg, af Krumau gschickt wen muaß. Die Teifl uda Jungbauer, wias hiatz hoißn, houmd va lauta Freid nit gwißt wos toa sulln und wun da Franzl nit gsoat hät "kajmts mia kinan hoam fohan, hä'ns nou stundnloun dischgariacht. Saj houmt an Fiaka gnumma und hand zan Bohunhouf gfohan, doucht hot da Franzl gschaut, woun a Zug af Linz geht, danoh hands glei zan Palee außi gfohn, saj houmt jo ban Hausmoasta doungschei und pfiad Goud sogn miaßn. Ah ba da Kajchin hands nou gwajn und daj hot a najna Brot gmocht und a Packl zan mitnajhma, daß untawajgs nit vahungan. Ban wajggajh houms noumol woan miaßn. "Drei Tog ham ma netta do gwajn, sou schei is gwajn und kajma kina ma nimma", hot d Resi gsoat und und d Kajchin hot gsoat "mit ajng houn a mi leicht tou, wun nua ulli sou wan, pfiat ajng Goud". Saj houmd gajh miaßn, wal da Franzl schou triem hot, daß rechzeiti zan Bohunhouf kajma hand.

Doucht hot da Franzl an Bohuna gfroat, wou ma a Fohakoachtn griagt und wou da Zug af Linz is. "Jo woast"hot dea gsoat,"da Zug steht schou do und um a Koachtn muaßt ahi gajh, doucht vakaft Oana d Koachtn". Ea is ahi gounga und hot gseha, daß an an FajNSTa Koachtn vakauft won hand. Da Franzl is hie gounga und fimf Koachtn af Linz valoungt. Dea vakaft hot, hot gfroat, ous ah wieda zruckfohan wülln, "na" hot da Franzl gsoat."Doun hoißts oafoch" hot dea gsoat und hot fimf Koachtn heagricht. "Mocht zwaj Guln und fuchzg Kreiza". Wia da Franzl an Schaj hot ausschreim wülln, hot dea ban FajNSTa gsoat "dos muaßt schou sölwa zohl, wal wun i ba jeda Koachtn noh rechna miaßat, kinat i nix vakafm und miaßat jedn Kreiza noh rajnna". Da Franzl hot nit sou vüll Göld ghot drum is a zan Wajnzl gounga und hot n gfroat oub ea eham oas leiha kinat,in Krumau giebt ea ehams zruck. Da Wajnzl hot eham zwaj Guln gajm und d Kreiza hot da Franzl sölwa nou ghot. "Siagst" hot dea am FajNSTa gsoat" es geht wun ma wüll und oafoch is ah, wun ma glei zohl tuat". Ea hot in Franzl d Fohakoachtn gajm und dea is mit die Viari zan Zug außi gounga. Wias dajn gseha houmd, houm sis hit glaum kina, daß Doumpfmaschin voirou sou vüll Wagn zuig kou und eascht wias ajgstiegn hand und gseha houmd, daß ougschraubti Bajnk zan sitzn drinn gwajn hand, hot da Thoumas gsoat "do kina mas bis Linz guat ausholn. Wal nou neamt in Wogn drinn gwajn is, houmsa sie an Plotz gsucht, wou ulli Fimfi sitzn houm kina. Da Franzl is noumol ausgstien und hot an Bohuna gfroat woun's wajg fohan, dea hot a Uha va da Muntua außa tau und hot gsoat "in a holb Stund kina ma fohan, mia houm nou zwajng Doupf". "Dounk schei" hot da Franzl gsoat und is za die Ounan ahi gstiegn, do hot a gsoat "in a holwa Stund kina ma fohan"."Dos kina ma ausholn" hot da Thoumas gsoat und hot sis recht komot gmocht. Draußt hand uwal meha Leit kajma, daj ah mitfohan houm wülln,ah in ihan Wogn hand Leit ajgstiegn.Wal die Viari am FajNSTa gsajßn hand, houms uiß seha kina wosam Bohunsteig gwajn is.

Do is a ültani Muata gwajn, dea iha Toichta is fuacht gfohan und daj hot da Toichta sou vüll ougajm, daß ma gmoat hot, sie kimmt nimma hoam. Zwaj Mouna hand sie min Göld fia a Kuha nit ajni won und houmt mit die Händ umatum gfuchtl. A Wei is mit zwoa Kina fuacht gfohan, daj houmt gwoat und iha Mou hots trest und hot gsoat "kajmts guat hoam und griaßts ma d Muata".

Sou is die holwi Stund vagouga, d Doumpfmaschien hot pfim und d Bohuna hot gschrian, "ulli ajsteign mia fohan oh" und noh a Wal,"fiacht ohfohan" D Doumpfmaschien hot noumol pfim und d Wagn houm eascht loungsoum, doun uwal schnölla zan rajnna ougfounga, d Bam und d Heisa hand netta sou voabei gfloun. Sou is weida gounga bis oamol loungsouma won und oft stajh blim is. Da Bohuna is als easchta draußt gwajn und hot gschrian wos fia a Statioun dos is, hot d Leit aus= und ajsteign lossn und hot doun wiada gschrian "fiacht oh fohan" und schou is weida gounga, bis af Mölk kajma hand. Doucht hot da Bohuna gsoat,"mia mochan a holwi Stund Pause, ajs kints wos tringa gajh, bevoa ma fohan pfeim ma noumol. Saj hand ausgstien und in Bohunhouf gounga, houmd, wals an Duascht

ghot houn d Mouna a Bia und d Weiwa a Krachal trunga und wia da Zug wieda pfifm hot, hands wieda in ihan Wogn ahi gstiegn. Sou is bis Linz weida gounga, in Uafa hands wieda iwa Nocht blim und i da Friha af Krumau weida gfohan.

In Schlouß hands zan Administratoa gounga, saj houn sie zruckmöln miaßn und dounk schei sogn. Dea Heaa Raht is recht froi gwajn, daß uiß sou guat gounga is und hot gsoat "ajs kinnts glei af Ouwaplou weida fohan, a Fuhaweag muaß wos afi bringa. Ajs kinnts af da Schloußwocht woachtn, wal a doucht hiekajma muaß, da Franzl koun ajng hie bringa und danoh rechtn ma oh". Da Franzl hot gsoat "is recht Heaa Raht, i houn ma zan fohan zwaj Guln ausleiha miaßn und daj muaß i ah nou in Wajnzl zruck gajm". Da Administratoa hot va da Tischschublon a blajchas Kastl außa tou und in Franzl die zwaj Guln und die Kreiza gajm, dea hot die zwaj Goln in Wajnzl zruck gajm und gsoat "schuldi bleim sull ma nix und hiatz kajmts, mia gajngan za da Wocht umi. Saj houn sie ban Administratoa tausend mol bedounkt bis gounga hand. Af da Wocht hot da Wajnzl zan Franzl gsoat "i woas nit wia ma dia dounka kinnan, mia wean ewig i dajna Schuld bleim". "Wißts" hot da Franzl gsoat, "sou schlimm is jo goa nit gwajn, i houns geen gmocht und i winsch ajng uiß guati fian Jungbauer, pfiat ajng" und ea is gounga.

Wia doun s Fuhaweag af d Plou kajma is, hot da Wochthobendi gsoat, ea muaß die Viari it Plou mitmajhma. Ea is ohgstiegn, hot griaß Goud gsoat und gfroat "sou i'd Plou wüllts afi, steigt af und richts ajng wos zan sitzn, wal i glei weida fohan muaß". Wia ulli gsajßn hand, is a am Bouck afi gstiegn und mit "wiah" hands ban Schloußtoi außi, duach Latrou bis zan Budweisatoi und va doucht Kolschin zua gfohan. Sou zwisch ahi, hot da Fuhamou gfroat, wous hea kajman und wos i da Plou zdoan hound. "Maj" hot da Wajnzl gsoat, "dos is a loungi Gschicht, kajma toan ma va Wean, van Keisa und hiatz majchat ma hoam in Hittnhouf, woast mia ham va lauta nixtoa schou gounz mod und ham froi, wun ma dahoam ham". "In Wean ban Keisa habts gwajn" hot da Fuhamou froat "dea sull jo nou recht jung sa, i majchat a amol af Wean fohan, d Residejnz, in Stefl und in Proda seha, dos muaß uiß sou schei sa". "Jo schei is schou" hot da Adam gsoat " und da Keisa is ah nit sou jung wia ma gmoat hot und wunst va lauta Heisa koani Berg und kon Wold siagst und d Leit rajnnan umtum, wia wun ihn wea nohrajna tat schei is schou zan ouschou, owa dahoam is huld dahom. Doucht wou die da Heaa Goud hi' gstüllt hot, doucht wou dajni Leit hand und woust in Ruha ah an Vata unsa betn kounst, do bist dahoam und dos is sulla Scheinsti wos da winschn koust". Saj hand iwa Goijau af Schwozboh gfohan und in Houßnreit hot da Wajzl gsoat, "kinatn ma nit do ohsteign, va da Plou miaß ma wieda it Stift oha und va do kinan ma gleih gweax hoam gajh". Iwa d Houßnreida Heibruck hands iwa d Wulda und bis zan Hittnstraßl weida gounga bis zan intan Wajg kajma hand, dea ban Grajgei afa kimmt. Wias ban Kunal gwajn hand, hot d Resi gsoat, "Goud sei dounk, daß ma dahoam ham, vrali hand Kina schou sou groiß, daß a boa Tog alloa bleim kinan, i bin neigiri wos tou houn". "I bin jo a neigiri wos majni tou hound" hot da Adam gsoat. Wias va da Bruck vom Haus gstoundn hand, hot da Wajnzl "kajmts dou nou a Wal aha" goat.

"Mia miaßn ah hoam gajh, a ounas mol wieda, pfiat ajng " hot d Kathi gsoat und is min Adam am Kunal weida gounga bis ban Kiagschljajga ehanan Heisl gwajn hand.

Da Wajnzl und d Resi hand iwa d Bruck afi und wia d Kina ghäacht houm, daß d Ülta kajmand, hands ihn bis za da Haustia gajng gsprunga und ulli houm wissn wülln, wis ihn gounga is, ous in Keisa gseha houm und oub's mod hand. "Loungsoum" hot da Wajnzl gsoat, "loßt uns eascht ahi gajh, d Muata koun oft dazühln wias gounga is und wos ma uiß gsehgn houm". Wal d Toichta an Strizl bocha ghot hot, is gounga und hot an Kaffe gmocht, danoh hot d Muta dazühlt, bis zan Stoll gajh gwaj is.

"Ajs brauchts hjt nit in Stoll gajh, göl Kathi, dos mochan ma hajnt nou alloa" hot da Michl gsoat. "I muaß ah nou zan Richta umi" hot da Vota gsoat, "dea muaß a wissn wias gounga is". "Und i gajhn nou a Wal zan Kreiz afi und bet fia dajn guan Ausgung", hot d Resi gsoat. Da Kathi is recht gwajn und saj hand in Stoll gounga.

Wia d Resi am Bangei ban Kreiz gsajßn is und fia ulli daj ihn ghufm houmd bet hot, is uiß schwari wos am Herzn druckt hot vagounga. Es is loungsoum Nocht won, die easchtn Sten hand zan seha gwajn, va die Hoiwiesn, daj bis zan Schrajna Wajg afi und bis zan Kolmawold außi gounga hand, hot a Mousgoas hoisari glocht, sunst is uiß ruahi gwajn. Do hot d Resi a Toppm am Kirasteig ghäacht und wias nähata kajma is, is a Betlmou gwajn, dea boafaßi netta in an Äadajpfsock dahea kajma is. "Griaß ajng Goud" hot d Resi gsoat, wia a ba iha gwajn is und ea hot "griaß die Reai" gsoat "deaf i mi a Wal inna sitzn". "Frali" hot d Resi gsoat "i houn nix dagajng und da Heagoud wiad a nix dagajng hom, wal a jo ulli Leit geen hot, deaf i frogn wou hea ajs wißts wea i bin". "Oh maj" hot a gsoat, woast Resi, i bin jo schou sou old und die kajn i schou als kloas Diane, seits van Houf außazung habts. I houn die Beag nou stoana gsehgn und netta af da Ajm is wos gwoxn und umatum is Wossa gwajn. Leit hots nou koa ghot. Danoh is kold won und da Schnee is gounzi Joha nit wajggounga, do is a mia z'kold won und i bin wajg gounga. Wia i wieda zruck kajma bin, hots af da Ajm ougfounga zan grea wen und fost a Ewigkeit hots daucht bis d Bam afm Beag houm woxn kina. Vajgl, Hosn, Reh und ounani Viaha hots schou ghot, Leit nou koa. Wia daj doun najm da Wulda afa zua kajma hand, hots nou hunat Joha daucht bis iwrol gwajn hand. Wun mi wea va daj gseha hot, is a schreiat davou grajnt und uiß schlechti wos gschen is, houni gmocht. Do muaß i an ajng dajnga a mia houms ajfta Teifl nochi gschrian. Mia hots nix ausgmocht, wal is nit braucht houn, bis i amol va Schwoazboh hoam gounga bin und zwoa Kina schraj und woan ghäacht houn. Wia i hikajma bin und gfroat hou wos houm, hot da Bua gsoat, daß nimma hoan findn und i hölfm sull. Es is da Franzl und s Annei van Biaraheisl in Rotschlög gwajn und gounz vazoat. Vajda hot mi da Bua gnajnt und wal s Annei nimma gajh hot kina, houn is in Oam gnumma und trogn. mia is gounz ounast won, sou wos Kloas, i houn gmoat sie bricht ma wia is afghajbt hou. Sie hot ihri Iameian um majn Hols tou und iha Kajpfl af maj Brust glajgt, es hot nit loung taucht doun is ajgshlofm. Ban Gajh hot da Bua maj Händ gnumma und druckt. Va do ou houn a mi meha um d Leit kimat,

wal mi d Kina neigiri gmocht houn und do bin i dahinta kajma. daß d Leit va lauta Soagn und Oungst sou sa mißn. Seit deara Zeit houn i mi ums Schicksol va die Teifl meha kimmat, hölfm houn i jo nit vüll kina, owa es hot mi gfreit wuns glickli gwajn hand". "Ajs habts da Woldvajda" hot d Resi gsoat", da Wajnzl und saj Voda houn schou ella va ajng dazühlt und bold gaz koani Teifl meha. "Resi" hot da Woldvajda gsoat, "griaß ma dajn Mou und san Vodan, i muaß hiaz weida und pfit die". Ea is afgstoundn und am Roa zan Wold afi gounga, wou a i da Nocht vaschwundn is.

D Resi hot nou a boa Vata unsa fia eham bet, bevoas i'd Stum ahi gounga is. D Kina hand min Stoll schou fiacht gwajn und ah da Voda is schou dahoam gwajn, do hot d Resi glei van Woldvajda dazühln kina. S Joha is umigounga und die Teifl houn schou gmoat, daß mas vagajßn hot, wal va koan Oumt wos kajma is. Die Fiaschtlichn hound ah nix gwißt, daj hound gsoat, sou schnöll gehts ba dajn nit und saj miaßn nou a Wal woachtn.

Eascht in Februa is a Schreim kajma, daß sa sie va hiaz ou Jungbauer najna kinnan, saj miaßn owa ban Pfoara und ban Gricht dos Schreim wajgn da Äjndarung voalajgn. Seit deara Zeit hand ulli Teifl, daj und ah die Ounan vaschwundn. Hexn, Zauwara und Zigajna hand nou gwajn, ah nou bäsi Leit. Schön und fluaha tuat ma uwal nou, Kreiz Teifl.

### Erinnerung, Hiascht 1930

Oamol hot da Schroat nou sa Hoamat sehgn wülln, es is ausgoungs Summa gwajn. Ban hoamgajh is a mod won und ea hot i da Lucka, ouwas Kunal rostn miaßn, dabei ios a gsehgn won. I da Schul hot da Uawal Wili gsoat, ba eha hot sie a Beddlmou a Loga gmocht, noh da Schul braucht a aboa zan nohschou. "Ea is recht groß, hot ohahäjngati Hooa, boafaßi is a ah und an Äadajpflsog hot a ou". Wia ma ausghot houn, ham ma glei suha gounga.

Ban Fehta in Wold ahi und foßt bis za da Matschireim hintari. Gfundn houn ma nix und ban hoamgajh is ma viakajma, wia wun i wos valoin hätt.

Die Teifl !

Martin Teufel  
Maria

Karspar Teufel \*1765 Radschlag  
Agnes geb. Watzl \*1757 Stögenwald  
Stögenwald

Die Springer !

Bernhart Springer  
Maria

Sebastian Springer \*1754 Radschlag  
Agnes geb. Faschingbauer \*1770

Wenzl Teufel \*1797 Hüttenhof  
Theresia geb.Springer \*1805 Hüttenhof

Theresia Springer \*1805 Hüttenhof

Jakob Teufel \*1843 Hüttenhof  
Aloisia geb Osen \*1852 Hüttenhof